

DIDZA' DXI'A BUZÚAJĚ' MATEO

Yugu' xuz xině'e gudödi queë' Jesús

(Lc. 3:23-38)

1 ¹ Ni ruzúaja' lágaquië' xuz xině'e gudödi queë' Jesucristo.
Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' bóchë'ë.

³ Judá gúquië' xúzgaquië' Fares, en Zara, ate' Tamar gúcanu
xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xiné'ë.

Booz gúquië' xuzë' Obed, ate' Rut gúcanu xiné'ë.

Obed gúquië' xuzë' Isaí.

⁶ Isaí gúquië' xuzë' David.

David na' gunná bé'enë' bönachi Israel, ate' butsaga ná'alënë'-nu
nigula na' gúcanu zí'alö nigula queë' Urías, ate' David, en nigula ni
guláquië' xuz xiné'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

⁹ Uzías gúquië' xuzë' Jotam.

Jotam gúquië' xuzë' Acáz.

Acáz gúquië' xuzë' Ezequías.

¹⁰ Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni' bóchë'ë.

Yugu' bönni' ni gula'cu'ë dza ni' cate' yugu' bönni' Babilonia
gula'ché'ë bönachi Israel nadzúngaca lu xiyúgaquië'.

¹² Jeconías gúquië' xuzë' Salatiel.

Salatiel gúquië' xuzë' Zorobabel.

¹³ Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

¹⁴ Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

¹⁵ Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

¹⁶ Jacob gúquië' xuzë' José.

José ni gúquië' bönni' queénu María, ate' María ni gúcanu xiné'ë Jesús, lë' ca' Cristo, Bönni' na' tun löza bönachi judío guídë' idinná bé'enë' légaquië'.

¹⁷ Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'ché'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'ché'ë léguequi ga bidxintë dza guljë' Cristo.

Yugu' le guca cate' guljë' Jesucristo

(Lc. 2:1-7)

¹⁸ Caní guca cate' guljë' Jesucristo. Cate' ni' chinazí' lu ná'abi' María, xiné'ë Jesucristo utsaga ná'alenbi' José, en zí'atëlö cate' si' utsaga ná'alenë'-bi', en cabí ne sóalenë'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi. ¹⁹ Náquië' José na', bönni' queëbi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'alenë'-bi' bagáchi'sö.

²⁰ Tsanni ni' rizá' ládxe'ë José ca na' gunë', buluí'i lahuë' gubáz lá'ayi queë' Xanru' lahuë' José lu yëla béchigal, en gudxë' lë':

—José, xzí'ini xzi'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi. ²¹ Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

²² Caní guca yúgu'të lë ni para gaca lë na' gunné' Xanru' lu ru'ë bönni' bë'ë didza' uláz queë' Dios, gunné':

²³ Buli'yútsöca', tu nigula ra'bando',

tsú'ubi' bí'ido' lë'ëbi',

ate' gáljabi' tubi' bi'i bönni'do',

ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

²⁴ Cate' bubanë' José lu yëla béchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. ²⁵ Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

Bönni' ta'yéajni'inë' ridiyúgaquië' bí'ido' Jesús

2 ¹ Cate' gúljabí' Jesús lu yödzo Belén, luyú Judea, rinná bë'ë Herodes luyú ní', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza. ² Gula'nabë' bönni' ní', ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabí'? Cate' ní' zóatu' ga rilén gubidza bilé'etu'-ba' böläj bení' naca bë' chigúlajbí', ate' za'tu' ní' para tseaj ládxi'tu'-bí'.

³ Cate' gúquibe'enë' Herodes, bönni' rinná bë'ë, lë ní', guró'ödë' böniga, en lësca' caní gula'bó' böniga yúgu'të bönachi nacua' Jerusalén. ⁴ Ní'irö Herodes na' bulidzë' yúgu'të bixúz unná bë', len bönni' yudo' tu'sedinë', ate' gunábinë' légaquië' gazxi ral-la' galjë' Cristo, bönni' na' tunë' löza bönni' judío ilá' lahuë' para inná bé'enë' légaquië'. ⁵ Të' lë':

—Lu yödzo Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

⁶ Biti' nácarö cá'asö yödzo Belén luyú Judá lahuë' Dios ca nácagaca yödzo gapa nacua' nupa ta'nná bë' luyú ní', tu' irúajë' tu bönni' yödzo Belén, en gáquië' lo, bönni' na' gun chilë bönachi Israel quia'.

⁷ Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inózinë' dxi'a gáca'xte chiguca bulu'í' lahui böläj na' bila'lé'enë'. ⁸ Ní'irö gusól-lë'ë légaquië' tsöjáquië' Belén. Rë' légaquië':

—Guli'tséaj ní', en guli'tsöjnaba dxi'a nacxi naca queëbi' bí'ido' na'. Cate' chibidzólili'-bí', ididíxjöi'ili' neda', para tseja' ca' neda', tseaj ládxa'a-bí'.

⁹ Gudödi bila'yönnë' didza' bë'ë Herodes na', söljáquië' bönni' ta'yéajni'inë' na', ate' böläj na' bila'lé'enë' cate' ní' nacu'ë ládzagaquië' sönóruba' lógaquië' ga bidxintë yöjsóa ga na' dëbi' bí'ido' na'. ¹⁰ Cate' bila'lé'enë' böläj na', bulu'dzéjade'enë'. ¹¹ Cate' gula'yázië' yu'u, bila'lé'enë'-bí' bi'í bönni'do' na', zóalenbi'-nu María, xiná'abi'. Bulu'zóa zxíbigaquië' lobi', en gula'yéaj ládxi'gaquië'-bí'. Gudödi na' gula'saljë' yugu' yöxaj quégaquië', ate' bulu'nödzjë' queëbi' oro, en yalaj, en nórido' rilá' zxixi que yaga mirra. ¹² Tu' chibuzéajni'inë' Dios légaquië' lu yëla béchigal para cabí tsöjhuójqüië' ga zoë' Herodes na', que lë ní' na' yöjhuójqüië' ládzagaquië' nöza yúbölö.

José, en María, ta'ché'ë-bi' Jesús luyú Egipto

¹³ Gudödi bulu'zé'ë yugu' bönni' ta'yéajni'inë' ní', bulu'í' lahuë' tuë' gubáz lá'ayi queë' Xanru' lu yëla béchigal, ga na' dë' José, en rë' lë':

—Guyaschi. Guché'-bi' bí'ido' ni, enca' xiná'abi', ate' buzzunnaj ni. Guyéaj luyú Egipto, ate' ugá'anu' ni' cate' guiéra' li' ia'tú. Caní gunu' tu' uguiljé' Herodes bí'ido' ni para gútié'-bi'.

¹⁴ Ní'irö guyasé' José, en ni' naca chi'i dzó'ölö, guché'-bi' bí'ido' na', enca' xiná'abi', ate' yöjáquié' luyú Egipto. ¹⁵ Bulu'gá'ané' ni' cate' gútiré' Herodes. Caní guca para gaca lë na' gunné' Xanru' Dios lu ru'ë tu bönni' bë'ë didza' uláz queé', gunné': "Ga naca luyú Egipto bulidza' Zxí'ina'."

**Risól-lë'ë Herodes bönni' ilútié'-bi' bi'i
hué'ënido' nacuá'abi' yödzö Belén**

¹⁶ Cate' gúquibe'ené' Herodes biti' guluné' bönni' ta'yéajni'iné' ca rnné', guléné', ate' gunná bé'ené' bönni' tsöjáquié' ni' para ilútié'-bi' yúgu'tëbi' bi'i bönni'do' nacuá'abi' yödzö Belén, en idú gásibi'ilö ga dë Belén na', yugu' bí'ido' chiyú'ugacabi' chopa iz, en bí'ido' nahué'ënigacaröbi'. Caní bené' ca busáquié' queé' Herodes na', tsca chiguca dza buluí'i lahui böläj na', dza na' bulu'zéajni'iné' bönni' ta'yéajni'iné' na' lë'. ¹⁷ Caní guca, bidxín lë na' gunné' Jeremías, bönni' bë'ë didza' uláz queé' Dios, gunné':

¹⁸ Lu yödzö Ramá riyón chí'igaca

nupa ta'bödxí, en nupa ta'bödxí yechi'.

Raquel ribódxinu ni'a quégacabi' zxi'ininu.

Biti' gaca nu hué tsahui' lënu, tu' chinátigacabi'.

¹⁹ Gudödi gútié' Herodes na', ní'irö buluí'i lahué' gubáz lá'ayi na' queé' Xanru' lu yëla béchigal lahué' José ga ni' zoé' luyú Egipto, ate' rë' lë':

²⁰ —Guyasa. Guché'-bi' bi'i bönni'do' ni, enca' xiná'abi', ate' böaj luyú Israel, tu' chigulátié' bönni' ni' gulé'ënné' ilútié'-bi' bi'i bönni'do' ni.

²¹ Ní'irö guyasé' José, ate' guché'-bi' bi'i bönni'do' na', enca' xiná'abi', ate' yöhuójquié' luyú Israel. ²² Cate' gúquibe'ené' José rinná bë'ë Arquelao luyú Judea tu' chigútié' Herodes, xuzé' Arquelao na', que lë ni na' gúdxiné' José huójé' ni'. Cate' buzéajni'iné' Dios lë' lu yëla béchigal, guyijé' luyú Galilea. ²³ Cate' bidxiné' ni', yöjsóé' lu yödzö Nazaret. Caní guca para gaca lë na' gula'nné' yugu' bönni' gulu'ë didza' uláz queé' Dios ca ral-la' gaca queé' Jesús, si' Lë', Bönni' Nazaret.

Juan, bönni' ruquilé' bönachi nisa runé' libán lu lataj cá'asö

(Mr. 1:1-8; Lc. 3:1-9, 15-17; Jn.1 :19-28)

3 ¹ Yugu' lu dza ni' buluí'i lahué' Juan, bönni' na' buquilé' bönachi nisa, en runé' libán lu lataj cá'asö luyú Judea. ² Juan na' rnné':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

³ Ca naca queé' Juan na', buzúajé' Isaías, bönni' bë'ë didza' uláz queé' Dios dza ni'të, le rnna caní:

Riyón chi'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládxido'oli'.”

⁴ Nácuë' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' böchi'zu, en re'jë' bidxindo' que buzdo'.

⁵ Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'. ⁶ Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

⁷ Cate' bilé'enë' Juan ta'dxinë' zían bönni' yudo' fariseo len yugu' bönni' yudo' saduceo ga zoë' para ila'dilë' nisa, gudxë' légaquië':

—Libi'ili', di'a dza quégacaba' bëla sínia'. ¿Zoa nu buzéajni'i libí'ili' para izxúnnajli' yöl-la' rusiúdxí na' si' gaca quégaca bönachi? ⁸ Guli'gún le gaca bë' chibubí'i ládxí'li'. ⁹ Biti' cuéqui ícjali', bití' innali' nácali' tsahui' tu' naca Abraham xuz gudödi queé'li'. Rea' libí'ili', huáca gunë' Dios ga ulu'huóaca yugu' guiój nacuá' ni di'a dza queë' Abraham.

¹⁰ Chizóa riböza guíë huága para ichugu yugu' yaga le ruluí'i ca gaca queé'li'. Yúgu'të yaga bití' ta'bía le naca dxi'a, irúgugaca, ate' ila'guë léguequi lu guí'. ¹¹ Le nácatë neda' ruquila' libí'ili' nisa lu nisa, núlöli' chibubí'i ládxí'li', pero Bönni' na' ral-la' guídë' cate' tödi quia' neda', Lë' gunë' le ruluí'isö yöl-la' ridila nisa ni, uchízië' libí'ili' Dios Bö' Lá'ayi len guí' queë'. Bönni' ni nácatërë' lo ca neda', ate' neda' bití' naca' lesaca' ilecja' xiráchuë' nudé'ë. ¹² Zönë' lu në'ë böcö' queë', le ulúbinë' ga ridxi'a zxoa' xtila queë'. Cu'ë zxoa' xtila queë' lu yu'u ga ni' gun chi'ë le, pero uzégui'ë bëbu que lu guí', ate' guí' na' bití' ca' ulu.

Ridile' nisa Jesús

(Mr. 1:9-11; Lc. 3:21-22)

¹³ Ní'irö buzé'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'. ¹⁴ Juan buzáguë'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

¹⁵ Bubi'ë didza' Jesús, rë' lë':

—Benna lataj na'a, tu' caní ral-la' gunru' idútë le naca tsahui'.

Ní'irö Juan bë'ë Lë' lataj. ¹⁶ Cate' chinadilë' Jesús nisa, la' burúajtë' lu nisa. Ní'irö guyalaj lúzxiba lahuë' Jesús, ate' bilé'enë' ruhuötjë' Dios Bö' Lá'ayi, en bidxinë' ga na' zoë', riné'ë ca riná'aba' gu'dödo'. ¹⁷ Ní'irö biyón chi'i nu ruí'i didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza ládxa'a Lë'.

Ré'ëni Satanás tu' xihui' ibaga' Jesús dul-la'

(Mr. 1:12-13; Lc. 4:1-13)

4 ¹ Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

² Idú choá' dza choá' yëla bitì' bi gudahuë' Jesús, ate' gudödi ni' ridunë'. ³ Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxí'inë' Dios, gunná na'a ulu'huöáca guió'j nacuá' ni yöta xtila.

⁴ Bubi'ë didza' Jesús, rë' le:

—Nazúaj lu guichi lá'ayi le rnna: “Calé'gasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

⁵ Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'. ⁶ Ní'irö tu' xihui' rë Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isól-lë'ë gubáz lá'ayi queë' para ilún chi'ë Li',

ate' ulu'chisë' Li' lu ná'agaquië',

para cabí tsöjchégu'u guió'j, en cabí gunu' zi' ni'u.

⁷ Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Biti' ugunu' dxin Xanu' Dios.”

⁸ Ní'irö tu' xihui' guchë' Jesús ga naca tu lu guí'a sibi, ate' ni' buluí'i Lë' yúgu'të yödzö nacuá' yödzölió ni, en yúgu'të yöl-la' tsahui' qué'guequi. ⁹ Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

¹⁰ Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ládxu'u, en udödi cuinu' lu na' tuzë' Lë'.”

¹¹ Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

Risí lahuë' Jesús runë' libán luyú Galilea

(Mr. 1:14-15; Lc. 4:14-15)

¹² Cate' biyönnë' Jesús nadzunë' Juan lidxi guíë, guyijë' luyú Galilea.

¹³ Buzë'ë yödzö Nazaret, ate' yöjsöë' lu yödzö Capernaum ga naca ra' nísado', lu buzá' qué'gaca bönachi Zabulón, en bönachi Neftalí. ¹⁴ Caní guca, bidxín lë na' gunné' Isaías, bönni' bë'ë didza' uláz queë' Dios, gunné':

¹⁵ Luyú Zabulón, en luyú Neftalí,

la' nöza ra' nísado' ia'tsölá'a yegu Jordán saca' ga rilén gubidza.

Luyú Galilea, ga nacuá' bönachi biti' nácagaca judío.

¹⁶ Bönachi chul-la niti ni' bila'lé'e bení',

ate' bönni' ni' nácagaquië' ca nupa chinátigaca, gulén quégaquië' bení'.

¹⁷ Cate' ní'irö gusí lahuë' Jesús runë' libán, en rë' bönachi ni':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

Jesús rulidzë' tapë' bönni' uzxón böla para tsöjtá'gaquië' Lë'

(Mr. 1:16-20; Lc. 5:1-11)

¹⁸ Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' bóchë'ë, lë'. Chopë' ni ta'chiljë' yöxaj böla quégaquië' lu nísado' na' tu' nácagaquië' uzxón böla. ¹⁹ Jesús rë' légaquië':

—Guli'dutá' neda', ate' guna' ga iché'ëli' bönachi quia', gunli' ca runli' rizönli'-ba' böla.

²⁰ Chopë' ni la' bulu'cá'anatë' yugu' yöxaj böla quégaquië', ate' sōjácálenë' Jesús.

²¹ Cate' gudödë' Jesús ia'lati' ní'ilö, bilé'enë' ia'chopë' bönni'. Tuë' lë' Jacobo, ate' dzáguië' Juan, bönni' bóchë'ë lë'. Nácagaquië' xxi'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yöxaj böla quégaquië'. Ní'irö Jesús bulidzë' chopë' ni para tsöjtá'gaquië' Lë'. ²² La' bulu'cá'anatë' bárcodo' na', enca' xúzgaquië', ate' sōjácálenë' Jesús.

Jesús rusédinë' bönachi zían

(Lc. 6:17-19)

²³ Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sëdë' queë' Dios. Benë' libán ni' que didza' dxi'a ca si' idinná bë'ë Dios luyú ni', en bunë' yúgu'të nupa te'e tsca naca yödzöhuë' té'eguequi. ²⁴ Guzë' didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zían yödzöhuë' que queégaquië', en ta'guí'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unigaquië' bin ni'a ná'agaquië', ate' Jesús bunë' yúgu'të bönni' na'. ²⁵ Bönachi zían bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacuá' ia'tsölá'alö yegu Jordán saca' ga rilén gubidza, ate' rōjácálen Jesús.

Libán benë' Jesús ga naca lu guí'ado'

(Lc. 6:20-23)

5 ¹ Cate' bilé'enë' Jesús bönachi zián sōjácálen Lë', ní'irö gurenë' tu lu guí'ado' ga naca xitsá'alö, ate' gurö'ë lu guí'a ni'. Ní'irö bulu'dubë' bönni' usëda queë' ga zoë'. ² Gusí lahuë' rusédinë' légaquië', rnnë':

³ —Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

⁴ 'Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë tsahuë'ë Dios caz légaquië'.

⁵ 'Bica' ba yugu' bönni' nácagaquië' nōxaj ladxi' lahuë' Dios, tu' gata' quégaquië' luyú ni.

⁶ 'Bica' ba yugu' bönni' ta'zé ládxi'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zé ládxi'gaquië'.

⁷ 'Bica' ba yugu' bönni' tu'huechi' ládxi'gaquië' luzá'agaquië', tu' huéchi' ládxi'ë Dios légaquië'.

⁸ 'Bica' ba yugu' bönni' naca tsahui' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

⁹ 'Bica' ba yugu' bönni' ta'bequi dxíë' didza' bizxaj, tu' ila'zí' lágaquië' xzí'ini cazë' Dios.

¹⁰ 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahui', tu' dë lataj quégaquië' ga rinná bë'ë Bönni' na' zoë' yehua' yubá.

¹¹ 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizí' yë' ta'nnë' queé'li' le xihui' tu' dá'ali' neda'. ¹² Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queé'li', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

Bönachi dá'gaca Cristo ilaca ca zödi', en ca bení'

(Mr. 9:50; Lc. 14:34-35)

¹³ Gunnë' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, biti' gaca gunru' ga huóaca siná'a. Bíti'rö naca lesaca', pero chinaca tu le chú'unaru', ate' ulu'libi bönachi le.

¹⁴ 'Libí'ili' nácali' ca bení' yödzölió ni para ulu'í'ili' lahui le naca queë' Dios. Ral-la' gácali' ca tu yödzö rō'ö tu lu guí'a, tu' cabí gaca igachi' yödzö na'. ¹⁵ Cate' ruquéla'ru' guí', biti' rigú'uru' le tu zxan guí'ina, pero ruzóaru' le ga liná' para uzení' yúgu'të nupa nacuá' lu yu'u. ¹⁶ Ca na' run bení', ral-la' gunli' ca' libí'ili', güí'ili' lataj gaca bë' le nácali' lógaca

yúgu'të bönachi, para cate' ila'lé'e le naca tsahui' runli', ila'gú'u-në'
Xúzili' Dios zoë' yehua' yubá yöl-la' ba.

Rusédinë' Jesús que le gunná bë'ë Dios lu në'ë Moisés

¹⁷ Gunnë' ca' Jesús:

—Biti' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idútë le tu'sedi lë na'.

¹⁸ Le nácatë rea' libí'ili'. Tsanni nacuá' lúzxiba, en yödzölió ni, bití' tödi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca. ¹⁹ Que lë ni na', núti'tës bönni' quítsjë' tu xibá cuídi'do'os le zoa lu xibá na', en usédinë' bönachi para ilún caní, bönni' ni gácatërë cuídi'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero núti'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá. ²⁰ Rea' ca' libí'ili': Channö cabí gunli' le nácatërö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'uli' ga rinná bë'ë Dios yehua' yubá.

Rusédinë' Jesús ca naca que nu rilé luzé'e

(Lc. 12:57-59)

²¹ Gunnë' ca' Jesús:

—Chibiyónili' ca gula'nnë' bönni' guta' lu ná'agaquië' le gulé' xuz xtó'oli': "Biti' gútili' bönachi. Nu bönni' gútië' bönachi, nabáguë'ë xíguia', ate' huadxinë' ga uchi'a usöröë' Dios lë'." ²² Na'a, neda' rea' libí'ili': Nu bönni' rilenë' böchi' luzé'ë, nabáguë'ë xíguia' huadxinë' ga uchi'a usöröë' Dios lë'. Lësca' caní, nu bönni' innë' zi'ë queë' böchi' luzé'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guíë' luzé'ë: "iBöa' canó'!" nabáguë'ë xíguia' tsöjtsu'ë lu guí' gabila.

²³ 'Caní naca, channö chizó'a cu'u tu le unödzu' lu bucugu lá'ayi, ate' tsöjnenu' ni' zoa bizx que rilenë' böchi' luzó'o li', ²⁴ bucá'ana lë na' unödzu' lu bucugu ni', en böaj lidxu'. Zí'alö yöjcá'ana tsahui' le benu' queë' böchi' luzó'o, ate' ní'irö gudá unödzu' lë na' nu'u.

²⁵ 'Channö zoa nu bönni' rinábinë' li' bi ubi'u queë', en iché'ë li' ga uchi'a usöröë' tu bönni' li', budzágatë tsahui' bönni' na' tsanni ni' yú'ulenu' lë' nöza, para cabí udödë' li' lahuë' bönni' ruchí'a rusöröë', ate' bönni' ni udödë' li' lu në'ë bönni' rusayjë' lidxi guíë, ate' lë' cu'ë li' lidxi guíë na'. ²⁶ Le nácatë rea' li', bití' ca' uruju' ni' cate' idxinrö dza quixxju' ga buitë le ral-lu'u.

Rusédinë' Jesús ca naca que nu riguitsaj xibá que yöl-la' nutsaga na'

²⁷ Gunnë' ca' Jesús:

—Chibiyónili' ca na' gula'nné': "Biti' gunu' dul-la' le riguitsaj xibá que yöl-la' nutsaga na'." ²⁸ Na'a, neda' rea' libí'ili': Núti'tës bönni' ruyúë' tu nigula len yöl-la' rizé ladxí' le ruá' dö', chibenë' dul-la' len lënu lu icja ladxí'da'ahuë'.

²⁹ 'Que lë ni na', channö guiój lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítíu' tu guiój lo', en calëga idúteo' tsöjtsú'u lu guí' gabila. ³⁰ Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítíu' tu no'o, en calëga idúteo' tsöjtsú'u lu guí' gabila.

Rusédinë' Jesús ca naca que nu bönni' rulá'alenë' nigula queë'

(Mt. 19:9; Mr. 10:11-12; Lc. 16:18)

³¹ Gunné' ca' Jesús:

—Lësca' gula'nné': "Núti'tës bönni' rusanë'-nu nigula queë', ral-la' unödzejë' queënu tu guichi le rnna rulá'alenë'-nu." ³² Na'a, neda' rea' libí'ili', channö zoë' nu bönni' rusanë'-nu nigula queë', en bití' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

Rusédinë' Jesús ca naca que nu ruzötaj La la'ayi queë' Dios

³³ Gunné' ca' Jesús:

—Lësca' biyónili' ca yugu' bönni' guta' lu ná'agaquië' gulé' xuz xtó'oli', gula'nné': "Biti' si' yë'u cate' run tsutsu xtídzu'u ni'a queë' Dios, en ral-la' gunu' lahuë' Xanru' Dios idútë lë na' run tsutsu xtídzu'u ni'a queë' Lë'." ³⁴ Na'a, neda' rea' libí'ili', bití' ca' gun tsutsu xtídza'li'. Bití' gun tsutsu xtídza'li' ni'a que yehua' yubá, tu' naca ga rō'ë rinná bē'ë Dios. ³⁵ Bití' gun tsutsu xtídza'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayépisëtërë' rinná bē'ë. ³⁶ Bití' gun tsutsu xtídzu'u ni'a que icju', tu' cabí gaca gunu' ga huóaca chiguichi o gasaj nitú guitsa' icju'. ³⁷ Ral-la' innásili': "Ön", o innásili': "Bití", tu' naca que tu' xihui' le nadödi bē' ca nácagaca didza' ni.

Rusédinë' Jesús ca naca que nu ruzí' lëbi luzé'e

(Lc. 6:29-30)

³⁸ Gunné' ca' Jesús:

—Chibiyónili' ca naca le gunná bē'ë Moisés, gunné': "Nu bi run que guiój lahui luzé'e, ubí'i ca' que, enca' nu bi run que layi' luzé'e, ubí'i ca' que." ³⁹ Na'a, neda' rea' libí'ili': Bití' tá'baga'li' nu guá' dö' queéli', ate' channö nu capa' xagu' ibëla, bē' lataj capa' ca' ia'tú xagu' yögöla.

⁴⁰ Channö zoa nu gun ga uchi'a usöröë' tu bönni' li', en cuë' xzo', bē' ca'

queë' lari' rixóa cúdzu'u. ⁴¹ Channö zoa nu gun bayudxi gu'u yua' que tu chi'i, guyéajlen nu na' chopa chi'i. ⁴² Nu bi rinábini li', bunödzaj que, en nu bi gué'ëni gunnu' que tu chi'i, biti' tá'bagu'u lë na' inabi li'.

Rusédinë' Jesús ca ral-la' idxí'iru' nupa biti' ta'lé'e rë'u dxi'a

(Lc. 6:27-28, 32-36)

⁴³ Gunnë' ca' Jesús:

—Lësca' caní biyónili' lë na' gula'nnë': “Ral-la' idxí'inu' nu nadxí'i li', en udí'inu' nu biti' rilé'e li' dxi'a.” ⁴⁴ Na'a, neda' rea' libí'ili', guli'dxí'i nupa biti' ta'lé'e libí'ili' dxi'a. Guli'nábinë' Dios gácalenë' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzë' Dios inábili'-në' gunë' ga gaca dxi'a quégaca nupa ta'nnë' queéli', en tuá' dö' queéli'. ⁴⁵ Channö gunli' caní, gácali' zxí'ini cazë' Xúziru' Dios, zoë' yehua' yubá, tu' runë' Lë' ga ruzení' gubidza queë' ga nacuá' bönachi tuá' dö', enca' ga nacuá' bönachi tsahui'. Risól-lë'ë tu nisa guió'j lu yu quégaca bönachi tsahui', enca' lu yu quégaca bönachi biti' nácagaca tsahui'. ⁴⁶ Channö nadxí'isili' bönni' nadxí'iguequinë' libí'ili', ¿nuzxi caz cu'u libí'ili' yöl-la' ba? Lësca' caní tunë' bönni' biti' nácagaca tsahui' na', bönni' tu'quizxjë' uláz que yödzö zi'tu', nadxí'iguequinë' luzá'agaquië'. ⁴⁷ Channö rugápali' Dios tuzë' böchi' luzá'ali', ¿bizxi caz runli' le nácatërö dxi'a? Lësca' caní tunë' bönni' biti' núnbë'gaquië' Dios. ⁴⁸ Pero libí'ili', guli'gaca idú tsahui', ca na' náquië' Xúziru' Dios, zoë' yehua' yubá, náquië' idú tsahui'.

Rusédinë' Jesús ca ral-la' gácalenru' bönachi

6 ¹ Gunnë' ca' Jesús:

—Guli'güí' ládxi'li' gaca idú ca reaj ládxi'li'-në' Dios. Biti' gúnsili' lë ni lógaca bönachi para ila'lé'e ca na' runli'. Channö runli' caní, biti' bi gunnë' Xúziru' Dios zoë' yehua' yubá queéli'. ² Cate' bi unödzju' que nu bi riyadzaj, biti' gunu' ga ilá' lahui lë na' runu' ca tunë' bönni' tu'luí'isö tsahui' cuíngaquië' ga naca lu yu'u ga tu'dübë' bönni' judío, en tu'sëdë' queë' Dios, enca' ga naca lu yé'ëyi. Caní tunë' para ila'gú'u bönachi légaquië' yöl-la' ba. Le nácatë rea' libí'ili', cá'asö naca yöl-la' ba gata' quégacaquië'. ³ Pero li', cate' bi unödzju' que nu bi riyadzaj, biti' ca' gu'u lataj nu inözi. ⁴ Na'a, lë na' unödzju', bagáchi'sö ral-la' unödzju', ate' Xúziru' Dios, Nu rilé'e ca na' runu' bagáchi'sö, Lë ubi'ë quiu'.

Rusédinë' Jesús ca ral-la' ulídzaru'-në' Dios

(Lc. 11:2-4)

⁵ Gunnë' ca' Jesús:

—Cate' ulídzali'-në' Dios, biti' gunli' ca tunë' bönni' tu'luí'isö tsahui' cuíngaquië', tu' ta'yaza ládxi'gaquië' ta'zuínë' tu'lidzë' Dios gapa naca

lu yu'u ga tu'dubë' tu'sädë' bönni' judío queë' Dios, en gapa naca lu yé'ëyi para ila'lé'e bönachi légaquië'. Le nácatë rea' libí'ili', cá'asö naca yöl-la' ba gata' quégaquië'. ⁶ Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzë' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë queéli'.

⁷ 'Cate' ulídzali'-në' Dios biti' gunli' la' yé'ëyi la' lez ca na' tunë' bönni' biti' núbë'gaquië' Dios, tu' téquinë' huayönnë' Dios légaquië' tu' tu'lidzë' la' yé'ëyi la' lez. ⁸ Biti' gunli' ca na' tunë' légaquië'. Xúziru' Dios, zí'atëlö cate' si' inábali'-në', chinóz quézinë' le riyadzaj queéli'.

⁹ Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

¹⁰ Gudá inná bë'u luyú ni.

Ben ga gaca luyú ni ca raza ládxu'u Li' ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queétu'.

¹³ Biti' gu'u lataj si' bë' tu' xihui' netu', pero busölá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní ré'ënitú' gácatíca'sö. ¡Ca' gaca!

¹⁴ 'Channö uniti loli' luzá'ali', nupa tuá' dö' queéli', uniti lahuë' Xúziru' Dios, zoë' yehua' yubá, libí'ili'. ¹⁵ Channö cabí uniti loli' luzá'ali', biti' uniti lahuë' Xúziru' Dios libí'ili' ca naca dul-la' nabága'li'.

Rusédinë' Jesús ca ral-la' gunru' gubasa

¹⁶ Gunnë' ca' Jesús:

—Cate' gunli' gubasa, biti' gunli' bayechi' loli' ca tunë' bönni' tu'luí'isö tsahui' cuíngaquië', tu' tunë' bayechi' lógaquië' para iléquibe'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'. ¹⁷ Libí'ili', cate' gunli' gubasa, buli'pá'a ícjali', en guli'quibi loli', ¹⁸ para cabí iléquibe'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenë' libí'ili' ga na' zóali' queézili', Lë' ubi'ë queéli'.

Yehua' yubá ral-la' utúbiru' yöl-la' tsahui' queéru'

(Lc. 12:33-34)

¹⁹ Gunnë' ca' Jesús:

—Biti' utúbili' yöl-la' tsahui' luyú ni, ga ni bélado' que tu'töba' le, ate' raca ditaj, en ga ni ta'yaza gubán, ta'banë'. ²⁰ Buli'tubi yöl-la' tsahui' yehua' yubá, ga ni' bélado' que biti' ulu'töba' le, en biti' gaca ditaj, en

ga ni' biti' ila'yázië' bönni' gubán, en biti' ila'banë'. ²¹ Ga ni' dë yöl-la' tsahui' queéli', ni' güí'i ládxi'li' idxinli'.

Le rigú'u bení' icja ládxi'do'oru'

(Lc. 11:34-36)

²² Gunné' ca' Jesús:

—Guiöj loru' naca ca tu le rigú'u bení' icja ládxi'do'oru'. Que læ ni na', channö guiöj loli' naca tsahui', idúteli' tsépili' yösa bení'. ²³ Channö guiöj loli' biti' naca tsahui', idúteli' nachúl-lali'. Que læ ni na', channö bení' zóalen libí'ili' nuhuóaca le naca chul-la, yénni'tërö nachúl-lali'.

Dios, en dumí

(Lc. 16:13)

²⁴ Gunné' ca' Jesús:

—Cuntu nu bönni' gaca gunë' xichíngaquië' chopá xanë', tu' uzóë' tuë' tsólá'alö, ate' ia'túë' na' idxi'inë', o ugá'analënë' tuë', ate' ia'túë' na' usán ládxi'ë. Biti' gaca gunli' xichinë' Dios, enca' dumí.

Dios rapa chi'ë nupa néquiquequi queë'

(Lc. 12:22-31)

²⁵ Gunné' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tërö yöl-la' na'bán queéli' ca le gáguli', ate' nácatërö lesaca' le nácali' ca lari' gáculi'. ²⁶ Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli' libí'ili' ca yugu' biguínido' na'. ²⁷ ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi ruguí'inë' para gaca caní queë'?

²⁸ ¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' rógaca la' guixi' ca ta'zxón. Biti' tun dxin, en biti' tun du lari'. ²⁹ Neda' rea' libí'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' biti' gunná'tërö lachi ca rinná'gaca yöjdo' na'. ³⁰ Dios caz runë' lachi yöj guíxi'do', le rógaca la' guixi', le nacué' na'a dza, ate' cuxó huidzaj ila'yegui lu guí'. Channö caní ruí'i ládxi'ë yöj guíxi'do', runë' léguequi lachi, gúnda'arë' ca' queéli', sal-la' biti' réajlë'ëli'-në' idú ládxi'li'. ³¹ Que læ ni na', biti' ubi uguí'ili', en biti' innali': “¿Bizxi gágutsatu'?” o “¿Bizxi guí'jatsatu'?” o “¿Bizxi lari' gácutsatu'?” ³² Bönachi yödzölió ni tu'úbi tu'guí'i ni'a que yúgu'të læ ni, pero zoë' Xúziru' yehua' yubá, ate' Lë' nózinë' naquínili' yúgu'të læ ni. ³³ Na'a, guli'güí'irö ládxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinózali' yúgu'të læ ni.

³⁴ Que læ ni na', biti' ubi uguí'ili' ni'a que le ral-la' gaca cuxó huidzaj, tu' huáca güí'i ládxi'li' cuxó huidzaj le gaca queéli' dza na'. Tu tu dza ilaca le ral-la' güí'i ládxi'li' dza na'.

Biti' ral-la' ichugu bé'ëru' böchi' luzá'aru'

(Lc. 6:37-38, 41-42)

7 ¹ Gunné' ca' Jesús:

—Biti' ichugu bé'ëli' böchi' luzá'ali', para cabí ichugu bé'ë Dios queéli', ² tu' ichugu bé'ë Lë' queéli' la' leze ca na' richugu bé'ëli' queé' böchi' luzá'ali', ate' ca na' rurixi rudódili' que luzá'ali', la' cá'asó urixi udödë' Dios queéli'. ³ ¿Bizx que ruyú' bé'budo' yu'u guiój lahuë' böchi' luzó'o, en biti' réquibe'enu' yu'u le zxóntërö guiój lo' li'? ⁴ ¿Guíëtso' böchi' luzó'o: “Gulóz, cueja' bé'budo' yu'u guiój lo'”, ate' li', le zxóntërö ca' yu'u guiój lo' li'? ⁵ Li', bönni' ruluí'isö tsahui' cuinu'. Guléaj zí'alö le zxön yu'u guiój lo' li', ate' ní'irö ilé'enu' tsáhui'do' para gaca cueju' bé'budo' yu'u guiój lahuë' böchi' luzó'o.

⁶ 'Biti' güí'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queéli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷ Gunné' ca' Jesús:

—Guli'naba, ate' Dios gunnë' queéli'. Guli'guilaj, ate' gunnë' lataj idzöli queéli'. Buli'lidza ra' yu'u, ate' Lë' isaljë' queéli'. ⁸ Núti'tës bönni' rinabë', ridéli'në', ate' bönni' riguiljë', ridzöli queé', ate' bönni' rulidzë' ra' yu'u, ralaj queé'.

⁹ 'Channö zoë' nu bönni' ladjali' libí'ili', ate' zóabi' bi'i queé', channö inábibi' lë' yöta xtila, ¿naru' unödzjë'-bi' guiój? ¹⁰ Channö inábibi' lë' tuba' böla, ¿naru' unödzjë'-bi' bëla? ¹¹ Libí'ili' nácali' huiá' dö', pero nózili' unódzjali' zxí'inili' le naca tsahui'. Nácatërö löza, Xúzili' zoë' yehua' yubá unödzjë' nupa ta'nábini Lë' le naca dxi'a.

¹² 'Que læ ni na', ca na' ré'ënili' ilún bönachi queéli', læsca' caní guli'gún quégaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'

(Lc. 13:24)

¹³ Gunné' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le röjácalenë' bönni' ga ni' ila'nítië', ate' ta'yázië' bönni' zían ni'. ¹⁴ Tsúpi'do' naca ga nu riyaza, en lásido'os naca nöza le

röjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

Le runru' naca bë' le nácaru'

(Lc. 6:43-45)

¹⁵ Gunné' ca' Jesús:

—Guli'gún chi'i cuinli' para cabí ila'zí' yé'enë' bönni' ta'zí' yë'ë libí'ili', ta'nné' tu'ë didza' uláz queë' Dios. Ila'dxinë' bönni' caní ga zóali', en ulu'luí'i cuíngaquië' nöxaj ládxi'do' ca nácagacaba' bö'cu' zxíla'do', pero lu icja ládxi'do'gaquië' nácagaquië' ca bö'cu' guí'a sínia'.

¹⁶ Yugu' le tunë' ilaca bë' le nácagaquië'. Biti' ruchíbiru' le ribía lubá uva lu yaga yötsi', en bití' ruchíbiru' le ribía yaga higo lu guixi' legui lásido'. ¹⁷ Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. ¹⁸ Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a. ¹⁹ Yúgu'të yaga bití' ta'bía le naca dxi'a ila'rugu, ate' ila'gu'ë léguequi lu guí'. ²⁰ Caní naca, yugu' le tunë' bönni' na' ilaca bë' le nácagaquië'.

Nupa bití' ila'yázië' ga rinná bë'ë Dios

(Lc. 13:25-27)

²¹ Gunné' ca' Jesús:

—Zian nupa të neda': "Xan, Xan", pero calëga yúgu'të' ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca ré'ënë' Xuza' Dios, zoë' yehua' yubá. ²² Cate' idxín dza údxi que yödzölió ni, bönni' zían ilé' neda', ila'nné': "Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxön." ²³ Ní'irö neda' guí'a légaquië': "Bití' ca' núnbë'a libí'ili'. Guli'cuíta ga zoa', libí'ili' ruá'ali' dö'."

Chopa ca gaca udxíaru' xilibi zö'ö

(Lc. 6:47-49; Mr. 1:22)

²⁴ Gunné' ca' Jesús:

—Ia'stú ca', nu bönni' riyönnë' xtídz'a'a ni, en gunë' ca rnna, bönni' ni náquië' ca tu bönni' réajni'inë', budxíë' lidxë' ga naca lu guió'j. ²⁵ Cate' gulaj guió'jsiu', en guzxón yegu gubó'o, en guyecja bö', gudibi nisa cuita yu'u na', pero bití' gubixi, tu' dxía xilibi lu guió'j. ²⁶ Na'a, nu bönni' riyönnë' xtídz'a'a ni, en bití' runë' ca rnna, bönni' ni náquië' ca tu bönni' bití' réajni'inë', budxíë' lidxë' lu yu dzöbi. ²⁷ Cate' gulaj guió'jsiu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubíxitë, en tsaz biguinnaj.

²⁸ Cate' Jesús budxi bé'lenë' légaquië' didza' ni, bulu'bani bönachi zían nacuá' ni' ca naca le rusédinë', ²⁹ tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quégaquië'.

Ruhuöáquië' tu bönni' ré'enë' huë' nudzu' ruzödi

(Mr. 1:40-45; Lc. 5:12-16)

8 ¹ Cate' bötjë' Jesús lu guí'a na', sōjácálen bönachi zían Lë'.
² Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':
 —Xan, channö ré'ënu', huáca unu' neda'.
³ Ní'irö Jesús la' bulitë në'ë, en gudanë' lë'. Rë' lë':
 —Ré'ënda'. Huöácu' dxi'a.
 La' bunítitë xihuë'ë bönni' huë' na'. ⁴ Ní'irö Jesús gudxë' lë':
 —Buyú, cuntu nu guío' caní, pero guyéaj, yōjluí'i cuinu' lahuë' bixúz, ate' yōjnödzej le gunná bë'ë Moisés le uluí'i bönachi chiböácu'.

Jesús ruúnë' bi'i huen dxin queë' tu bönni' rinná bë'ë lu gudil-la

(Lc. 7:1-10)

⁵ Cate' guyázië' Jesús yödzö Capernaum, bidxinë' tu bönni' ga zoë', bönni' rinná bé'enë' tu gáyü'ë bönni' rōjáquië' gudil-la, ate' gúta'yuë' lahuë' Jesús, ⁶ en rë' Lë':
 —Xan, bi'i huen dxin quia' dëbi' yu'u, ré'ebi' huë' nací'unibi' bin, ate' riguí'i rizáca'da'abi'.
⁷ Jesús rë' lë':
 —Neda' guída' una'-bi'.
⁸ Bubi'ë didza' bönni' na' rinná bé'enë' bönni' rōjáquië' gudil-la, en rë' Jesús:
 —Xan, biti' naca' zi tsáziu' lidxa', pero tsa innasu' quia', ate' huöácabi' bi'i huen dxin quia'. ⁹ Lësca' neda', zoa nu rinná be'e neda', en nacu'ë ca' bönni' rōjáquië' gudil-la rinná bé'egacada'-në'. Cate' rea'-në' tuë': “Guyéaj ni”, rejë'. Cate' rea'-në' ia'túë': “Gudá ni”, ridë'. Cate' rea'-në' bönni' huen dxin quia': “Ben dxin ni”, la' runtë' dxin na'.
¹⁰ Cate' biyönnë' Jesús didza' ni, bubáninë', ate' gudxë' bönni' sōjácálenë' Lë', rnnë':
 —Le nácatë rea' libí'ili', ga nacuá' bönachi Israel, cuntu nu bönni' rōjxéqui'da'-në' réajlë'ë neda' ca runë' bönni' ni. ¹¹ Ia'stú rea' libí'ili': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsözxón Abraham, en Isaac, en Jacob, yehua' yubá ni' ga rinná bë'ë Dios, ¹² pero yugu' bönni' na' guró cazë' Dios para ila'yázië' ga na' rinná bë'ë Lë', chú'unë' légaquië' ní'ilö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhuí'ini quégaquië'.
¹³ Ní'irö Jesús gudxë' bönni' na' rinná bé'enë' bönni' rōjáquië' gudil-la, rnnë':

—Böaj lidxu'. Ca na' réajlë'u, ca' gaca quiu'.
La' ná'asö böácatëbi' bi'i huen dxin queë' na'.

Jesús ruúnë' xiná'anu nigula queë' Pedro

(Mr. 1:29-31; Lc. 4:38-39)

¹⁴ Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá. ¹⁵ Gudanë' Jesús ná'anu, ate' la' burúajtë xilá na' yú'unu. Ní'irö böásanu, en bunódzjanu le gulahué'.

Jesús ruúnë' zián nupa te'e

(Mr. 1:32-34; Lc. 4:40-41)

¹⁶ Cate' chiridzó' dza na', dujuá'agaquië' zián bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bunë' ca' yúgu'të nupa te'e. ¹⁷ Caní guca para gaca ca na' gunné' Isaías, bönni' bë'ë didza' uláz queë' Dios, gunné': "Lë' bu'ë yugu' le rizáca'ru', en bu'ë ca' yugu' yödzöhué' queë'ru'."

Nupa gulë'ëni tsöjácálen Jesús

(Lc. 9:57-62)

¹⁸ Cate' bilé'enë' Jesús nacué' bönachi zián gásibi'ilë', gunná bé'enë' yugu' bönni' usëda queë' ila'dödë' ia'tsölá'a nísado' ni'. ¹⁹ Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lëna' Li' gáti'tës ga tseju'.

²⁰ Jesús rë' lë':

—Yugu' böza' nacué' zzan guió'j quégacaba', ate' yugu' biguinnido', nudxíagacaba' xicá'agacaba', pero neda', Bönni' Guljë' Bönachi, biti' dë ga quíxaj icja'.

²¹ Ia'túë' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuza'.

²² Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáché'ë nupa ilátigaca quégacacaba'.

Jesús ribequi dxíë' bö' budunu'

(Mr. 4:35-41; Lc. 8:22-25)

²³ Gurenë' Jesús lë'e bárcodo', ate' dzágagaquië' Lë' bönni' usëda queë'. ²⁴ Ní'irö guyecja bö' budunu' lu nísado' na', ate' riyasa ridxíada' nísado' na' ga bidxintë riyaza nisa lë'e bárcodo' na'. Dë' rásië' Jesús lë'e barco na'. ²⁵ Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en të' Lë':

—Xan, busölá netu'. Chirigáchi'ru' lu nisa.

²⁶ Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' guró'otë dxi. ²⁷ Bulu'bánninë' bönni' na', ta'nnë':

—¿Nuzxi caz bönni' ni? Ruí'isë' didza', ate' bö' recja, en nísado' tun ca rnnë'.

Yugu' bönni' Gadara yú'ugaca bö' xihui' légaquië'

(Mr. 5:1-20; Lc. 8:26-39)

²⁸ Cate' bidxinë' Jesús ia'tsölá'a nísado' ga na' naca lu xiyú yödzö Gadara, bila'rúajë' chopë' bönni' ga nacué' ba quégaca nupa nátigaca, dutságagaquië' Jesús. Nácagaquië' sínia', ate' cuntú nu gaca tödi la' nöza ni'. ²⁹ La' guluí'të' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxí'inë' Dios? ¿Naru' bidxintso' ni dusaca' zi'u netu' zí'alö ca idxín dza queétu'?

³⁰ Ga ni' nacué' nacué'aba' cuichi zían ta'daba' táguba', nacué'aba' láti'do' ga naca zi'tu'. ³¹ Gula'naba yechi' bö' xihui' na' Jesús, en të Lë':

—Channö ubéaju' netu', benna lataj tsöjtsú'ugacatu'-ba' cuichi zían ni'.

³² Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuichi zían ni'.

Ní'irö yúgu'tëba' cuichi zían na' yöjbíxitëgacaba' ga naca lë'e guió'j, en yöjcházagacaba' lu nísado', ga ni' gula'yépiba' nisa, en gulátiba'.

³³ Guládxinë' bönni' tu'yúë'-ba' cuichi na', ate' bulu'zxúnnajë'. Cate' bila'dxinë' lu yödzö, gula'guíxjö'ë yúgu'të lë na' guca quégagaquië' bönni' ni' gula'yú'u bö' xihui' légaquië'. ³⁴ Ní'irö bila'rúaj bönachi lu yödzö ni', yöjtságagaquië' Jesús. Cate' bila'lé'enë' Lë', guláta'yuë' lahuë' uzé'ë lu xiyúgaquië' na'.

Jesús ruúnë' tu bönni' nacú'unië' bin

(Mr. 2:1-12; Lc. 5:17-26)

9 ¹ Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'. ² Ni' dujuá'gaquië' tu bönni' nacú'unië' bin ga zoë' Jesús, xzoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxu'u, zxí'ina'do'. Chibuníti lahua' dul-la' nabágu'u.

³ Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': “Didza' ru'ë bönni' ni ruzóa Dios tsölá'alö.”

⁴ Cate' réquibe'enë' Jesús le ta'zá' ládxi'gaquië', rë' légaquië':

—¿Bizx que rizá' ládxi'li' caní le cabí naca tsahui'? ⁵ Biti' naca böniga nu guiésö bönni' ni: “Yugu' dul-la' nabágu'u chibuníti lahua'”, pero naca böniga nu gun ga huóásë', en uzé'enë'. ⁶ Na'a, uluí'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

⁷ Ní'irö la' guyásatë' bönni' na' nacú'unië' bin, en böajë' lidxë'. ⁸ Cate' bila'lé'enë' bönni' nacu'ë ni' lë ni, bulu'bábinë', ate' gula'gu'ë Dios yöl-la' ba tu' bunödzjë' yöl-la' huáca caní quégaca bönachi.

Jesús rulidzë' Mateo

(Mr. 2:13-17; Lc. 5:27-32)

⁹ Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjë' uláz que yödzö zi'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

¹⁰ Ia'tú le guca, cate' ni' rö'ë Jesús rahuë' ga naca lidxë' Mateo, zían bönni' tu'quíxjë', en yugu' bönni' cá'asö bila'dxinë' ga zoë', ate' gula'bó'lenë' Jesús tsözxón len yugu' bönni' usëda queë'. ¹¹ Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentsë' tsözxón bönni' tu'quíxjë', en iá'zica'rë' bönni' dul-la'?

¹² Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi. ¹³ Guli'tséaj, en buli'sëda le rnna lë na' nazúaj lu guichi lá'ayi, le rnna caní: “Ré'ënda' ulu'huéchi' ládxi'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'.” Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí'i ládxi'gaquië'.

Rusédinë' Jesús ca ral-la' gunru' gubasa

(Mr. 2:18-22; Lc. 5:33-39)

¹⁴ Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usëda quiu' Li' bití' tunë' gubasa?

¹⁵ Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacuá' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idúë' bönni' na' rutsaga në'ë ga nacu'ë. Dza ní'irö ilunë' gubasa.

¹⁶ Bucúdzu'ë didza' Jesús, rnnë':

—Cuntu nu un tu lari' tēbi len lari' cubi, tu' uxú'uni lari' cubi na' nugu'ë lari' tēbi na', ate' ichóza'rö lari' tēbi na'. ¹⁷ Lësca' caní, cuntu nu bönni' riguë'ënë' xisi uva cubi tu lu buzudi guídi gula, tu' galaj ilēbi xisi uva cubi na', en uzxuzxaj buzudi guídi gula na', ate' gaca ditaj xisi uva

na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatē taca chi'i.

**Rubanbi' bi'i nigula queë' Jairo, en ruhuóácanu tu
nigula gudannu lari' nácuë' Jesús**

(Mr. 5:21-43; Lc. 8:40-56)

¹⁸ Tsanni ni' Jesús ru'ilenë' légaquië' didza' ni, tu bönni' rinná bé'enë' bönnachi judío bidxinë' ga zoë', ate' buzóa zxibë' lahuë' Jesús, en rë' Lë':
—Bi'i nigúlado' quia' la' gútitébi'. Gudá ixóa no'o lëbi', ate' ubanbi'.

¹⁹ La' guzuítenë' Jesús, en sa'yéajlenë' lë'. Dzágagaquië' bönni' usëda queë' Lë'.

²⁰ Ní'irö bidxinnu tu nigula zaca' cúdzu'lë' Jesús, chiguca chinnu iz ré'enu, biti' ruhuí'i rön queénu que huë' quégaca cázanu nigula, ate' gudannu lari' nácuë' Jesús. ²¹ Caní bennu tu' rizá' ládxi'nu, rnnanu: Channö cansa' zxë', huóaca'. ²² Ní'irö buécjë' Jesús, en ruyúë' lënu, ate' rë'ë-nu:

—Butipa ládxi'u, zxí'ina'do'. Chiböácateu' tu' réajlë'u neda'.

La' ná'asö böácatënu.

²³ Cate' bidxinë' Jesús lidxë' bönni' unná bë' na', bilé'enë' nacu'ë ni' bönni' tu'cödxë' gui, en nupa ta'bödxí yechi'. ²⁴ Jesús rë' légaquië':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

²⁵ Cate' chinubéajë' Jesús bönnachi na' ní'ilö, guyázië', en gudélë'ë ná'abi' bi'i nigula na', ate' la' guyásatëbi'. ²⁶ Guzë didza' ca guca lë ni, ate' bila'yöni bönnachi nacuá' idútë luyú na'.

Jesús ruúnë' bönni' nachul-la guió'j lógaquië'

²⁷ Cate' Jesús burúajë' ni', chopë' bönni' nachul-la guió'j lógaquië' sōjácálenë' Lë'. Tu'ë zidzaj didza', ta'nnë':

—Zxí'ini xi'sóë' David, buéchi' ladxi' netu'.

²⁸ Cate' bidxinë' Jesús ga naca lu yu'u, bila'dxinë' chopë' bönni' na' nachul-la guió'j lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

²⁹ Ní'irö Jesús gudanë' guió'j lógaquië', ate' rnnë':

—Ca réajlë'ëli', ca' gaca queé'li'.

³⁰ La' böáljatë guió'j lógaquië'. Ní'irö Jesús buzenë' bach légaquië', rnnë':

—Guli'güí'itica'sö ládxi'li' cuntú nu inözi lë ni.

³¹ Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

Jesús ruúnē' tu bönni' biti' ru'ë didza'

³² Cate' Jesús, en yugu' bönni' usëda queë' bulu'ruájë' tu lu yu'u, bila'dxinë' bönni' ga zoë' Jesús naché'gaquië' lahuë' tu bönni' biti' ru'ë didza', tu' yu'u lë' bö' xihui'. ³³ Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'bánnë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

³⁴ Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

Jesús ruhuéchi' ládxë'ë bönachi zían

³⁵ Gudë' Jesús idú gásibi'ilö gapa nacuá' yödzö zxön, en gapa nacuá' yödzödo', ate' gapa naca lu yu'u ga tu'dubë' tu'sedë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí'i ta'zaca' yugu' lu yödzö na'. ³⁶ Cate' Jesús bilé'enë' bönni' zían ni', buéchi' ládxë'ë légaquië', tu' ta'guí'i ta'záquië', en nudú ládxi'gaquië' ca raca quégacaba' bö'cu' zxila' biti' zoa nu ruyú légacaba'. ³⁷ Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. ³⁸ Que lë ni na', guli'gáta'yu lahuë' Dios, náquië' Xan yöla na', inábili'-në' isól-lë'ë bönni' huen dxin ulu'lapë' yöla queë'.

Jesús riböë' bönni' ilácagaquië' gubáz queë'

(Mr. 3:13-19; Lc. 6:12-16)

10 ¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'únë' yúgu'të nupa te'e, en yúgu'të nupa bi ta'guí'i ta'zaca'.

² Caní naca lágaquië' idxínnutë' gubáz na' nasól-lë'ë Jesús:

Simón, (lë' ca' Pedro),

Andrés, (bóchë'ë Simón na'),

Jacobo, (zxí'inë' Zebedeo),

Juan, (bóchë'ë Jacobo na'),

³ Felipe, Bartolomé, Tomás,

Mateo, (bönni' uquízxaj),

Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ruí'i ládxë'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilútië'

Lë').

Jesús risól-lè'ë gubáz queë' tsöjéngaquië' libán

(Mr. 6:7-13; Lc. 9:1-6)

⁵ Ní'irö Jesús gusól-lè'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacuá' bönachi biti' nácagaca judío, en biti' tsú'uli' ládzagaca bönachi nacuá' luyú Samaria. ⁶ Guli'tséaj ga nacuá' bönachi Israel, nácagaquië' ca bö'cu' zxíla'do' nanítigacaba'. ⁷ Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bē'ë luyú ni." ⁸ Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queëli' yöl-la' unná bē' ni. Buli'gún dxin le, en biti' bi uquízxjali'.

⁹ 'Biti' bi guá'ali' lu buzudi queëli', calëga dumí oro, en calëga dumí plata, en calëga dumí lásido'. ¹⁰ Biti' guá'ali' yöxaj yöta queëli' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queëli', tu' idzöli quézinë' bönni' huen dxin le gahuë'.

¹¹ 'Gáti'tës yödzö zxön o yódzödo' ga idxinli', guli'naba nuzxi naca idú ladxi' lu yödzö ni', ate' ugá'anali' lidxi nu na' cate' gála'rö dza urúajli' yödzö na'. ¹² Cate' tsú'uli' tu lu yu'u, buli'gapa Dios bönachi nacuá' lu yu'u na', inábili'-në' Dios unödzjë' quégaquië' le cuéqui dxi icja ládxi'do'gaquië'. ¹³ Channö bönachi nacuá' lu yu'u ni' nácagaca lesaca', ugá'analen le ribequi dxi ladxi' na' léguequi, pero channö bönachi na' cabí nácagaca lesaca', inábali' cabí ugá'ana lë na' ribequi dxi ladxi' len léguequi. ¹⁴ Gáti'tës ga idxinli' ga bönachi ni' biti' ilún libí'ili' bal, en biti' ulu'zé nagui xtídza'li', buli'rúaj lu yu'u ni' o yödzö ni', ate' guli'cuíbi bëchtö da' lë'e lábali', le ulu'í' léguequi nabága'gaca xíguia'.

¹⁵ Le nácatë rea' libí'ili', cate' idxín dza ichúguië' Dios quégaca bönachi, ila'guí'i ila'záca'rö bönachi yödzö na' ca ila'guí'i ila'záca' bönachi gula'cuá' yödzö Sodoma, en yödzö Gomorra, nupa ni' busunítië' Dios.

Nupa biti' ta'yéajlë' ulu'saca' zi' nupa dá'gaca Cristo

¹⁶ Gunnë' ca' Jesús:

—Buli'yútsöca', neda' risól-la'a libí'ili', ate' gácali' ca bö'cu' zxíla'do' ta'daba' ga dzó'öba' bö'cu' guí'a sínia'. Guli'gaca sina' ca nácagacaba' sina' bëla sínia', pero guli'gaca ca' nöxaj ladxi' ca nácagacaba' gu'dödo'.

¹⁷ Guli'gún chi'i cuinli' quégaca bönachi, tu' ulu'dödë' libí'ili' lu ná'agaquië' bönni' yúlahui', en ila'guínë' libí'ili' gapa naca lu yu'u ga tu'dübë' tu'sëdë' bönni' judío queë' Dios. ¹⁸ Lësca' caní, ila'ché'ë libí'ili' lógaquië' bönni' lo, en lógaquië' bönni' ta'nná bē'ë, tu' dá'ali' neda'.

Caní gaca para gaca gunli' ba nalí quia' lógaquië' bönni' ni', en lógaquië' bönni' biti' nácagaquië' judío. ¹⁹ Ní'irö cate' ulu'dödë' libí'ili' lu ná'agaquië' bönni' unná bē' na', biti' có'öli' böniga nacxi innali', tu'

ichizë' Dios icja ládxi'do'oli' didza' güí'ili', en ca innali' la' dza ná'asö.

²⁰ Calëga libí'isili' na' innali', pero Dios Bö' Lá'ayi, Nu na' risól-lë'ë Xúziru' Dios queé'li', Lë cazë' sóalenë' libí'ili', en gu'ë didza'.

²¹ 'Ila'cuá' bönachi ulu'dödi bóchi'guequi lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' zxí'inigaquië', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'. ²² Yúgu'të bönachi ulu'zóa libí'ili' tsölá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá. ²³ Cate' ulu'saca' zi' bönachi libí'ili' tu lu yödzo, buli'zxunnaj ni', ate' tséajli' ia'tú yödzo, tu' rea' libí'ili', huöda' neda', Bönni' Guljë' Bönachi, zí'alö cate' údxi gunli' libán gapa nacuá' yugu' yödzo quégaca bönachi Israel.

²⁴ 'Núti'tës bönni' náquië' bönni' usëda biti' nácarë' lo ca nu rusëdi lë', en lësca' caní, nu bönni' náquië' huen dxin biti' nácarë' lo ca xanë'.

²⁵ Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

Nu ral-la' gádxiru'

(Lc. 12:2-9)

²⁶ Gunnë' ca' Jesús:

—Que lë ni na', biti' gádxili' bönachi. Hualá' lahui yúgu'të le raca bëdxi lándos, ate' huáca bë' yúgu'të le nagachi'. ²⁷ Yugu' didza' ruí'ilena' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nnë' zidzaj ga naca lahui' lógaca bönachi. ²⁸ Biti' gádxili' nupa tuti le nácagaca caz bönachi, pero biti' gaca ulu'suniti bö' naca cázaru'. Guli'gadx Dios, Bönni' na' gaca gútië' idútë le nácali', en chú'unë' bö' naca cázali' lu guí' gabila.

²⁹ 'Ta'dá'uba' chópaba' biguínido' len tu dumí lásido', pero biti' ibíxiba' tuba' lu yu channö cabí ru'ë Xúziru' Dios lataj gaca caní.

³⁰ Lësca' caní, nabábagaca yúgu'të guitsa' ícjali' lahuë' Dios. ³¹ Que lë ni na', biti' gádxili'. Ruí'itëro ládxi'ë Dios libí'ili' ca ruí'i ládxi'ë-ba' zianba' biguínido'.

Yugu' bönni' ta'zí' lu ná'agaquië' Cristo lógaca bönachi

(Lc. 12:8-9)

³² Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá. ³³ Bönni' ta'dá'baguë'ë lógaca bönachi, ila'nnë' biti' ta'dé'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

Jesús náquië' le run ga ila'ruáj choplö bönachi

(Lc. 12:51-53; 14:26-27)

³⁴ Gunné' ca' Jesús:

—Biti' guéquili' za'a idigu'a le ribequi dxi bönachi yödzölió ni. Biti' za'a idigu'a le ribequi dxi, pero za'a idigu'a le gun ga ila'ruáj choplö bönachi. ³⁵ Za'a ni, ate' guna' ga ila'dá'baga' bönachi xúzuguequi, ate' yugu' nigula ila'dá'baga'nu ca' xiná'agacanú. Lësca' caní, yugu' nigula zxoá' lídxigacanú ila'dá'baga'nu xto' zxí'ininu. ³⁶ Caní gaca, la' di'a dzasö quégaca bönachi ulu'saca' zi' luzé'eguequi.

³⁷ Nu nadxí'irö xuz xinë'e ca nadxí'i neda', bití' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', bití' naca bachi nu na' ta' neda'. ³⁸ Nu bití' si' lu në'e gaca ca tu bönni' sôjté'ë lë'e yaga cruz, en ta' neda', bití' naca bachi guequi quia' neda'. ³⁹ Nu ruí'i ladxi' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'

(Mr. 9:41)

⁴⁰ Gunné' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasól-lë'ë neda'. ⁴¹ Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'. ⁴² Núti'tës nu unödzej queë' tu bónni'do' ni tu zxibíndo'os nisa tu' náquië' bönni' usëda quia' neda', le nácatë rea' libí'ili', bití' uniti nu na' le ral-la' si' lu në'ë Dios.

Ta'dxinë' bönni' nasól-lë'ë Juan ga zoë' Jesús

(Lc. 7:18-35)

11 ¹ Cate' Jesús budxi buzéajni'inë' yugu' bönni' usëda queë', buzé'ë ni', sa'yéajë' röjsédinë' bönachi, en röjenë' libán yugu' lu ládizagaca bönachi na'.

² Juan, bönni' buquilë' bönachi nisa, ni' yu'ë lidxi guíë, ate' biyönnë' ca nácagaca le runë' Jesús. Ní'irö Juan na' gusól-lë'ë chopë' bönni' dá'gaquië' lë', ate' bila'dxinë' ga na' zoë' Jesús. ³ Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzölió ni, o ral-la' cöztu' dza idxinë' ia'túë' bönni'?

⁴ Bubi'ë didza' Jesús, rë' légaquië':

—Guli'tséaj tsöjtíxjöi'ili'-në' Juan lë ni riyónili', en rilé'eli'.

⁵ Guli'tsöjödxe' ca raca, tu'lé'enë' bönni' guchul-la guió'j lógaquië', ate'

tu'zé'ë bönni' biti' guca ila'dé'. Nuhuöácagaquië' bönni' güi'iguequinë' huë' nudzu' ruzödi, ate' ta'yönnë' bönni' gula'códzuë'. Nnita' nabángaqueië' bönni' gulátië', ate' raca libán que didza' dxi'a lógaca bönachi yechi'. ⁶ Bica' ba nu bönni' biti' gáquië' chopá láchxë'ë, biti' ubéaj láchxë'ë neda'.

⁷ Cate' yugu' bönni' na' dá'gaquië' Juan bulu'zé'ë sōjhuōjgaquië', ní'irō gusí lahuë' Jesús ruí'ilenë' bönachi nacuá' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asō? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le? ⁸ Channō cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado'? Nöz quézili' bönni' nácugaquië' lari' dxí'ado' nacu'ë lédxigaquië' bönni' ta'nná bë'ë. ⁹ Channō cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatërë' lo ca ia'zícá'rë' bönni' gulu'ë didza' uláz queë' Dios. ¹⁰ Caní naca, tu' náquië' Juan bönni' na' ruí'i didza' le nazúaj lu guichi lá'ayi ca naca queë', le rnna:

Buyú, risól-la'a bönni' gubáz quia', inóruë' ca Li'.

Lë' upé'ë nōza ga tödu'.

¹¹ Le nácatë rea' libí'ili'. Idútë yödzölió ni, cuntú nu zoa nácarō lo ca Juan, bönni' ni' buquilë' bönachi nisa, pero nu naca cuídi'do'os ga rinná bë' Nu na' zoa yehua' yubá nácatërō lo ca Juan na'.

¹² 'Cate' ni' gusí lahuë' buquilë' Juan bönachi nisa, ga ridxintë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsō bayudxi ta'deli' le. ¹³ Ga bidxintë dza na' blë'ë Juan, le rinná bë' xibá queë' Moisés, en le bulu'zúajë' lu guichi yúgu'të bönni' gulu'ë didza' uláz queë' Dios guluí'i didza' ca rinná bë'ë Bönni' na' zoë' yehua' yubá. ¹⁴ Channō ré'ënili' si' lu ná'ali' lë ni, ral-la' inózili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunné' ral-la' ilá' lahuë' leyúbölö dza ni zóaru' na'a.

¹⁵ Nu zoa nagui, en riyōni ral-la' uzé nagui.

¹⁶ '¿Bizxi ubéqui'tseda' ca nácagaca bönachi nacuá' dza ni zóaru' na'a? Nácagaquië' ca yugu' bí'ido' ta'bó'öbi' lu yé'ëyi. Zidzaj tu'lídzabi' luzá'agacabi', ¹⁷ ta'nnabi': "Rucódxitu' queéli' gui. ¿Bizx que biti' ruyá'ali'? Rul-la yéchi'tu' queéli'. ¿Bizx que biti' ribödxí yéchi'li'?"

¹⁸ Caní nácali', tu' bidë' Juan, ate' tu' cabí güi'i gudahuë' ca ráguli' libí'ili', gunnéli' queë', gunnali': "Tu' xihui' dzágui lë'." ¹⁹ Ní'irō bidxina' neda', Bönni' Guljë' Bönachi, ate' re'aj rahua', ate' rnnëli' quia', rnnali': "Náquië' bönni' huágulë'ë, en bönni' reljë'. Náquië' luzá'agaquië' bönni' uquízxaj, en ia'zícá'rö huen dul-la'." Yöl-la' réajni'i queë' Dios naca bë' ni'a que le tun nupa ta'zí' lu né'eguequi le.

Le gaca que nu bití' run ca rnna xtídzë'ë Dios

(Lc. 10:13-15)

²⁰ Ní'irö gusí lahuë' Jesús ruzenë' bach bönachi nacuá' yugu' yödzö gapa ni' benë' zían yöl-la' huáca, tu' cabí tu'bí'ini ládxi'guequi.

²¹ Gudxë' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'tëlö ulu'bí'i ládxi'gaca bönachi yödzö Tiro, en yödzö Sidón na', en ilácugaca lari' tēbi, en ulu'dxía dö ícjaguequi, le ulu'luí'i tu'bí'i ládxi'gaca bönachi na'. ²² Na'a, neda' rea' libí'ili', cate' idxín dza ichúguië' Dios quégaca bönachi, quí'i sáca'röli' libí'ili' ca ila'guí'i ila'zaca' bönachi yödzö Tiro, en yödzö Sidón, nupa na' busunítië' Dios. ²³ Libí'ili', bönachi Capernaum, guca queé'li' ca bidxíntēli' ga nu riyaza yehua' yubá. Huótjali' lu guí' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintē na'a dza. ²⁴ Na'a, neda' rea' libí'ili', cate' idxín dza ichúguië' Dios quégaca bönachi, quí'i sáca'röli' libí'ili' ca ila'guí'i ila'zaca' bönachi Sodoma na'.

Rnnë' Jesús: “Guli'dá ga zoa', uzí' ládxi'li”

(Lc. 10:21-22)

²⁵ Dza na' bē'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lē ni, para cabí ila'lé'enë' bönni' ta'yéajni'ide'enë' le, pero buluí'inu' nupa nácagaca ca yugu' bí'ido' le. ²⁶ Ca' gaca, Xuza', tu' caní guyaza ládxu'u Li'. ²⁷ Yúgu'tē nudödë' Xuza' lu na'a. Cuntu nu nunbë' neda', Zxí'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Zxí'inë' Dios, enca' nupa na' ré'ēnda' ulu'í'ida' léguequi Dios Xuz. ²⁸ Guli'dá ga zoa' yúgu'tēli' röjxéqui'li' tu' rúntica'sili' dxin que yöl-la' yudo', en nuá'ali' yua' zi'i quégaca xibá que, ate' neda' guna' ga uzí' ládxi'li'. ²⁹ Lu yöl-la' nōxaj ladxi' queé'li' guli'gún xichina', gácali' ca bēdxi ta'zí'iba' yugu' quégacaba'. Guli'sēda lu na'a neda', tu' naca' nōxaj ladxi', en do' ladxi', ate' idzöli yöl-la' ruzí' ladxi' queé'li', le cuéqui dxi ládxi'li'. ³⁰ Yugu' na' ugu'a libí'ili', le naca le inná bé'eda' libí'ili', bití' naca böniga, ate' yua' ugu'a libí'ili' le naca le rusédida', dzá'do'os naca.

Ta'lecjē' do bönni' usēda queë' Jesús dza lá'ayi

(Mr. 2:23-28; Lc. 6:1-5)

12 ¹ Dza ni', le naca dza lá'ayi quégaquië' bönni' judío, gudödë' Jesús gapa dē yōla zxoá' xtila, ate' ta'dunë' bönni' usēda queë',

en gusí lógaquië' ta'lecjè' do ga dxía zxaa' xtila, en tahuë' zxaa' xtila na'. ² Cate' bila'lé'enë' bönni' yudo' fariseo lë ni, të' Jesús:

—Buyútsöca', tunë' bönni' usëda quiu' le cabí ral-la' gunru' dza lá'ayi.

³ Ní'irö Jesús gudxë' légaquië':

—¿Naru' cabí nulábanili' lu guichi lá'ayi bi benë' David cate' gudunë', ate' gula'dún ca' nupa gula'cuá'len lë'? ⁴ Guyu'ë lu yu'u queë' Dios, en gudahuë' yugu' yöta xtila nagú'ugaquië' lu bucugu lá'ayi, le cabí ral-la' gahuë' lë', en biti' ral-la' ilahuë' bönni' gula'cuá'lenë' lë', pero légacsë' bixúz dë lataj ilahuë' le. ⁵ ¿Naru' cabí nulábanili' le rinná bë' xibá queë' Moisés ca tunë' bixúz yugu' dza lá'ayi? Tunë' dxin lö'a yudo' yugu' dza lá'ayi, en biti' ta'báguë'ë xíguia'. ⁶ Na'a, neda' rea' libí'ili', zoa' neda' ni, en naca' bönni' nácarë' lo ca yudo'. ⁷ Biti' réajni'ili' lë na' nazúaj lu guichi lá'ayi, le rnna: “Ré'ënda' huéchi' ládxi'li' luzá'ali', en calëga gútigacali'-ba' böa' bédxido' ruzégui'gacali'-ba' lu bucugu lá'ayi quia'.” La'tu' réajni'ili' lë ni, biti' ichúguli' quégaca nupa biti' nabága'gaca xíguia'. ⁸ Ca' naca, tu' naca' neda', Bönni' Guljè' Bönachi, Xani dza lá'ayi.

Jesús ruúnë' tu bönni' narequi' në'ë

(Mr. 3:1-6; Lc. 6:6-11)

⁹ Ní'irö buzé'ë Jesús ni', ate' guyu'ë lu yu'u ga tu'dubë' bönni' judío, en tu'sëdë' queë' Dios. ¹⁰ Lu yu'u na' zoë' tu bönni' narequi' në'ë, ate' tu' té'ënnë' bönni' judío unná bë' ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

¹¹ Bubi'ë didza' Jesús, rë' légaquië':

—Nu bönni' nútsë'ë ladjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'? ¹² Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

¹³ Ní'irö Jesús gudxë' bönni' huë' na':

—Bulí no'o.

Cate' bulí në'ë, la' böácatë dxi'a ca naca ia'tsölá'a në'ë.

¹⁴ Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

Le gunné' tu bönni' bë'ë didza' uláz queë'

Dios ca ral-la' gaca queë' Jesús

¹⁵ Cate' réquibe'enë' Jesús lë ni, buzé'ë ni', ate' sōjácálen bönachi zían Lë'. Jesús bunë' yúgu'të nupa te'e ladaj bönachi na', ¹⁶ en gunná bé'enë' léguequi biti' usiyónguequi bönachi Nu náquië'. ¹⁷ Caní gunné', para gaca lë na' gunné' Isaías, bönni' bë'ë didza' uláz queë' Dios, gunné':

¹⁸ Buli'yútsöca', Bönni' ni náquië' Huen Dxin quia',
na' guró caza' neda' Lë'.
Nadxí'ida' Lë', en raza ládxa'a Lë'.
Ichiza' Lë' Bö' Lá'ayi.
Lë' usiyönnë' yúgu'të bönachi ca guna',
uchi'a usöröa' quéguequi.

¹⁹ Cuntu nu tíl-lalenë' didza', en biti' ulidzë' zidzaj.
Cuntu nu yöni chi'ë ga naca zi'tu'.

²⁰ Tu guído' zoa bö biti' quitsjë' le,
ate' guí' chizóa ulu, biti' usúluë' le,
cate' uzóarë' le naca tsahui' queë'.

²¹ Yúgu'të bönachi ilún löza Lë'.

Ta'nnë' bönni' judío unná bë': "Dzaga Jesús tu' xihui'"

(Mr. 3:19-30; Lc. 11:14-23; 12:10)

²² Ní'irö dujuá'gaquië' tu bönni' ga zoë' Jesús, nachul-la lahuë', en
biti' raca gu'ë didza', tu' yu'u bö' xihui' lë', ate' Jesús bunë' bönni' na'.
Caní guca, rilé'enë', en ru'ë didza' bönni' na' guchul-la lahuë', en biti'
guca gu'ë didza'. ²³ Que lë ni na' bulu'bani yúgu'të bönachi nacuá' ni',
ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la'
guidé'?

²⁴ Cate' bila'yönnë' bönni' yudo' fariseo lë ni, ta'zá' ládxe'ë, ta'nnë':
Bönni' ni rubéajë' yugu' bö' xihui' tu' dzaga Beelzebú tu' xihui', xángaca
bö' xihui', Lë'.

²⁵ Réquibe'enë' Jesús lë na' ta'zá' ládxi'gaquië', ate' rë' légaquië':

—Gáti'tës ga ta'nná bë' bönachi, channö bönachi ni' ila'ruáj choplö,
en ila'díl-lalen luzé'eguequi, initi yöl-la' unná bë' quéguequi. Lësca'
caní, channö ila'ruáj choplö bönachi nacuá' tu yödzö o tu yu'u, en
ila'dil-la, biti' gaca ila'día' bönachi nacuá' yödzö na' o yu'u na'. ²⁶ Lësca'
caní, channö ubéaj Satanás tu' xihui' la' luzé'esö, ate' yugu' bö' xihui'
na' ila'díl-lalen la' léguequisö, ¿naru' idía' yöl-la' unná bë' que tu'
xihui'? ²⁷ Rnnali' quia' rubéaja' yugu' bö' xihui' tu' dzaga Beelzebú tu'
xihui' neda'. Channö runa' caní, ¿nuzxi dzaga nupa dá'gaca libí'ili' cate'
tu'béaj yugu' bö' xihui'? Que lë ni na' le túngaca caz naca bë' nachíxili'.
²⁸ Na'a, channö neda' rubéaja' yugu' bö' xihui' tu' zóalen yöl-la' huáca
queë' Dios Bö' Lá'ayi neda', le nácate chibidxín le rinná bë'ë Dios ga
zóali'.

²⁹ ¿Naru' huácatsö nu bönni' tsu'ë lidxë' bönni' nal-la, en cuéajë' yöl-
la' tsahui' dzö'ö lidxë' channö cabí gúguë'ë bönni' nal-la na' zí'alö?
Ní'irö gaca tsu'ë, en ulatjë' lidxë' bönni' nal-la na'.

³⁰ Nu biti' run neda' tsözxón, ridá'baga' neda', en nu biti' rutubi
tsözxón len neda', rusilasi nu na'.

³¹ 'Que læ ni na' rea' libí'ili', ca naca yúgu'tè dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' inné zi'è queë' Dios Bö' Lá'ayi, bití' ca' uniti lahuë' Dios læ'. ³² Lësca' caní, nu bönni' inné' quia' neda', Bönni' Guljè' Bönachi, Dios uniti lahuë' læ', pero nu bönni' inné' queë' Dios Bö' Lá'ayi, bití' ca' uniti lahuë' Dios læ'. Bití' uniti lahuë' læ' dza ni zóaru' na'a, en bití' uniti lahuë' læ' dza si' za'.

Le runru' naca bë' le nácaru'

(Mt. 7:15-20; Lc. 6:43-45)

³³ Gunné' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'. ³⁴ Libí'ili' nácali' di'a dza quégacaba' bëla sínia'. ¿Nacxi gaca güí'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tuí'i didza'. ³⁵ Tu bönni' tsahui' ru'è didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'è didza' bití' naca tsahui' tu' yu'u le cabí naca tsahui' icja ládxi'da'ahuë'. ³⁶ Que læ ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'tè didza' gula'nnazë' ca'. ³⁷ Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

Ta'nábinë' Jesús gunë' le gaca bë' nu náquië'

(Mr. 8:12; Lc. 11:29-32)

³⁸ Ní'irö bulu'bi'è didza' yugu' bönni' yudo' fariseo, en yugu' bönni' yudo' tu'sédinë', en të' Jesús:

—Bönni' Usedi, ré'ënitú' ilé'etu' tu le gunu' le gaca bë' dë lu no'o yöl-la' unná bë'.

³⁹ Bubi'è didza' Jesús, en rë' légaquië':

—Yugu' bönni' tuá' dö' ni, bití' zoa idú ládxi'do'gaquië', ta'nábinë' neda' guna' tu le gaca bë' nu naca'. Bití' bi le gaca bë' ila'lé'enë', pero le naca bë'sö na' ca guca queë' Jonás, bönni' bë'è didza' uláz queë' Dios.

⁴⁰ Ca na' guca queë' Jonás na', bugá'anë' lé'ëba' tu böla zxön idú tsonna dza tsonna yëla, lësca' caní gaca quia' neda', Bönni' Guljè' Bönachi, tsonna dza tsonna yëla ugá'ana' zxan yu. ⁴¹ Ila'yasë' bönni' gula'cu'ë yödzö Nínive dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le gulunë' usubaga' bönachi ni xíguia' tu' bulu'bí'i ládxi'gaquië' bönni' Nínive na' cate' ni' busiyönnë' Jonás légaquië' xtídzë'è Dios, ate' na'a zoa' ni neda', en nácatëra' lo ca Jonás na'. ⁴² Lësca' caní, nigula ni' gunná bé'enu yödzö dë saca' ga ridödi gubidza beo' ziaga chásanu dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le bennu

usubaga' légaquië' xíguia', tu' birúajnu nigula na' ga nácatërö zi'tu' para yóninu didza' réajni'i bë'ë Salomón, ate' na'a zoa' ni neda', en nácatëra' lo ca Salomón na'.

Cate' rudxín tu bö' xihui' xilataj

(Lc. 11:24-26)

⁴³ Gunné' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguila'j ga uzí' ladxi'. Channö cabí idzöli ga na' uzí' ladxi', ⁴⁴ ní'irö inná: “Huöja' xilatja' ga ni' birúaja'.” Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsó'a ni'.

⁴⁵ Ní'irö tseaj, tsöjzxi' ia'gadxi bö' xihui' nácatëratërö xihui' ca le, ate' ila'yaza yúgu'të, en ila'cuá' icja ládixida'ahuë' bönni' na', ate' ga údxi huayáli'tërö ca gaca queë' bönni' na' ca guca queë' zí'alö. Lësca' caní gaca quégaca bönachi tuá' dö' ni.

Xiné'ë Jesús, en yugu' bönni' bóchë'ë

(Mr. 3:31-35; Lc. 8:19-21)

⁴⁶ Cate' ni' ruí'ilenë' Jesús bönachi didza' ni, xiné'ë, en yugu' bönni' bóchë'ë bila'dxinë' ni'. Gula'cu'ë ló'alö, en gulé'ë'niguequinë' ilu'í'ilenë' Jesús didza'. ⁴⁷ Ní'irö tu bönni' busiyönnë' Jesús, en rë' Lë':

—Buyútsöca', nacu'ë xinó'o, en yugu' bönni' bóchu'u ló'alö, en té'ënnë' ilu'í'ilenë' Li' didza'.

⁴⁸ Bubi'ë didza' Jesús, en rë' bönni' na' busiyönnë' Lë' caní, rnnë':

—¿Nózili' nuzxi caz xiná'a, en nupxi caz bönni' bócha'a?

⁴⁹ Ní'irö bulí në'ë, en bulu'e yugu' bönni' usëda queë', en rnnë':

—Buli'yútsöca', bönni' ni nácatëra' ca xiná' caza', en yugu' böchi' caza'. ⁵⁰ Núti'tës nu run ca ré'ëni quézinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

Rucúdzü'ë didza' Jesús ca naca queë' tu bönni' guz

(Mr. 4:1-9; Lc. 8:4-8)

13 ¹ La' dza ní'isö birúajë' Jesús niu' yu'u, ate' yöjchö'ë ra' nísado'. ² Tu' bila'dxín bönachi zían ga zoë' Jesús, gurenë' tu lë'e bárcodo', en gurö'ë ni', ate' bönachi zían na' gula'cuá' luyú bidxi ra' nísado' na'. ³ Ní'irö Jesús bé'lenë' légaquië' didza', zían le busédinë' légaquië'. Bucúdzü'ë didza', rnnë':

—Buli'yútsöca', birúajë' tu bönni' guz, sōjésië' xisedo'. ⁴ Tsanni ni' sōjésië', bal-la xisedo' na' gulasí ra' nöza, ate' bila'dxinba' biguinnido', en gulé'ajba' xisedo' na'. ⁵ Gulasí ia'zica'rö xisedo' na' luyú ga rö'ö guió'j, ga na' rö'ö láti'sö yu, ate' la' gula'lentë, tu' cabí rö'öda' yu ni'.

⁶ Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí. ⁷ Gula'lén ia'zica'rö xisedo' na' ga

bulu'lén lubá yötsi', ate' gula'zxón lubá yötsi' na', en bila'röli læ na' bēsiē', en gulún ditaj le. ⁸ Gulasi ia'zícá'rö xisedo' na' ga naca luyú bēbu, ate' bulu'nödzej. Bal-la læ na' bēsiē' bulu'nödzej ia'tú gayuá'tērö ca'. Ia'zícá'rö bulu'nödzej ia'tsónnalalaj ca', ate' ia'zícá'rö bulu'nödzej ia'chí uruá' ca'. ⁹ Nu zoa nagui, en riyöni, ral-la' uzé nagui.

Le té'ëni ilún le bucúdzu'ë Jesús didza'

(Mr. 4:10-12; Lc. 8:9-10)

¹⁰ Ní'irö bila'dxinē' bönni' usēda queē' Jesús ga zoē', en gula'nábinē' Lē', ta'nnē':

—¿Bizx que ruí'ilenu' bönachi didza' yugu' le rucúdzu'u didza'?

¹¹ Bubi'ë didza' Jesús, en rē' légaquiē':

—Dios ru'ë libí'ili' lataj tséajni'ili' le nagachi' ca rinná bē'ë Lē' yehua' yubá, pero bönachi ni biti' té'ëni ila'yéajni'i. ¹² Nu si' xtídzē'ë, Dios unödzjē' que ia'lati', ate' gáta'da'arö que, pero nu biti' si' le, la's dui le dē que udúa. ¹³ Que læ ni na' ruí'ilena' légaquiē' didza' yugu' le rucúdzu'a didza', tu' tu'yúē' pero biti' ta'lé'enē'. Ta'yönnē' pero biti' tu'zé nágagaquiē', en biti' ta'yéajni'inē'. ¹⁴ Caní raca quégaquiē' para gaca ca na' gunné' Isaías, bönni' bē'ë didza' uláz queē' Dios, gunné':

Le nácatē yónili' pero biti' tséajni'ili'.

Uyuli' iná'ali' pero biti' ilé'eli'.

¹⁵ Caní raca tu' nazidi ládxi'do'gaca bönni' ni,

en biti' bi riyaza icja nágagaquiē'.

Nadzudi' guiój lógaquiē',

para cabí ila'lé'enē' len guiój lógaquiē' na'.

Biti' ulu'zé nágagaquiē',

en biti' ulu'zéajni'i ládxi'gaquiē',

en biti' ulu'huóáquiē' quia' neda'

para gaca una' légaquiē'.

¹⁶ 'Na'a, bica' ba libí'ili', tu' rilé'e guiój loli', en riyöni nágali'. ¹⁷ Le nácatē rea' libí'ili', zían bönni' gulu'ë didza' uláz queē' Dios en yugu' bönni' tsahui' gulé'ënnē' ila'lé'enē' le rilé'eli' libí'ili' pero biti' bila'lé'enē' le. Gulé'ënnē' ila'yönnē' le riyónili' libí'ili' pero biti' bila'yönnē' le.

Riguíxjö'ë Jesús le bucúdzu'ë didza'

(Mr. 4:13-20; Lc. 8:11-15)

¹⁸ Gunné' ca' Jesús:

—Buli'zé nágali' ca naca le bucúdzu'a didza' que bönni' guz.

¹⁹ Núti'tēs nu riyöni didza' ca rinná bē'ë Dios yehua' yubá, en biti' réajni'i le, raca que didza' riyöni nu na' ca guca que xisedo' na' gulasi ra' nöza. La' za'tē tu' xihui', en rugúa didza' na' guyú'u icja ládxi'da'ahuē' bönni' na'. ²⁰ Xisedo' na' gulasi luyú ga rö'ö guiój ruluí'i

ca raca queë' bönni' riyönnë' didza' na', en la' ruzëtë náguië' lu yöl-la' rudzeja queë', ²¹ pero ca na' biti' ridía' xisedo' na' tu' cabí dë ga gun luí, lësca' caní raca queë' bönni' ni. Cate' idxín tu le usaca' zi' lë', ate' ila'bía ná'gaca bönachi lë' tu' nazí' lu në'ë didza' na', la' gácatë chopá ládxë'ë.

²² Xisedo' na' gulasi ga na' bulu'lén lubá yötsi' ruluí'i ca raca queë' bönni' na' riyönnë' didza' na', pero ruí'i ládxë'ë yugu' le dë yödzölió ni, ate' nazí' yë'ë bönni' na', tu' ruí'i ládxë'ë yugu' yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládxi'da'ahuë'.

²³ Xisedo' na' gulasi luyú bëbu ruluí'i ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahuë'. Nácgaca bal-la bönachi ca xisedo' na' bulu'nödzaj ia'tú gayuá'tërö ca'. Nácgaca ia'zícá'rö bönachi ca xisedo' na' bulu'nödzaj ia'tsónnalalaj ca', ate' nácgaca ia'zícá'rö bönachi ca xisedo' na' bulu'nödzaj ia'chí uruá' ca'.

Tu guíxi'do' cané le nalá' ca rilá' yöla zxoa' xtila

²⁴ Ia'tú le bucúdzu'ë didza' Jesús, ate' rë' légaquië':

—Ca gaca cate idxín ni le rinná bë'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyúë'. ²⁵ Tsanni na' tasië' bönni' nacu'ë lidxë', bidxín tu nu biti' rilé'e xan yu'u na' dxi'a, ate' yöjözä lu xiyúë' xisedo' guíxi'do' cané le nalá' ca naca yöla zxoa' xtila, ate' böaj xilataj. ²⁶ Cate' gulén zxoa' xtila na', en guró'ö do que, ga na' dxía xui'i, ní'irö gulaca bë' guíxi'do' cané na'. ²⁷ Ní'irö bila'dxinë' bönni' huen dxin ga zoë' bönni' xan la' yëla na', en të' lë': “Xan, channö guzu' xisedo' dxi'a lu yu quiu', ñnacxi guca gula'lén guíxi'do' cané na'?” ²⁸ Xan yu na' gudxë' légaquië', rnnë': “Tu bönni' biti' rilé'enë' neda' dxi'a benë' caní.” Ní'irö gula'nábinë' huen dxin queë' lë', ta'nnë': “¿Ba ré'ënu' tséajtu' tsöjólajtu' guíxi'do' cané na'?” ²⁹ Xángaquië' rë' légaquië': “iBiti' ca! Nadx ca' cate' iládzu'li' guíxi'do' cané na', iládzu'lentëli' ca' yöla zxoa' xtila. ³⁰ Gácarö dxi'a güí'ili' lataj ila'zxóngarö tsözxón cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' zxoa' xtila lu yu'u quia'.”

Rucúdzu'ë didza' Jesús ca naca que xisé mostaza

(Mr. 4:30-32; Lc. 13:18-19)

³¹ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá, gaca ca raca que tu xisé mostaza, le guzë' tu bönni' ga naca lu xiyúë'. ³² Le nácatë xisé mostaza na' nácatërö cuidi' ca yúgu'të xisedo' ia'zícá'rö, pero cate' chinadúz, rizxóntërö ca yúgu'të guixi' cuan, en rizxón ca naca tu yaga, ate' ta'dxinba' biguínido', en tunba' xicá'agacaba' lu ni'a në'e.

Rucúdzu'ë didza' Jesús que cúa zi que yöta xtila

(Lc. 13:20-21)

³³ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjza zxoa' xtila, ate' guyazxa idútë cúa na'.

Le ré'ëni gun le rucúdzu'ë didza' Jesús

(Mr. 4:33-34)

³⁴ Yúgu'të læ ni bucúdzu'ë didza' Jesús, le bé'lenë' bönachi nacuá' ni' didza', en bití' bi didza' bé'lenë' légaquië' le cabí bucúdzu'ë didza'.

³⁵ Caní benë' para gaca læ na' buzúajë' lu guichi tu bönni' bë'ë didza' uláz queë' Dios, gunné':

Gu'a didza' yugu' le ucúdzu'a didza'.

Innía' yugu' le nagachi' cate' ni' gusí lo si' guta' yödzölió.

Rigúíxjö'ë Jesús le bucúdzu'ë didza' que guíxi'do' cané

³⁶ Ní'irö buzenë' Jesús bönachi nacuá' ni' didza', en gusól-lë'ë légaquië', ate' guyu'ë yu'u. Ní'irö bila'dxinë' bönni' usëda queë' ga zoë', en të' Lë':

—Gudíxjöi'i netu' le ré'ëni inná læ na' bucúdzu'u didza' que guíxi'do' cané le nalá' ca naca yöla zxoa' xtila.

³⁷ Bubi'ë didza' Jesús, ate' rë' légaquië':

—Bönni' razë' xisedo' dxi'a naca' neda', Bönni' Guljë' Bönachi. ³⁸ La' yëla na' naca yödzölió ni, ate' xisedo' dxi'a na' tu'luí'i ca nácagaca nupa nabábagaca ga rinná bë'ë Dios. Guíxi'do' cané na' le nalá' ca naca yöla zxoa' xtila tu'luí'i ca nácagaca nupa néquiquequi que tu' xihui'. ³⁹ Nu na' bití' rilé'e dxi'a xan la' yëla na', en yöjza guíxi'do' cané na', tu' xihui' caz naca. Dza ulu'tubë' na' ruluí'i ca gaca dza údxi que yödzölió ni, ate' nupa na' tu'tubi nácagaca gubáz lá'ayi queë' Dios. ⁴⁰ Ca na' guca, bulu'tubë' guíxi'do' cané na', en bulu'zégui'ë le lu guí', lësca' caní gaca cate' údxi que yödzölió ni. ⁴¹ Neda', Bönni' Guljë' Bönachi, isól-la'gaca-në' gubáz lá'ayi quia', ate' ulu'béajë' ga rinná bë'ë Dios yúgu'të nupa tun ga tun dul-la' luzé'eguequi, enca' nupa tuá' dö'. ⁴² Yugu' gubáz lá'ayi na' ila'gu'ë bönni' tuá' dö' na' lu guí' gabila. Ni' ila'bödxë', en ulu'tíl-la láyi'gaquië'. ⁴³ Ní'irö ila'yëpi yösa bení' bönachi tsahui', en ilácagaquië' ca gubidza ga ni' rinná bë'ë Dios yehua' yubá. Nu zoa nagui, en riyöni ral-la' uzë nagui.

Rucúdzu'ë didza' Jesús que tu yöl-la' tsahui' nagachi'

⁴⁴ Lësca' caní bucúdzu'ë didza' Jesús, rnnë':

—Le rinná bë'ë Dios yehua' yubá naca ca tu yöl-la' tsahui' nagachi' tu la' yëla. Cate' bidzölinë' tu bönni' le, bucáchë'ë le leyúbölö ga na' bigachi', ate' lu yöl-la' rudzeja queë' guyijë', yöjëti'ë yúgu'të le dë queë' ate' gú'uë' la' yëla na' para gata' yöl-la' tsahui' na' queë'.

Rucúdzu'ë didza' Jesús que tu bugá le nazáca'da'

⁴⁵ Gunnë' ca' Jesús:

—Ca ral-la' së ládxi'li' le rinná bë'ë Dios yehua' yubá naca ca benë' tu bönni' rá'uë', en ruúti'ë, en riguiljë' bugá nazáca'gaca. ⁴⁶ Cate' bidzölinë' tu bugá le nazáca'da', guyijë', yöjëti'ë yúgu'të le dë queë', ate' gú'uë' bugá na'.

Rucúdzu'ë didza' Jesús que tu yöxaj böla

⁴⁷ Lësca' caní gunnë' Jesús:

—Ca gaca ga ridxín le rinná bë'ë Dios yehua' yubá, gaca ca run tu yöxaj böla le ta'chiljë' bönni' lu nísado', le röjxí' zían böla izá'a. ⁴⁸ Cate' chibidzá' yöxaj na', bulu'béajë' le luyú bidxi ra' nísado' na', ate' gula'bö'ë ni', en gula'gu'ë-ba' yugu' böla dxi'a tu lu ga'böra, pero gula'ró'unë'-ba' yugu' böla cá'asö. ⁴⁹ Lësca' caní gaca cate' údxi que yödzölió ni. Ila'rúajë' gubáz lá'ayi queë' Dios, ate' ulu'béajë' quez yugu' bönachi tsahui', ate' ulu'cuíti'ë légaquië' ladaj bönachi tuá' dö'.

⁵⁰ 'Ní'irö ila'gu'ë bönachi tuá' dö' na' lu guí' gabila. Ni' ila'bödxë', en ulu'tíl-la láyë'ë.

Yöl-la' tsahui' le naca gula, en le naca cubi

⁵¹ Ní'irö Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bi'ë didza', të' Lë':

—Ön, Xan.

⁵² Jesús gudxë' légaquië':

—Cate' tu bönni' yudo' usedi chinazí' lu në'ë le rinná bë'ë Dios yehua' yubá, náquië' ca tu bönni' xan yu'u, rubéajë' ladaj yöl-la' tsahui' queë' le naca cubi, en le naca gula, le nácagaca tsahui' le ruzi'ë xibé.

Le benë' Jesús lu yödzö Nazaret

(Mr. 6:1-6; Lc. 4:16-30)

⁵³ Cate' budxi bucúdzu'ë Jesús yugu' didza' ni, buzé'ë ni'. ⁵⁴ Cate' budxinë' ladzë', busédinë' bönachi nacuá' lu yu'u ga tu'dubë' bönni' judío, en tu'sëdë' queë' Dios, ate' bulu'bánninë, ta'nnë':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni? ⁵⁵ Náquië' bönni' ni zxí'inë' bönni' gubëdxi yaga, ate' xinë'ë lënu María. Náquië' bóchi'gaquië' Jacobo, en José, en Simón, en Judas. ⁵⁶ Lësca' nigula zanë' nacuá'lennu rë'u ni. ¿Gazxi caz guzëdë' yúgu'të lë ni?

⁵⁷ Que lë ni na' gulaca chopa ládxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacuá' lidxë' biti' tun lë' bal.

⁵⁸ Que lë ni na' biti' benë' Jesús zían yöl-la' huáca ni', tu' cabí ta'yéajlë'ë Lë'.

Ca bétgaquie' Juan, bönni' buquilë' bönachi nisa

(Mr. 6:14-29; Lc. 9:7-9)

14 ¹ Lu dza ni', biyönnë' Herodes, bönni' rinná bë'ë luyú Galilea, ca nácagaca yugu' yöl-la' huáca runë' Jesús. ² Herodes na' gudxë' yugu' ni'a në'ë, rnnë':

—Bönni' na' Juan, bönni' buquilë' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

³ Caní gunné' Herodes tu' gusól-lë'ë lë cazë' bönni' gula'zönë' Juan, en gulúgui'ë lë' du guíë, ate' gula'gu'ë lë' lidxi guíë tu' gú'uninu Herodías ilunë' caní. Herodías na' gúcanu nigula queë' Felipe, bóchë'ë Herodes na'. ⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzö ni' lë', tu' téquiguequi bönachi náquië' Juan na' tu bönni' ru'ë didza' uláz queë' Dios. ⁶ Ní'irö cate' guca laní que dza guyé'enë' iz Herodes, birúajbi' bi'i nigula queénu Herodías na', en buyá'abi' lógaca nupa nacuá' laní na', ate' guyaza ládxë'ë Herodes le benbi'. ⁷ Guzxí' lu në'ë Herodes, en benë' tsutsu xtídzë'ë unödzjë' queébi' bíti'tës bi inábibi' lë'. ⁸ Tu' chibusédinu-bi' zí'alö xiná'abi', gúdxibi' lë':

—Benna quia' na'a icjë' Juan, bönni' buquilë' bönachi nisa. Gulú'u le tu lu zxiga' zxön.

⁹ Ní'irö buí'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë ni na' gunná bé'enë' nu tsöjnödzaj icjë' Juan na' queébi'. ¹⁰ Caní guca, gusól-lë'ë nu tsöjrixí yenë' Juan ga ni' yu'ë lidxi guíë. ¹¹ Bönni' na' nasól-lë'ë bu'ë icjë' Juan na', zxoa lu zxiga' zxön, ate' bunödzjë' le queébi' bi'i nigula na', ate' lëbi' buá'abi' le queénu xiná'abi'.

¹² Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cáché'ë lë'. Gudödi ni', yöjtíxjöi'iguequinë' Jesús ca gulaca lë ni.

Jesús rugahuë' zíanrö ca chi-un gayuá' bönachi

(Mr. 6:30-44; Lc. 9:10-17; Jn.6 :1-14)

¹³ Cate' réquibe'enë' Jesús lë ni, buzë'ë ni', ate' gurenë' tu lë'e bárcodo', en sa'yéajë' la' queëzë' tu lataj cá'asö. Cate' bila'yöni bönachi zéajë' ni', bila'rúaj yugu' yödzö ni', en yöjaca ga ni' idxinë' Jesús, ta'zë'e ní'aguequi. ¹⁴ Cate' burúajë' Jesús lë'e barco, bilé'enë' nacuá' bönachi zían ni', ate' buéchi' ládxë'ë léguequi, en bunë' nupa te'e, nútsa'gaca ládjaguequi. ¹⁵ Cate' chiridzö' dza na', bila'dxinë' yugu' bönni' usëda queë' Jesús ga zoë', en tē' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dë yódzödo' para gá'ugaca bi ilagu.

¹⁶ Ní'irö Jesús gudxë' légaquië':

—Biti' run bayudxi tsöjáquië'. Buli'nödzej libí'ili' le ilahuë'.

¹⁷ Ní'irö tē' Lë':

—Gáyu'sö yöta xtila dë, en chópasöba' böla dëba' queëtu' ni.

¹⁸ Jesús rë' légaquië':

—Buli'dödi le lu na'a.

¹⁹ Ní'irö Jesús gunná bé'enë' bönachi na' ila'bó' ga yu'u daca'. Gudödi na' gudélë'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzuxzjë' yöta xtila na', en budödë' le lu ná'agaquië' bönni' usëda queë', ate' légaquië' gula'guísië' le lógaca bönachi zían na'. ²⁰ Gulahuë' yúgu'tëgaquië', en bulu'huóljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra. ²¹ Bönni' ni' gulahuë' guláquië' idú chi-un gáyu'ë, pero cuntú nu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn.6 :16-21)

²² Ní'irö la' bentë' Jesús ga gula'benë' bönni' usëda queë' lë'e bárcodo', en tsöjáquië', ila'nóruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacuá' ni' didza'. ²³ Cate' chibusól-lë'ë Jesús bönachi na', gurenë' tu lu guí'ado' ga ni' yöjsóë' tuzë'. Ni' bulidzë' Dios. Cate' chigul-la, tuzë' zoë' ni'. ²⁴ Bárcodo' ga na' nacu'ë bönni' usëda queë' ridödi gatsaj láhui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. ²⁵ Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'. ²⁶ Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bó'dë'ë böniga tu' tádxinë'. Gula'bódxie', ta'nnë':

—Tu' ridasö na'.

²⁷ Ní'irö Jesús la' bulidztë' légaquië', rnnë':

—Buli'zxöni ládxi'li'. Neda' ni. Biti' gádxili'.

²⁸ Ní'irö bubi'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

²⁹ Jesús gudxë' lë':

—Gudá.

Ní'irö bö'tjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. ³⁰ Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjë' lu nisa, ate' guródxinë'.

Bulidzë' Jesús, rnnë':

—Xan, busölá neda'.

³¹ Jesús la' bulitë në'ë. Buguélë'ë lë', en rë' lë':

—Láti'sö réajlë'u neda'. ¿Bizx que guca chopa ládxu'u?

³² Cate' bulu'benë' lë'e bárcodo' na', guró'ö dxi bö' na' recja. ³³ Ní'irö bönni' nacu'ë lë'e bárcodo' na' gula'yéaj ládxi'gaquië' Jesús, ta'nnë':

—Le nácatë, Zxí'inë' Dios nacu'.

Jesús ruúnë' yugu' bönni' huë' nacu'ë yödzö Genesaret

(Mr. 6:53-56)

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret. ³⁵ Cate' bulu'únbë'ë bönni' yödzö ni' Jesús, gula'sól-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús. ³⁶ Guláta'yuë' lahuë' Jesús gu'ë légaquië' lataj ila'gansë' ruí'i lari' nácuë', ate' la' bulu'huöacatë yúgu'të nupa na' bila'gán lari' na'.

Le tun ga biti' nácaru' tsahui' lahuë' Dios

(Mr. 7:1-23)

15 ¹ Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' tē' Lë':

² —¿Bizx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi nē'ë ca naca que yudo' cate' si' ilahuë'.

³ Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'anali' cá'asö xibá queë' Dios para gunli' le nulaga loli' runli'? ⁴ Caní raca, tu' gunná bé'enë' Dios libí'ili', gunné':

“Ben bal xuz xino'o”, en gunné' ca': “Nu inné' zi' que xuz xinë'e, tsaz gati nu na'.” ⁵ Pero libí'ili' rnnali': “Channö nu guíë xuz xinë'e: Biti' bi

gaca gunna' quiu' tu' chiguzxí' lu na'a gunna' yúgu'të queë' Dios,

⁶ bítirö bi run bayudxi gun nu na' que xuz xinë'e.” Caní runli',

rucá'anali' cá'asö le gunná bë'ë Dios, para gunli' le nulaga loli' runli'.

⁷ Libí'ili', bönni' ruluí'isö tsahui' cuinli', idú ca nácali' gudíxjö'ë Isaías, bönni' bë'ë didza' uláz queë' Dios, gunné':

⁸ Bönni' ni, len rú'agacsë' tunë' neda' bal, en calëga idú ládxi'gaquië'.

⁹ Nítisö naca le ta'yéaj ládxi'gaquië' neda',

tu' tu'sédinë' yugu' le gula'nná bē' bōnachi.

¹⁰ Ní'irō bulidzē' Jesús bōnachi nacuá' ni', en rē' léguqui:

—Buli'zé nágali' le guía' libí'ili', en guli'tséajni'i. ¹¹ Calēga le riyaza ru'ē nu bōnni' run ga biti' náquiē' tsahui' lahuē' Dios, pero le rirúaj ru'ē, lē ni run ga biti' náquiē' tsahui' lahuē' Dios.

¹² Ní'irō yugu' bōnni' usēda queē' Jesús gula'bígui'ē ga zoē', en tē' Lē':

—¿Naru' nóttsenu' gula'lenē' yugu' bōnni' yudo' fariseo cate' bila'yōnnē' didza' ni bē'u?

¹³ Ní'irō bubi'ē didza' Jesús, en rē' légaquiē':

—Yúgu'tē le nadúz, le cabí guzē' Xuza' zoē' yehua' yubá, huadúl jagaca idú luí. ¹⁴ Buli'cá'ana légaquiē'. Chinachúl-la lógaquiē', en ta'ché'ē nupa nachul-la lógaca. Channō tu bōnni' lo chul-la iché'ē ia'tué' bōnni' lo chul-la, iropē' ila'bixē' tu lu yeru.

¹⁵ Ní'irō bubi'ē didza' Pedro, en rē' Jesús:

—Buzéajni'i netu' lē ni rucúdz'u didza'.

¹⁶ Jesús rē' légaquiē':

—¿Naru' cabí réajni'itseli' ca' libí'ili'? ¹⁷ ¿Naru' cabí réajni'itseli' riyaza lē'ēru' yúgu'tē le riyaza ruá'aru', ate' rurúaj lē'ēru'? ¹⁸ Na'a, le rirúaj rúa'ali', lu icja ládxi'do'oli' za', ate' lē ni run ga biti' nácali' tsahui' lahuē' Dios. ¹⁹ Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bōnachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizé ládxi'li' cuanli', en yugu' le rinnēli' que luzá'ali' le cabí nácate, en yugu' le rinné xíhui'li'. ²⁰ Yugu' le caní tun ga biti' náquiē' tu bōnni' tsahui' lahuē' Dios, pero channō cabí nayari nē'ē ca naca que yudo' cate' bi gahuē', biti' gun ga biti' náquiē' tsahui' lahuē' Dios.

Tu nigula izá'a réajlē'ēnu Jesús

(Mr. 7:24-30)

²¹ Ní'irō buzé'ē Jesús ni', en guyéajē' lu xiyú yōdzō Tiro, en yōdzō Sidón. ²² Tu nigula nabábanu luyú Canaán birúajnu yōdzō ni', ate' bē'ēnu zidzaj didza', rēnu Jesús:

—Xan, zxí'ini xi'sóē' David, buéchi' ladxi' neda'. Bi'i nigúlado' quia' riguí'i rizáca'da'abi' tu' yu'u bö' xihui' lēbi'.

²³ Biti' bi didza' bubi'ē Jesús. Ní'irō gula'bígui'ē bōnni' usēda queē' ga zoē', ate' gulé' Lē', ta'nné':

—Busól-la'-nu, tu' zá'anu cúdz'u'ru' ribódx'i'anu.

²⁴ Ní'irō bubi'ē didza' Jesús, ate' rē'ē-nu:

—Dios nasól-lē'ē neda' gácalena' bōnachi Israel, nupa nácagaca ca bö'cu' zxíla'do' nanítigacaba'.

²⁵ Ní'irō gubíga'nu nigula na' ga zoē' Jesús, en guyéaj ládxi'nu Lē', ate' rēnu Lē':

—Xan, gúcalen neda'.

²⁶ Bubi'ë didza' Jesús, rnnë':
—Biti' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

²⁷ Ní'irö nigula na' rënu Jesús, rnnanu:
—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

²⁸ Ní'irö bubi'ë didza' Jesús, rnnë':
—Nígúlado'. Idú naca ca réajlë'u neda'. Gaca quiu' ca ré'ënnu'.
La' ní'isö böácatëbi' bi'i nigúlado' queénu.

Jesús ruúnë' zían nupa te'e

²⁹ Ní'irö buzé'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'. ³⁰ Bönachi zían dujuá'gaquië' nupa biti' guca ila'zá', en nupa nachul-la guió'j lógaca, en nupa biti' guca ila'nnë', en nupa narugu ni'a né'eguequi, en ia'zica'rö zían nupa te'e, ate' gula'guíxaj léguequi xini'ë Jesús, ate' Lë' bunë' léguequi.
³¹ Bulu'bani bönachi ni' ca naca le benë' Jesús, tu' bila'lé'e tu'nnë' nupa biti' guca ila'nnë', ate' nuhuöácagaca nupa gurugu ni'a né'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

Jesús rugahuë' zíanrö ca choá' gayuá' bönachi

(Mr. 8:1-10)

³² Ní'irö Jesús bulidzë' yugu' bönni' usëda queë', en rë' légaquië':
—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' ré'ënda' usöl-la'gaca'-në' tsöjhuóajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

³³ Ní'irö yugu' bönni' usëda queë' të' Lë', ta'nnë':
—¿Gazxi caz idzólitu' yöta xtila zían lu lataj cá'asö ni, le ugágutu' bönachi zían ni?

³⁴ Gunábinë' Jesús légaquië', rnnë':
—¿Bal-laxi yöta xtila dë queéli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queétu' ni.

³⁵ Ní'irö Jesús gunná bé'enë' bönachi zían na' ila'bó' lu yu. ³⁶ Gudélë'ë gadxi yöta xtila na', en yugu' böla na', ate' gudxë' Dios: “Xclenu'.” Ní'irö buzuxzjë' iroptë na', en bunödzejë' quégaquië' bönni' usëda queë', ate' légaquië' gula'guísië' le lógaca bönachi zían na'. ³⁷ Gulahuë' yúgu'të', en bulu'huóljanë'. Gudödi ni' bulu'tubë' le bizxaj nagá'anagaca, ate' bulu'líë' gadxi ga'böra. ³⁸ Yugu' bönni' na' gulahuë' nácagaquië' choá' gáyu'ë, pero cuntú nu bulaba yugu' nigula, en bí'ido'. ³⁹ Ní'irö busöl-lë'ë

Jesús bönachi na' tsöjhuóajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

Ta'nábinë' Jesús gunë' tu le gaca bë' nuzxi náquië'

(Mr. 8:11-13; Lc. 12:54-56)

16 ¹ Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'e Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'.

² Bubi'ë didza' Jesús, en rë' légaquië':

—Cate' ridzö', rnnali' caní: “Gun dxi'a cuxó, tu' rö'ö böaj xiná lúzxiba.” ³ Cate' naca zílado', rnnali' caní: “Biti' gun dxi'a na'a dza tu' rö'ö böaj xiná, en ruchul-la lúzxiba.” Libí'ili', bönni' rulu'isö tsahui' cuinli'. Raca inné ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a. ⁴ Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'e didza' uláz queë' Dios.

Ní'irö Jesús bucá'anë' légaquië', söhuóje'.

Le tu'sédinë' bönni' yudo' naca ca cúa zi que yöta xtila

(Mr. 8:14-21)

⁵ Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la ládxi'gaquië' ilu'e le ilahuë'. ⁶ Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

⁷ Ní'irö la' légacasë' gulún xtídza'gaquië' bönni' usëda queë', ta'nné':

—Rnnë' caní tu' cabí nuá'aru' yöta xtila.

⁸ Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila?

Láti'do'os réajlë'ëli' neda'. ⁹ ¿Naru' cabí réajni'itseli', en biti' röjnétseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? ¹⁰ ¿Naru' cabí röjnétseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? ¹¹ ¿Naru' cabí réajni'ili'? Biti' bë'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

¹² Ní'irö gula'yéajni'inë' biti' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo*(Mr. 8:27-30; Lc. 9:18-21)*

¹³ Cate' bidxinë' Jesús lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljë' Bönachi?

¹⁴ Bulu'bi'ë didza', ta'nnë':

—Bal-lë' ta'nnë': "Juan nacu', bönni' ni' buquilë' bönachi nisa."

Ia'zica'rë' ta'nnë': "Elías nacu', bönni' ni' bë'ë didza' uláz queë' Dios dza ni'te." Ia'zica'rë' ta'nnë': "Jeremías nacu', o ia'tué' bönni' bë'ë didza' uláz queë' Dios."

¹⁵ Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

¹⁶ Bubi'ë didza' Simón Pedro, en rë' Lë':

—Li' nacu' Cristo, Zxí'inë' Dios ban.

¹⁷ Bubi'ë didza' Jesús, rë' lë':

—Bica' xibó' li', Simón, zxí'inë' Jonás, tu' cabí bulu'í'inë' nu bönni' li' lë ni. Xuza' zoë' yehua' yubá bulu'í'inë' li' lë ni. ¹⁸ Neda' rea' li', li' nacu' Pedro, ate' lu guió'j ni ucuá'a nupa ulu'dubi quia', ate' yöl-la' unná bë' que tu' xihui' bití' sequi' uzaga' xinó'zgaquië'. ¹⁹ Gunna' quiu' yugu' zxí'ini guíë que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibé' lataj gaca lë na' Nu na' zoa yehua' yubá ni'.

²⁰ Ní'irö Jesús gunná bé'enë' yugu' bönni' usëda queë' cuntú nu ilé'ë náquië' Lë' Cristo.

Jesús riguíxjö'ë ca si' ilútië' Lë'*(Mr. 8:31-9:1; Lc. 9:22-27)*

²¹ La' dza ní'isö gusí lahuë' Jesús riguíxjöi'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti.

²² Ní'irö Pedro guché'ë Jesús quez, en gusí lahuë' ridil-lë' Lë' didza', rnnë':

—Xan, bití' gu'ë Dios lataj. Bití' ca' gaca quiu' ca rnno'.

²³ Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládxa'a tu' cabí naca le rizá' ládxa'u li' ca rizá' ládxe'ë Dios, pero ca ta'za'sö ládxi'gaca bönachi.

²⁴ Ní'irö Jesús gudxë' yugu' bönni' usëda queë', rnnë':

—Channö zoë' tu bönni' ré'ënë' të'ë neda', ral-la' uzóë' tsölá'alö yugu' le ré'ëni quézinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca të'ë neda'. ²⁵ Nu bönni' gué'ënnë' gun chi'ë yöl-la'

na'bán queë', unítie' le, pero bönni' unítie' yöl-la' na'bán queë' tu' dë'ë neda', gata' yöl-la' na'bán idú queë'. ²⁶ ¿Naru' uzi'tsë' xibé tu bönni' channö utubë' yúgu'të le dë yödzo'lió ni pero unítie' yöl-la' na'bán idú queë'? Biti' bi gaca unödzjë' tu bönni' para gata' yöl-la' na'bán idú queë'. ²⁷ Caní rnní'a', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca. ²⁸ Le nácatë rea' libí'ili': "Biti' ca' ilátigaca bal-la nupa nacuá' ni cate' ila'lé'erö idinná bë'a neda', Bönni' Guljë' Bönachi."

Ridzá' ca nalá' lahuë' Jesús

(Mr. 9:2-13; Lc. 9:28-36)

17 ¹ Gudödi xopa dza, Jesús gudélë'ë Pedro len Jacobo, en Juan, böché'ë Jacobo na', en guché'ë légaquië', ate' yöjáquië' quez tu lu guí'a sibi. ² Ni' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácuë' böáca chiguíchido'os ca bení'. ³ Ní'irö bila'lé'enë' bönni' usëda queë' bulu'í' lógaquië' Moisés, en Elías, ate' tu'í'ilenë' Jesús didza'. ⁴ Ní'irö Pedro rë' Jesús:

—Xan, naca dxi'a zóaru' ni. Channö ré'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

⁵ Tsanni ni' ru'ë Pedro didza' ni, la' guró'ötë tu böaj bení' le guzxóa légaquië', ate' lu böaj na' biyón chi'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lë'. Buli'zé nágali' didza' gu'ë.

⁶ Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'. ⁷ Ní'irö gubígui'ë Jesús ga na' nacu'ë, ate' gudanë' légaquië', rnnë':

—Guli'chasa. Biti' gádxili'.

⁸ Cate' gula'chisa lógaquië', en bulu'yúë', cúnturö nu bila'lé'enë', pero tuzë' Jesús.

⁹ Cate' ni' tu'dínnië' lu guí'a na', Jesús gunná bé'enë' légaquië', rnnë':

—Cuntu nu guié'li' ca guca lë ni bilé'eli' cate' ubanra' lu yöl-la' guti neda', Bönni' Guljë' Bönachi.

¹⁰ Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi ulu'í'i lahuë' Elías zí'alö ca ulu'í'i lahuë' Cristo?

¹¹ Bubi'ë didza' Jesús, rë' légaquië':

—Le nácatë ulu'í'i lo cazë' zí'alö Elías, en ucá'anë' tsahui' yúgu'të.

¹² Neda' rea' libí'ili': "Chibulu'í'i lahuë' Elías na', pero biti' bulu'únbë'ë lë', ate' yúgu'të ca rnnasö quégaquië' gulunë' queë'." Lësca' caní ilunë' quia' neda', Bönni' Guljë' Bönachi, ulu'saca' zi'ë neda'.

¹³ Ní'irö gula'yéajni'inë' bönni' usëda queë', bé'lenë' Jesús légaquië' didza' ca guca queë' Juan, bönni' na' buquilë' bönachi nisa.

Ruúnë'-bi' Jesús tubi' bi'i bönni' ré'ebi' xjote'

(Mr. 9:14-29; Lc. 9:37-43)

¹⁴ Cate' bila'dxinë' ga na' nacuá' bönachi zián, gubígui'ë tu bönni' ga zoë' Jesús, ate' buzóa zxibë' lahuë' Lë', ¹⁵ en rë' Lë':

—Xan, buéchi' ladxi'-bi' bi'i bönni'do' quia', tu' ré'ebi' xjote', en riguí'i rizáca'da'abi', ate' zián luzuí ridzó'öbi' lu guí' o lu nisa.

¹⁶ Chidiguá'a-bi' lógaquië' bönni' usëda quiu' pero biti' guca ulu'únë'-bi'.

¹⁷ Bubi'ë didza' Jesús, rnnë':

—Libi'ili', bönachi cabí réajlë'ëli', en biti' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queéli'? Guli'diguá'-bi' quia' ni.

¹⁸ Ní'irö Jesús buzenë' le bach bö' xihui' na' yu'u lëbi', ate' la' burúajtë lëbi', ate' la' ná'asö böácatëbi' bi'i bönni'do' na'.

¹⁹ Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' biti' guca ubéajtu' netu' bö' xihui' na'?

²⁰ Jesús rë' légaquië':

—Biti' guzxéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídi'sö naca yöl-la' réajlë' queéli' Dios, nácatë ca tu xisedo' mostaza, huáca guiéli' guí'ado' ni: “Gucuíta ni, en yöjsóa ní'ilö”, ate' la' icuítatë guí'ado' na'. Biti' bi' zoa le cabí gaca gunli' channö réajlë'ëli' Dios idú ládxi'li'. ²¹ Tu bö' xihui' caní gácasö ubéajli' channö ulídzali'-në' Dios, en gunli' gubasa.

Riguíxjö'ë Jesús leyúbölö ca si' ilútië' Lë'

(Mr. 9:30-32; Lc. 9:43-45)

²² Tsanni ni' ta'dé' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi.

²³ Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

Jesús riguíxaj lazë' que yudo'

²⁴ Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quixjë' bönachi lázagaca que yudo' ga zoë' Pedro, ate' tē' lē':

—¿Naru' cabí quíxaj lazë' que yudo' bönni' rusédinë' libí'ili'?

²⁵ Bubi'ë didza' Pedro, rnnë':

—Ön, huaguíxjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bè'ë luyú ni, ¿nupxi tu'quizxjè' le riguizxaj laz, en lazxaj que yu? ¿Naru' tu'quizxjè' bönachi uládz quégaquiè' o bönachi izá'a?

²⁶ Bubi'ë didza' Pedro, rë' Lë':

—Bönachi izá'a tu'quizxjè'.

Ní'irö Jesús rë' lë':

—Que lë ni na', biti' run bayudxi quizxaj laza' que yudo' tu' naca' Zxí'inë' Dios ca na' biti' bi ta'guíxaj nupa nácagaca bönachi uládz queë' bönni' na' ruquíxjè'. ²⁷ Na'a, para cuntú nu gun leri', guyéaj ra' nísado', yöjzaj lu nisa le rizóninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ni' idzölinu' tu' dumí lásido'. Guzxí'i le, ate' gudizxaj laza', en lazu'.

¿Núzxilö gaca lo?

(Mr. 9:33-37; Lc. 9:46-48)

18 ¹ La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nné':

—¿Núzxilë' bönni' ni gáquiè' lo ga rinná bè'ë Dios yehua' yubá?

² Bulidzë'-bi' Jesús tubi' bi'i bönni'do', ate' buzóë'-bi' gatsaj láhui'lö ga na' naculë'. ³ Ní'irö rë' légaquiè':

—Le nácate' rea' libí'ili', channö cabí huöácali' ca zeaj nácabi' bí'ido', biti' ca' tsú'uli' ga ni' rinná bè'ë Dios yehua' yubá. ⁴ Que lë ni na', núti'tës nu gaca nöxaj ladxi', en huöáca ca nácabi' bí'ido' ni, nu ni gaca lo ga ni' rinná bè'ë Dios yehua' yubá. ⁵ Núti'tës nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'

(Mr. 9:42-48; Lc. 17:1-2)

⁶ Gunné' ca' Jesús:

—Nu gun ga gunbi' dul-la' tubi' bí'ido' caní réajlë'ëbi' quia', gácarö dxi'a queë' bönni' na' la'tu' ugalë'ë guió'j riyétuni yaga yenë', ate' tsöjsuladzu' cuinë' lu nísado'. ⁷ Bica' bayechi' bönachi yödzölió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

⁸ 'Que lë ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' biti' rizó'o o narugu ni'a no'o, en calëga nacuá' chopa no'o, en chopa ni'u ate' tsöjtsáziu' lu guí' gabila le catu caz ulu. ⁹ Channö gun guió'j lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guió'j lo', en calëga nacuá' chopa guió'j lo', ate' tsöjtsáziu' lu guí' gabila.

Jesús rucúdzu'ë didza' que tu bö'cu' zxila' nanítiba'

(Lc. 15:3-7)

¹⁰ Gunné' ca' Jesús:

—Guli'gún chi'i cuinli' para cabí uzóali'-bi' tsölá'alö tubi' bí'ido' caní. Neda' rea' libí'ili', gubáz lá'ayi tapa chi'ë lézacabi' nacuá'tica'së' lahuë' Xuza' zoë' yehua' yubá. ¹¹ Bida' ni neda', Bönni' Guljé' Bönachi, para usölá' nu ni naniti.

¹² '¿Nacxi rusáca'li' queé'li'? Tu bönni', nacuá'aba' tu gayuá' bö'cu' zxila' queë', channö nítiba' tuba', ¿naru' cabí ucá'anë'-ba' tápalalaj yu' chénnaba' na', ate' tsejé' gapa naca lu guí'a, para tsöjtiljé'-ba' bö'cu' zxíla'do' na' nanítiba'? ¹³ Channö udzólinë'-ba', le nácatë rea' libí'ili', udzéjarönë' ni'a queé'ba' bö'cu' zxíla'do' na' ca gunë' quézacaba' ia'tápalalaj yu' chénnaba' ni' biti' gula'nítiba'. ¹⁴ Lësca' caní, Xúziru' Dios, zoë' yehua' yubá, biti' ré'ënë' nítibi' tubi' bí'ido' caní.

Ca ral-la' uniti loru' böchi' luzá'aru'

(Lc. 17:3)

¹⁵ Gunné' ca' Jesús:

—Channö böchi' luzó'o guá' dö' quiu', guyéajtsöca', en yöjca'analenë' tsahui' la' libí'isili'. Channö uzé náguië' li', chibuguélu'u böchi' luzó'o.

¹⁶ Channö cabí uzé náguië' xtídz'u, guché'ë ia'túë' o ia'chopë' bönni' para urúaj li xtídz'u lógaquië' chopá tsonné' bönni', nupa gaca ilún ba nalí que xtídz'a'li'. ¹⁷ Channö cabí uzé náguië' xtídz'a'gaquië', gudxi ca' bönachi tu'dubi tu'sëdi queë' Dios, en channö cabí uzé náguië' xtídz'a'gaca bönachi na', ní'irö bönni' na' gáquië' quiu' ca tu bönni' biti' réajlë'ë Dios, en ca tu bönni' ruquíxjé' uláz que yödzö zi'tu'.

¹⁸ 'Le nácatë rea' libí'ili', yúgu'të le inná bé'ëli' lu yödzölió ni, naca le chigunná bé'ë Dios yehua' yubá, ate' yúgu'të le güí'ili' lataj lu yödzölió ni, naca le chibé'ë lataj Dios yehua' yubá.

¹⁹ 'Lësca' caní rea' libí'ili', channö chópasili' gun tuz xtídz'a'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'. ²⁰ Ga nacuá' chopá tsonna nupa ni nudúbigaca quia' neda', zoa caza' neda' gatsaj láhui'lö ga na' nacu'ë.

²¹ Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

²² Jesús rë' lë':

—Neda' rea' li', calégasö gadxi luzuí, pero idú tsónnalalaj yu' chi cuía le naca gadxi luzuí.

**Jesús rucúdzu'ë didza' que tu bönni' huen
dxin biti' buniti lahuë' luzé'ë**

²³ Gunné' ca' Jesús:

—Ia'stú, ca gun Nu na' rinná bē' yehua' yubá naca ca benē' tu bönni' rinná bē'ë. Gú'unnē' ucá'analenē' tsahui' yugu' bönni' huen dxin queē'.

²⁴ Cate' gusí lahuë' rucá'analenē' légaquiē' tsahui', dujuá'gaquiē' ga zoē' tu bönni' ral-lē'ë queē' zían gayuá' dumí. ²⁵ Tu' cabí guca quíxjē', gunná bē'ë xanē' idó'ogaquiē' lē', en nigula queē', en yugu' bi'i queē', en yúgu'tē le dē queē', ate' ní'irō gazxaj le ral-lē'ë queē' xanē' na'.

²⁶ Ní'irō bönni' huen dxin na' buzóa zxibē' lahuë' xanē', en gunábinē' lē', rnnē': "Xan, ben zxön ládxi'u neda'. Huaguíxaj caza' li' idutē." ²⁷ Ní'irō xanē' na' buéchi' ládxi'ë bönni' huen dxin queē' na', en buniti lahuë' lē' lē na' ral-lē'ë queē', ate' busanē' lē'. ²⁸ Cate' burúajē' bönni' huen dxin na', la' yójtšágatē' tu bönni' rúnlenē' lē' tsözxón dxin, ate' bönni' na' ral-lē'ë queē' láti'do'os dumí. Ní'irō guzxönē' lē', en guxzínnajē' yenē', ate' rē' lē': "Gudíxjate lē na' ral-lu'u quia'." ²⁹ Ní'irō luzé'ë na' buzóa zxibē' lahuë', en gunaba yeché'ë lahuë', rnnē': "Ben zxön ládxi'u neda'.

Huaguíxaj caza' li' idutē." ³⁰ Biti' gú'unnē' bönni' huen dxin na', ate' yójlu'ë lē' lidxi guíē dza quíxjarē' lē na' ral-lē'ë queē'. ³¹ Cate' bila'lé'enē' lē ni ia'zica'rē' huen dxin, bulu'huí'inide'enē' ni'a queē', ate' yójtíxjoi'iguequinē' xángaquiē' yúgu'tē lē na' guca. ³² Ní'irō xángaquiē' bulidzē' bönni' huen dxin na', ate' rē' lē': "Li', huen dxin catsahui'.

Yúgu'tē dumí na' gúl-lu'u quia' buniti lahua' li'. Busúlua' lē na' gúl-lu'u quia' tu' gunaba yechu'u lahua'. ³³ ¿Naru' cabí ral-la' huéchi' ládxi'u ca' luzó'o ca na' bena' neda', buéchi' ládxi'a li'?" ³⁴ Ní'irō guléde'enē' xanē', en budödē' lē' lu ná'agaca nupa ulu'saca' zi' lē' dza quíxjarē' idútē le ral-lē'ë queē'.

³⁵ Ní'irō rnnē' Jesús:

—Lēasca' caní gunē' Xuza' zoē' yehua' yubá queéli' channō cabí uniti loli' idú ládxi'li' yugu' böchi' luzá'ali'.

Nupa tu'lá'a yöl-la' nutsaga na'

(Mr. 10:1-12; Lc. 16:18)

19 ¹ Cate' budxi bē'ë Jesús yugu' didza' ni, buzé'ë luyú Galilea, ate' bidxinē' luyú Judea le dē ia'tsölá'a yegu Jordán saca' ga rilén gubidza. ² Bönachi zían sōjácálen Jesús, ate' bunē' léguequi ni'.

³ Ní'irō bila'dxinē' bal-lē' bönni' yudo' fariseo ga zoē' Jesús para ila'zí' bē'ë Lē', ate' gula'nábinē' Lē', ta'nnē':

—¿Naru' dē lataj bönni' nutsaga nē'ë usanē' nigula queē' tu' nözi bíti'tēs bi' raca?

⁴ Bubi'ë didza' Jesús, rē' légaquiē':

—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödzölió? Bönni', en nigula benë' légaquië'.

⁵ Caní gunné' Dios: “Que lë ni na', ral-la' usanë' tu bönni' xuz xiné'ë, ate' tsaz tsöjsóalenë'-nu nigula queë', ate' iropë' na' ulu'huöáquië' tuz bönachi.” ⁶ Caní naca, bíti'rö nácagaquië' chopë' pero tuz bönachi chinuhuöáquië'. Que lë ni na', bití' ral-la' ulu'lé'ë bönni' nupa na' benë' Dios tuz.

⁷ Ní'irö bönni' yudo' na' gula'nábinë' Jesús, ta'nnë':

—¿Bizx que na' gunná bé'enë' Moisés légaquië' le ruí'i lataj nu bönni' unödzjë' tu guichi queënu nigula queë' le rnna nulá'a yöl-la' nutsaga na', ate' usanë'-nu nigula queë' na'?

⁸ Jesús rë' légaquië':

—Caní benë' Moisés tu' nazidi icja ládxi'do'oli'. Bennë' libí'ili' lataj usanli'-nu nigula queëli', pero cate' gusí lo guta' guró'ö yödzölió, bití' guca caní. ⁹ Neda' rea' libí'ili', channö tu bönni' usanë'-nu nigula queë', en bití' gudálennu bönni' yúbölö, ate' utsaga ná'alënë'-nu nigula yúbölö, gunë' dul-la' le riguitsaj xibá que yöl-la' nutsaga na'. Lësca' caní, channö nu bönni' utsaga ná'alënë'-nu nigula na', nusanë'-nu bönni' queënu, gunë' dul-la' le riguitsaj xibá que yöl-la' nutsaga na'.

¹⁰ Ní'irö yugu' bönni' usëda queë' Jesús gulé' Lë', ta'nnë':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu' cabí utsaga caz në'ë, ugá'anë' tuzë'.

¹¹ Bubi'ë didza' Jesús, rë' légaquië':

—Bití' gaca ila'zí' lu ná'agaca yúgu'të bönachi didza' ni, pero núpasö na' Dios ruzéajni'inë' léguequi. ¹² Nacu'ë bönni' bití' tu'tsaga ná'alengaquië' nigula tu' cabí nácagaquië' idú bönni' biguiú', tu' gualaljë' ca', ate' ia'zíca'rë' bönni' bití' tu'tsaga ná'alengaquië' nigula tu' bulu'zaga' bönachi xinózgaquië', ate' ia'zíca'rë' bönni' bití' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequi' si' lu në'e didza' ni ral-la' si' lu në'e le.

Jesús rulidza tsáhuë'ë-bi' yugu' bí'ido'

(Mr. 10:13-16; Lc. 18:15-17)

¹³ Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë légacabi', en ulidzë' Dios ni'a qué'gacabi', ate' bönni' usëda queë' bulu'zágui'ë xinózgaquië'. ¹⁴ Ní'irö Jesús rë' légaquië', rnnë':

—Guli'güí'i-bi' yugu' bí'ido' lataj ila'dxinbi' ga zoa', en bití' uzága'li' xinózgacabi', tu' ila'zí' lataj nupa nácagaca ca yugu' bí'ido' caní ga ni rinná bë'ë Dios yehua' yubá.

¹⁵ Jesús guxóa në'ë légacabi', ate' ní'irö buzé'ë ni'.

Tu bönni' unná bë' cuidi' dë yöl-la' tsahui' queë'

(Mr. 10:17-31; Lc. 18:18-30)

- ¹⁶ Tu bönni' ni zoë' iz cuidi' queë' buduyüë' Jesús, en rë' Lë':
 —Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?
- ¹⁷ Bubi'ë didza' Jesús, rë' lë':
 —¿Naru' nôtzensu' lë na' rnno' quia', rnno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channö ré'ënu' gata' yöl-la' na'bán idú quiu', ben ca rinná bë' xibá queë' Dios.
- ¹⁸ Ní'irö bönni' na' rë' Jesús, rnnë':
 —¿Bízxilö xibá na'?
 Jesús rë' lë':
 —Xibá na' gunná bë'ë Moisés:
 Biti' gútiu' bönachi.
 Biti' gunu' dul-la' le riguitsaj xibá que yöl-la' nutsaga na'.
 Biti' cuanu'.
 Biti' innío' que böchi' luzó'o le cabí nácate.
- ¹⁹ Ben bal xuz xinó'o.
 Bidxí'i böchi' luzó'o ca nadxí'i cuinu'.
- ²⁰ Bönni' na' ni zoë' iz cuidi' queë' gudxë' Jesús, rnnë':
 —Yúgu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?
- ²¹ Jesús rë' lë':
 —Channö ré'ënu' gacu' tsahui', guyéaj, yöjëti' le dë quiu', ate' dumí na' si'u, bunödzej quégaca bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.
- ²² Cate' bönni' na' ni zoë' iz cuidi' queë' biyönnë' didza' ni, söhuóje' ruhuí'innë' tu' dëda' yöl-la' tsahui' queë'.
- ²³ Ní'irö Jesús gudxë' yugu' bönni' usëda queë', rnnë':
 —Le nácate rea' libí'ili', böniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá. ²⁴ Ia'stú rea' libí'ili', nácarö böniga tsázië' tu bönni' dë yöl-la' tsahui' queë' ga ni' rinná bë'ë Dios ca tódiba' böa' lu nagui yötsi'.
- ²⁵ Cate' bila'yönnë' yugu' bönni' usëda queë' didza' ni, bulu'báninë, ta'nnë':
 —¿Nuzxi caz gaca ulá, channö?
- ²⁶ Jesús buyüë' légaquië', en rë' légaquië':
 —Biti' gaca ilún bönachi lë ni, pero Dios huáca gunë' yúgu'të.
- ²⁷ Ní'irö bubi'ë didza' Pedro, en rë' Jesús:
 —Buyútsöca', netu' chibucá'anatu' yúgu'të, en zá'lentu' Li'. ¿Bízxirö gata' queëtu'?
- ²⁸ Jesús rë' légaquië':

—Le nácatē rea' libí'ili', dza ni' cate' ucubi yōdzōlió, ate' cō'a inná bē'a neda', Bōnni' Guljē' Bōnachi, ga ni' gácatēra' lo, lēasca' libí'ili' zál'enli' neda' na'a, có'ōli' chinnu lataj ga inná bē'ēli', en uchi'a usōrōli' quégaca idxinnu cō'tē yōdzō quégaca zxí'ini xi'sóē' Israel. ²⁹ Nu bōnni' rucá'anē' lidxē', o yugu' bóchē'ē, o yugu' zanē', o xuzē', o xinē'ē, o nigula queē', o yugu' zxí'inē', o yugu' xiyúē', para gunē' xichina', bōnni' ni si'ē ia'tú gáyua'tērō ca' queē', en gata' ca' yōl-la' na'bán idú queē'. ³⁰ Zián nupa nácatēca lo na'a, ulu'gá'ana cá'asō, ate' nupa nagá'anagaca cá'asō na'a, hualácagaca lo.

Rucúdzu'ē didza' Jesús ca tunē' bōnni' huen dxin

20 ¹ Gunnē' ca' Jesús:

—Ca gun Bōnni' na' rinná bē'ē yehua' yubá naca ca benē' tu bōnni' xan yu'u. Birúajē' zílado', yōjdiljē' yugu' bōnni' ilunē' dxin ga naca lu xiyúē' ga na' nadúzgaca lubá uva. ² Cate' chibugá'analenē' tsahui' yugu' bōnni' huen dxin na', quixxjē' légaquiē' tu dumí lazxaj que tu dza, gusól-lē'ē légaquiē' ilunē' dxin ga naca lu xiyúē'. ³ Cate' burúajē' idú xsila, bilé'enē' ia'zica'rē' bōnni' nacua'asē' ca' ga naca lu yé'ēyi. ⁴ Rē' légaquiē': “Guli'tséaj ca' libí'ili' ga naca lu xiyúa', ate' quixxja' libí'ili' le naca tsahui'.” La' yōjácate' ca' légaquiē'. ⁵ Burúajē' bōnni' xan yu'u na' leyúbölō idú huagubidza, enca' idú xihuó udzō', en la' tuz ca benē', gusól-lē'ē yugu' bōnni' yōjxáquiē' lu xiyúē'. ⁶ Burúajē' ca' cate' ni' zoa ia'látido'os gubidza, en yōjxáquiē' ia'zica'rē' bōnni' nacua'asē' ca' ni', ate' rē' légaquiē': “¿Bizx que zóatsali' ni cá'asō idú dza, biti' bi dxin runli?” ⁷ Yugu' bōnni' na' tē' lē', ta'nnē': “Cuntu nu benna xichintu'.” Ní'irō rē' légaquiē': “Guli'tséaj ca' libí'ili' ga naca lu xiyúa', ate' quixxja' libí'ili' le naca tsahui'.” ⁸ Cate' chizóa gal-la, bōnni' xan yu na' rē' bōnni' yu'u lu nē'ē yugu' huen dxin na', rnnē': “Bulidza yugu' bōnni' huen dxin na', ate' gu'u lázxjagaquiē'. Quixxju' zí'alō yugu' bōnni' na' bila'dxinē' yōjsetē. Udxí na' quixxju' yugu' bōnni' na' bila'dxinē' zí'atēlō.” ⁹ Ní'irō bila'dxinē' bōnni' yōjéngaquiē' dxin cate' ni' zoa ia'látido'os gubidza, en gula'zi'ē tu tuhuéajē' dumí lazxaj que tu dza. ¹⁰ Cate' bila'dxinē' bōnni' yōjéngaquiē' dxin zí'atēlō, guléquinē' huazí'gaquiē' ia'lati', pero lēasca' gula'zi'ē tu tuhuéajē' dumí lazxaj que tu dza. ¹¹ Cate' gula'zi'ē le, gula'nnédē'ē queē' bōnni' xan yu'u na', ¹² ta'nnē': “Yugu' bōnni' ni bila'dxinē' ga yōjsetē, tu chí'isō gulunē' dxin, en tuz ca gudíxjatsō' légaquiē' ca netu', ate' netu' ni bentu' dxin idú dza, en gúguida'atu' gubidza.” ¹³ Bubi'ē didza' xan yu na', en rē' tuē': “Bócha'a, biti' bi runa' quiu' le cabí naca tsahui'. ¿Naru' cabí bugá'ana tsáhui'ru' si'u tu dumí lazxaj que tu dza? ¹⁴ Guzxí' lazxju', en böaj lidxu'. Neda' ré'ēnda' quixxja' bōnni' ni yōjenē' dxin ga yōjsetē la' leze ca na' riguíxja' li'. ¹⁵ ¿Naru' cabí dē lu na'a guna' ca ré'ēnda' len le nequi quia'? ¿Naru' ruzxé'etsenu'-nē' luzó'o tu' rúnnada'a queē'?” ¹⁶ Caní naca, bal-lē'

bönni', tu'cá'ana bönachi légaquië' cá'asö, ilácagaquië' lo, ate' ia'zíca'rë' bönni', nácagaquië' lo na'a, ulu'gá'anë' cá'asö. Zían nupa nulidza', pero nabábasö nupa narógaca.

Riguíxjö'ë Jesús leyúbölö ca si' ilútië' Lë'

(Mr. 10:32-34; Lc. 18:31-34)

¹⁷ Cate' ni' yu'ë Jesús nōza, sa'yéajë' Jerusalén, guché'ë quez idxínnutë' bönni' usëda queë', en rë' légaquië':

¹⁸ —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. ¹⁹ Ulu'dödë' neda' lu ná'agaquië' bönni' zi'tu' para ulu'titjë' neda'. Ila'guinë' neda', en ulu'dé'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

Le gunábanu xiná'agaquië' Jacobo, en Juan

(Mr. 10:35-45)

²⁰ Ní'irö bidxinnu xiná'agaquië' Jacobo, en Juan, yugu' zxí'inë' Zebedeo, ga zoë' Jesús, dzágagaquië'-nu chopë' ni, ate' buzóa zxíbinu lahuë' Jesús, en gunábinu Lë' tu le uzá' ládxë'ë queënu. ²¹ Jesús gunábinë'-nu, rnnë':

—¿Bizxi ré'ënu'?

Rënu Lë':

—Gunná bë' có'öbi' tubi' zxí'ina' ni cuita lë'u ibëla, en ia'tubi' có'öbi' cuita lë'u yógöla ga ni' inná bë'u.

²² Bubi'ë didza' Jesús, rë' légaquië':

—Biti' nózili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

²³ Ní'irö Jesús rë' légaquië':

—Le nácatë le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílali' ca' nisa libí'ili', pero que có'öli' cuita lë'a ibëla o cuita lë'a yógöla, bití' dë lu na'a nu gu'a que, pero gata' quégaca nupa ni' chinupé'ë Xuza' quéguequi.

²⁴ Cate' ia'chië' bönni' usëda queë' Jesús bila'yönnë' lë ni, gula'lenë'.

²⁵ Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridóditë bë' ta'nná bé'enë' légaquië', ate' nupa ni' nácagacarö lo ta'nná be'e la' luzé'eguequisö. ²⁶ Biti' gaca caní queëli'. Núti'tëslöli' libí'ili' nu ré'ëni gaca zxön ga zóali', nu ni ral-la' gun dxin que ia'zíca'röli'.

²⁷ Lësca' caní, núti'tëslöli' libí'ili' nu gué'ëni gaca lo, ral-la' gaca ca tu bönni' nadó'o que ia'zíca'röli'. ²⁸ Lësca' neda', Bönni' Guljë' Bönachi,

bida' ni, calëga para nu gun xichina', pero para guna' xichíngaca
bönachi, en udöda' yöl-la' na'bán quia', le quíxjada' ni'a quégaca
bönachi zían para ulu'lágaca.

Ruúnë' Jesús chopë' bönni' nachul-la lógaquië'

(Mr. 10:46-52; Lc. 18:35-43)

- ²⁹ Cate' ni' tu'ruájë' yödzö Jericó, bönachi zían söjácalen Jesús.
³⁰ Nacu'ë chopë' bönni' nachul-la lógaquië' ni', ró'gaquië' ra' nöza. Cate'
 bila'yönnë' ridödë' Jesús ni', gulu'ë zidzaj didza', ta'nnë':
 —Xan, xzí'ini xi'sóë' David, buéchi' ladxi' netu'.
³¹ Bönachi zían nacuá' ni' gulë lógaquië' ila'cu'ë dxisö, pero zídzejrö
 gulu'ë didza', ta'nnë':
 —Xan, xzí'ini xi'sóë' David, buéchi' ladxi' netu'.
³² Ní'irö guzé' ribözë' Jesús, en bulidzë' lógaquië', ate' gunábinë'
 lógaquië', rnnë':
 —¿Bizxi ré'ënili' guna' queéli'?
³³ Të' Jesús:
 —Xan, ré'ënitú' gunu' ga huöálaj guiój lotu'.
³⁴ Ní'irö Jesús buéchi' ládxë'ë lógaquië', ate' gudanë' guiój lógaquië'.
 La' böáljatëgaca guiój lógaquië', ate' yöjácalenë' Jesús.

Ridxinë' Jesús yödzö Jerusalén len yöl-la' ba zxön

(Mr. 11:1-11; Lc. 19:28-40; Jn. 12:12-19)

- 21** ¹ Cate' bila'dxíngalë' yödzö Jerusalén, en ni' nacu'ë ga dë
 yödzö Betfagé ga na' zoa Guí'a Yaga Olivo, ní'irö gusól-lë'ë
 Jesús chopë' bönni' usëda queë', ² ate' rë' lógaquië':
 —Guli'tséajtsöca' yódzödo' ni' ca dódilö ga ni zóaru', ate' la'
 tsöjxáca'tëli'-ba' tuba' burro guná' nága'ba', ate' dzaga lëba' tuba' burro
 biguíú'do'. Guli'tsöjsedxi-ba', en iché'ëli'-ba' quia' ni. ³ Channö nu bi
 guíë libí'ili', guli'guíë nu na': "Xanru' riquinnë'-ba'." Ní'irö isól-lë'ë
 légacaba' quia'.
⁴ Caní guca para gaca lë na' buzúajë' lu guichi bönni' bë'ë didza' uláz
 queë' Dios, gunné':
⁵ Guli'guíë nupa nacuá' yödzö Sión,
 Buli'yútsöca', zë'ë Bönni' inná bé'enë' libí'ili'.
 Lu yöl-la' nöxaj ladxi' queë' dxíë'-ba' tuba' burro.
 Dxíë' cúde'ba' búrrodo' nácaba' xzí'iniba' böa' ruá'aba' yua'.
⁶ Ní'irö bönni' usëda queë' yöjáquië' ni', ate' gulunë' ca na' gunná
 bé'enë' Jesús lógaquië'. ⁷ Gula'ché'ë-ba' burro guná' na', en burro
 biguíú'do' na', ate' bulu'dxíë' cúde'gacaba' yugu' lari' guitsa'
 quégacaba' ate' gudxíë' Jesús lahui' lari' na'. ⁸ Nacuá' ca' bönachi zían
 ni', ate' gula'chilaj yugu' lari' ta'xóa cúde'guequi la' nöza. Ia'zica'rë'

bulu'chibë' zin le bulu'zxóë' ga naca la' nöza. ⁹ Guluí'i zidzaj didza' bönachi na' nanórugaca, en nupa na' sōjácálen Jesús, ta'nná:

—iYöl-la' ba Lë', zxí'ini xi'sóë' David! iBica' ba nu ni za' ni'a que Lë' Xanru'! iYöl-la' ba Dios!

¹⁰ Cate' guyázië' Jesús yödzo Jerusalén, bulu'dzatsa yúgu'të bönachi lu yödzo na', ate' zían nupa gulé luzé'eguequi, ta'nná:

—¿Nuzxi caz bönni' ni?

¹¹ Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn.2 :13-22)

¹² Cate' guyázië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu'tsé'ë dumí yödzo zi'tu', en yugu' le ta'bö'i nupa tuti' gu'dödo'.

¹³ Rë' légaquië':

—Nazúaj lu guichi lá'ayi le rnna: “Lidxa' si'i le, yu'u ga nu ulidza Dios”, pero libí'ili' chinunli' lataj ni ca naca yu'u lídxigaca gubán.

¹⁴ Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zé'ë bila'dxinë' ga na' zoë', ate' Lë' bunë' légaquië'. ¹⁵ Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni runë' Jesús, en bila'yönnë' tuí'ibi' bí'ido' zidzaj didza' ga naca chila yudo', ta'nnabi':

—iBica' ba Lë', zxí'ini xi'sóë' David!

¹⁶ Ní'irö të' Jesús:

—¿Naru' cabí riyönnu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: “Li' benu' ga yugu' bi'i cuidi', en yugu' bí'ido' ni' tádxí'bi' gulúl-labi' yöl-la' ba le naca idú.”

¹⁷ Ní'irö Jesús bucá'anë' légaquië', ate' burúajë' Jerusalén. Guyijë' yödzo Betania ga ni' bugá'anë' idú yëla.

Jesús rulidza zi'ë yaga higo

(Mr. 11:12-14, 20-26)

¹⁸ Cate' za' rení', ate' ni' söhuójë' Jesús Jerusalén, ridunë'. ¹⁹ Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzólinë' lu yaga na'. Xilágui'sö dxía. Ní'irö Jesús gudxë' le:

—Bíti'rö cuía le ribía quiu'.

La' gubídxitë yaga higo na'. ²⁰ Cate' bila'lé'enë' bönni' usëda queë' lë ni, bulu'bánninë', ate' gula'nábinë' Jesús, ta'nné':

—¿Nacxi caz guca, gubídxitë yaga ni?

²¹ Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en biti' gaca chopa ládxi'li', calégasö huáca gunli' ca na' bena' que yaga ni, pero channö guiéli' guí'a ni: Gucuíta, en yöjsóa lu nísado', gaca ca na' innali'.

²² Lësca' caní, yúgu'të le inábali' cate' ulídzali'-në' Dios, channö huayéjlë'ëli' gunnë' Dios queéli', huazí'ili' lë na' inábali'.

Yöl-la' unná bë' dë lu në'ë Jesús

(Mr. 11:27-33; Lc. 20:1-8)

²³ Ní'irö guyázië' Jesús chila yudo', ate' tsanni ni' rusédinë' bönachi nacuá' ni', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesús, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

²⁴ Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bë' dë lu na'a runa' caní. ²⁵ ¿Nuzxi caz gusöl-la' Juan para buquilë' bönachi nisa? ¿Naru' Dios gusöl-lë'ë lë', o gula'sól-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiétë' rë'u: “¿Bizx que biti' guyéajlë'ëli' lë'?” ²⁶ Na'a, channö innaru': Gula'sól-lë'ë yugu' bönni' lë', rádxi'ru' le ilún bönachi lu yödzö tu' ta'yéajlë'ë yúgu'të' Juan na' bë'ë didza' uláz queë' Dios.

²⁷ Que lë ni na' bulu'bi'ë didza', të' Jesús:

—Biti' nöztu'.

Jesús rë' légaquië':

—Neda' ca', biti' guía' libí'ili' bizxi yöl-la' unná bë' dë lu na'a runa' lë ni.

Rucúdzu'ë didza' Jesús ca gulunbi' chópabi' xzí'inë' tu bönni'

²⁸ Ní'irö Jesús gudxë' yugu' bönni' yudo' na':

—¿Nacxi rusáca'li' queéli'? Guzóë' tu bönni' nacuá'abi' chópabi' bi'i bönni' queë', ate' yöjödxe'-bi' tubi' bi'i queë' na', gunné': “Zxí'ina', guyéaj na'a tsöjenu' dxin ga naca luyú quia' ga ró'gaca lubá uva.”

²⁹ Bubí'ibi' didza' bi'i na', gúdxibi'-në': “Biti' ré'ënda' tseja'.” Gudödi ni' bubí'i ládxi'bi', ate' yöjenbi' dxin. ³⁰ Ní'irö bönni' na' yöjödxe'-bi' ia'tubi' bi'i queë' na', en la' tuz ca gunné', ate' bubí'ibi' didza' bi'i ni, gúdxibi'-në': “Huaca, Dad. Uyéaja'.” Biti' guyéajbi' bi'i ni. ³¹ ¿Núzxilöbi' bi'i chopa ni benbi' le guyaza ládxe'ë xúzibi'?

Bulu'bi'ë didza', të' Jesús:

—Bi'i zí'alö na'.

Ní'irö Jesús rë' légaquië':

—Le nácatë rea' libí'ili', ila'nóruë' bönni' uquízxaj tuá' dö', en yugu' nigula udá dzaga ca libí'ili', ate' ila'yázië' ga ni' rinná bè'ë Dios. ³² Caní gaca, tu' bidë' Juan, bönni' buquile' bönachi nisa, ga zóali', en busédinë' libí'ili' le naca tsahui' ca ral-la' gunli', ate' libí'ili' biti' guyéajlë'ëli' lë', pero yugu' bönni' uquízxaj, en yugu' nigula udá dzaga gula'yéajlë'ë lë'. Sal-la' bilé'eli' lë ni, biti' bubí'i ládxi'li' para tséajlë'ëli' lë'.

Rucúdzü'ë didza' Jesús ca béngaquië' bönni'
huen dxin biti' nácaquië' tsahui'
(Mr. 12:1-12; Lc. 20:9-19)

³³ Gunnë' ca' Jesús:

—Buli'zé nágali' ia'tú le ucúdzü'a didza'. Guzóë' tu bönni' xan yu'u, ate' bönni' ni budé'ë yugu' lubá uva luyú queë'. Guléquië' lë'aj que, en guchó'önë' tu lerui guió'j ga isíë' xisi uva na'. Benë' ca' tu yu'u xitsá' ga gaca nu uyú idútë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéajë' yödzö zi'tu'.

³⁴ 'Cate' chibidxín dza ulu'chibë' yugu' lubá uva na', gusól-lë'ë bönni' xan luyú na' bal-lë' ni'a në'ë ga na' nacü'ë bönni' huen dxin ni' para ulu'zi'ë lu ná'agaquië' uláz queë'. ³⁵ Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'túë' bétigaquië' lë', en ia'túë' bulu'ladxë' lë' guió'j. ³⁶ Leyúbölö bönni' xan luyú na' gusól-lë'ë ca' ia'zica'rë' ni'a në'ë, ate' guláquië' zióntërë' ca nupa na' gusól-lë'ë zí'alö, ate' la' tuz ca gulunë' bönni' huen dxin ni' quégaquië'.

³⁷ 'Ga yöjsete, gusól-lë'ë ca' zxí'inë' ga na' nacü'ë. Guzá' ládxië'ë, rnnë': Hualunë' bal bi'i quia'. ³⁸ Cate' yugu' bönni' huen dxin na' bila'lé'enë'-bi' zxí'inë', la' gula'nnatë' la' légacasë': "Bi'i ni guequi queébi' luyú ni. Guli'dá, gútiru'-bi', ate' le ral-la' guequi queébi' guequi queéru'." ³⁹ Ní'irö gula'zönë'-bi', ate' bulu'béajë'-bi' ní'ilö luyú ga na' ró'gaca lubá uva, ate' bétigaquië'-bi' ni'.

⁴⁰ Ní'irö Jesús gunábinë' légaquië', gunné':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

⁴¹ Bulu'bi'ë didza' bönni' yudo' na', të' Jesús:

—Usunítië' bönni' tuá' dö' na', ate' luyú queë' na' udödë' lu ná'agaquië' ia'zica'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

⁴² Ní'irö Jesús gudxë' légaquië':

—¿Naru' catu caz nulábanili' lë na' nazúaj lu guichi lá'ayi ca naca lë ni? Caní rnna:

Guió'j na' gula'ru'unë' bönni' tu'cu'ë zö'ö,

la' guió'j ná'asö chinaca guió'j len zö'ö.

Lë cazë' Xanru' benë' ga naca caní,

ate' naca tu le run ga rubániru'.

⁴³ 'Que læ ni na' rea' libí'ili', xilátjali' ga na' rinná bè'ë Dios idúa queé'li', en gata' quégaca bönachi ilún ca ral-la' gun nu nadelí' lataj ni'.

⁴⁴ Nu tsøjchegu' lu guió'j ni, la' cuinsi quitsaj, ate' channö guió'j ni tseajbaga' bönni' na', uzxuzxaj læ'.

⁴⁵ Cate' yugu' bixúz unná bè', en yugu' bönni' yudo' fariseo bila'yönnë' læ na' bucúdzu'ë didza' Jesús, téquibe'enë' bè'ë Jesús didza' ca naca quégaquië'. ⁴⁶ Gula'zóa gula'bö'ë ila'zönë' Jesús, pero guládxinë' bi ilún bönachi zían nacuá' ni' tu' ta'yéajlë' náquië' Jesús bönni' ru'ë didza' uláz queë' Dios.

Rucúdzu'ë didza' Jesús ca naca que laní que yöl-la' rutsaga na'

22 ¹ Jesús bé'lenë' légaquië' didza' leyúbölö, ate' bucúdzu'ë didza', rnnë':

² —Ca gaca quégaca nupa ila'yaza ga rinná bè'ë Dios yehua' yubá naca ca guca quégaca nupa bulidzë' tu bönni' rinná bè'ë cate' benë' laní que dza utsaga ná'abi' bi'i bönni' queë'. ³ Gusól-lë'ë ni'a në'ë tsøjxí'gaquië' yugu' bönni' chinulidzë' para guídagaquië' laní queé'bi', pero biti' gulé'ënë' guídagaquië'. ⁴ Ní'irö gusól-lë'ë ia'zícá'rë' ni'a në'ë, en gudxë' légaquië': "Guli'tsøjódxitsöca' nupa na' chinulidza', na' guié'li' légaquië': Buli'yútsöca', chinupá'a la' huagu. Chibétia'-ba' yugu' xpëdxa', en yugu' böa' bëdxi renni' quia'. Yúgu'të chinupá'a. Guli'dá, sóaru' laní queé'bi' bi'i bönni' quia' utsaga ná'abi'." ⁵ Yugu' bönni' na' yöjlídzagaquië' biti' gulunë' légaquië' bal, ate' yöjáquië' que queé'gaquië'. Tuë' yöjenë' dxin, en ia'túë' guyijë' tsøjö'u tsøjé'ti'ë.

⁶ Ia'zícá'rë' gula'zönë' yugu' ni'a në'ë na', ate' gulu'ë dö' quégaquië', en bétgaquië' légaquië'. ⁷ Cate' bönni' na' rinná bè'ë biyönnë' læ ni, gulénë', en gusól-lë'ë yugu' bönni' queë' røjáquië' gudil-la, ate' bétigaquië' yugu' bönni' hueti bönachi na', en bulu'qué'lë'ë guí' ládzagaquië'. ⁸ Ní'irö bönni' na' rinná bè'ë gudxë' yugu' ni'a në'ë, gunné': "Le nácatë chinupá'a que laní na', pero yugu' bönni' bulidza' biti' guláquië' lesaca' guídagaquië' laní quia'. ⁹ Guli'tséajtsöca' gapa naca la' nöza, en buli'lidza yúgu'të nupa tsøjxáca'li' ni' para guídagaca laní queé'bi' bi'i bönni' quia' utsaga ná'abi'." ¹⁰ Ní'irö bila'rúajë' ni'a në'ë na', søjáquië' gapa naca la' nöza, ate' bulu'tubë' yúgu'të nupa yöjxáca'gaquië', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

¹¹ 'Cate' guyázië' bönni' na' rinná bè'ë para uyúë' nupa ni' nudúbigaca, bilé'enë' tu bönni' biti' nácuë' lari' tsahui' le bunödzjë' quégaquië' bönni' nacu'ë laní na'. ¹² Ní'irö gudxë' bönni' na': "Bönni'do', ÷zóatso' ni, en biti' nacu' lari' tsahui' bunödzja' quégaca nupa nacuá' laní?" Bönni' na' busayaj ru'ë. ¹³ Ní'irö bönni' na' rinná bè'ë gudxë' nupa na' tun xichinë', gunné': "Guli'guga' ni'a në'ë bönni' ni. Guli'tsøjchú'un-

nē' ní'ilö ga na' rö'ö chul-la. Ni' cödxë', en utíl-la láyë'ë, lu yöl-la' ruhuí'ini queë'."

¹⁴ Ní'irö Jesús gudxë' légaquië':

—Zian nupa nulidza', pero nabábasö nupa ila'rógaca.

Jesús ru'ë didza' ca naca le riguízxaj lázaru'

(Mr. 12:13-17; Lc. 20:20-26)

¹⁵ Ní'irö yugu' bönni' yudo' fariseo na' bulu'zé'ë ni', ate' gulún xtídza'gaquië' ilunë' ga bi inné' Jesús para gaca ulu'zéguië' Lë' didza'.

¹⁶ Para ilunë' caní, gula'sól-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulé Jesús:

—Bönni' Usedi, nöztu' Li' ru'u didza' cátëze naca, en naca idútë li ca rusédinu' ca naca queë' Dios, en biti' ruí'i ládxi'u le ta'nná quiu' bönachi, tu' cabí ruchi'a rusöröu' bönachi ca naca le ta'nnasö bönachi na'. ¹⁷ Gudíxjöi'i netu'. ¿Nacxi runi li? ¿Naru' run bayudxi, o biti' run bayudxi quíxaj laztu' queë' César, bönni' yödzö zi'tu' na' rinná bé'enë' rë'u?

¹⁸ Réquibe'enë' Jesús té'ënnë' ulu'béajë' Lë' didza', ate' gudxë' légaquië':

—Libi'ili', bönni' ruluí'isö tsahui' cuinli', ¿bizx que ruí'ili' didza' le ruzóa neda' ra' guí'a? ¹⁹ Buli'luí'i neda' dumí le riguízxaj lázali'.

Ní'irö bulu'luí'inë' Lë' tu dumí que yödzö Roma. ²⁰ Jesús gunábinë' légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

²¹ Të' Lë':

—Queë' César na'.

Ní'irö Jesús gudxë' légaquië':

—Guli'guíxjé' César le nequi queë' César, ate' Dios le nequi queë' Dios.

²² Cate' bila'yönnë' lë ni, bulu'bánnë' ca naca didza' tsahui' bubi'ë Jesús, ate' bulu'cá'anë' Lë', söhuóajtëgaquië'.

Ta'nabi yúdxinë' Jesús ca ulu'bán nupa chinátigaca

(Mr. 12:18-27; Lc. 20:27-40)

²³ La' dza ná'asö yugu' bönni' yudo' saduceo, bönni' na' ta'nné' biti' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë', ²⁴ ta'nné':

—Bönni' Usedi, Moisés gunné': "Channö gátië' tu bönni' zóanu nigula queë', en cuntu nu bi'i zóabi' queë', ní'irö bi'i bóchë'ë bönni' na' ral-la' utsaga ná'alénbi'-nu nigula uzëbi queë', para cabí initi di'a dza queë' bönni' bóchi'bi' na'." ²⁵ Gula'cuá'abi' gadxi bi'i bönni' ga zóatu', naca bóchi'gacabi'. Bi'i zí'alö na' butsaga ná'alénbi'-nu nigula, ate' gútitébi'. Tu' cuntu nu bi'i queébi' zóabi', bi'i buropi na' butsaga ná'alénbi'-nu

nigula uzëbi queëbi' bi'i böchi'bi' na'. ²⁶ Lësca' caní guca queëbi' bi'i buropi na', enca' queëbi' bi'i bunni, en la' tuz ca guca quégacabi' igádxitëbi', gulátibi' yúgu'tëbi'. ²⁷ Ga búdxitë gútinu ca' nigula na'. ²⁸ Cate' idxín dza ulu'bán nupa chinátigaca, ñnúzxilögacabi' bi'i gadxi ni' guéquinu nigula na' queëbi', tu' bulu'tsaga ná'aleni'-nu yúgu'tëbi' nigula na'?

²⁹ Ní'irö bubi'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios. ³⁰ Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en biti' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacué yehua' yubá. ³¹ Ca na' ral-la' ulu'bán nupa chinátigaca, ñnaru' cabí nulábanili' lë na' gudxi cazë' Dios libí'ili'? ³² Caní gunné': "Neda' naca' Dios queë' Abraham, en Dios queë' Isaac, en Dios queë' Jacob." Dios na' biti' náquië' Dios quégaca nupa nátigaca tsaz, pero náquië' Dios quégagaquië' bönni' ni nabángagaquië' sal-la' gulatië'.

³³ Cate' bila'yöni bönachi nacué' ni' didza' ni, bulu'bani ca naca lë na' rusédinë' Jesús léguequi.

Xibá queë' Dios le naca lo

(Mr. 12:28-34)

³⁴ Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'. ³⁵ Tuë' bönni' nútsë'ë ladjagaquië', en nazëdë' xibá queë' Moisés, gú'unnë' si' bë'ë Jesús. ³⁶ Que lë ni na' gunábinë' Jesús, rnnë':

—Bönni' Usedi, ñbízxilö xibá queë' Dios naca lo?

³⁷ Jesús rë' lë':

—Idxi'inu' Xanu' Dios idú ládxi'u, en idú icja ládxi'do'o, enca' len idú yöl-la' réajni'i quiu'. ³⁸ Xibá ni naca lo, en nazáca'tërö. ³⁹ Xibá na' naca buropi, la' ca nácatë, en caní rna: "Idxi'inu' böchi' luzó'o ca nadxí'i cuinu'." ⁴⁰ Chopa xibá ni nácagaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi xxi'ini náquië' Cristo?

(Mr. 12:35-37; Lc. 20:41-44)

⁴¹ Tsanni ni' naculé tsözxón bönni' yudo' fariseo na', Jesús gunábinë' légaquië', ⁴² rnnë':

—¿Nacxi rusáca'li' queëli' queë' Bönni' na' lë' Cristo? ¿Nuzxi xxi'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

⁴³ Ní'irö Jesús rë' légaquië':

—¿Bizx que na' lë cazë' David bulidzë' Lë', gunné': "Xana"? Caní gunné' cate' ni' bë'ë didza' uláz queë' Dios Bö' Lá'ayi, gunné':

⁴⁴ Xanru' Dios gudxë' Xana':

"Guró'ö cuita lë'a ibëla,

cate' gunra' ga ulu'zechu zxíbigaca Lo' nupa tequi Li' zi'."

⁴⁵ Channö David na' gunné' queë' náquië' Xanë', ñnacxi caz naca, rnnali' náquië' zxí'ini xi'sóë' David na'?

⁴⁶ Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

Jesús ruzégui'ë yugu' bönni' yudo' didza'

(Mr. 12:38-40; Lc. 11:37-54; 20:45-47)

23 ¹ Ní'irö Jesús bé'lenë' bönachi nacua' ni' len yugu' bönni' usëdi queë' didza'. ² Rë' légaquië':

—Yugu' bönni' yudo' fariseo, en yugu' bönni' yudo' usedi nuhuöázagaquië' xilatjë' Moisés, en tu'sédinë' bönachi. ³ Que lë ni na', guli'gún yúgu'të le ilé' libí'ili', pero biti' gunli' libí'ili' ca na' tunë' légaquië', tu' tu le ta'nnë', en ia'tú le tunë'. ⁴ Le ta'nná bé'enë' bönachi naca ca tu yua' zi'i le cabí sequi' nu guá', ate' tu'gu'ë le ya'zxicjagaca bönachi, pero légaquië' biti' té'ënnë' ulu'tenë' le, calëga len tuze xibón ná'agaquië'. ⁵ Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigáagaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'. ⁶ Té'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sëdë' queë' Dios. ⁷ Lësca caní, té'ënnë' ulu'gapa bönachi légaquië' didza' ba zxön gapa naca lógaca bönachi, en té'ënnë' ilé bönachi légaquië': "Padiux, bönni' usedi."

⁸ 'Pero libí'ili', biti' ral-la' gunli' ga nu guíë libí'ili': Bönni' Usedi, tu' zoa tuz Nu naca Bönni' Usedi queë'li', neda', Cristo, ate' yúgu'tëli' nácali' bóchi'li' tuli' ia'tuli'. ⁹ Cuntu nu guiëli' luyú ni, biti' innali': Xuz, tu' zoa tuz Nu naca Xúzili', zoë' yehua' yubá. ¹⁰ Biti' gunli' ga nu guíë libí'ili': Xan, tu' zoa tuz Nu naca Xanli', neda', Cristo. ¹¹ Nu nutsa' ladjali' nu run xichinli' ia'zica'röli', nu ni na' gácarö lo ga zóali'.

¹² Channö nu uzóa cuini lataj lo, cá'asö ugá'ana nu na', pero nu naca nōxaj ladxi', gaca lo.

¹³ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Ruzága'li' nöza sōjácálen bönachi para ila'dxín ga ni' rinná bë'ë Dios yehua' yubá. La' libí'isili' biti' sequi' tsú'uli', en biti' ruí'ili' lataj ila'yú'u nupa té'ëni ila'yú'u.

¹⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Rugúali' yugu' lidxigacanu

nigula uzébido', en para uluí'isö tsahui' cuinli', xidzé rulídzali'-në' Dios. Que læ ni na', zítërö irugu queéli' quí'i sáca'li'.

¹⁵ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Ridódili' idú lu nísado', en idú yödzölió ni para gunli' ga tseaj ládxë'ë tu bönni' Dios tsözxön len libí'ili', en cate' chiguzxéqui'li'-në', runli' ga nabága'rë' xíguia' ca libí'ili', ate' tsöjtsu'ë lu guí' gabila.

¹⁶ 'Bica' bayechi' libí'ili'. Nachul-la loli', ate' ré'ënili' uluí'ili' nöza bönachi. Caní naca queéli' tu' rnnali': "Channö bi rizí' lu në'ë tu bönni' ni'a que yudo', biti' run bayudxi, pero channö runë' le ni'a que oro dzö'ö yudo', bayudxi gun." ¹⁷ Libí'ili', bönni' lo chul-la, en tu' caréajni'i. ¿Bízxilö nácarö lo? ¿Naru' oro na', o yudo' le run lá'ayi oro na'?

¹⁸ Lësca' caní rnnali': "Channö nu bönni' gunë' le ni'a que bucugu lá'ayi, biti' gun bayudxi, pero channö gunë' le ni'a que gun zxoa lahui, bayudxi gun." ¹⁹ Libí'ili', nazídili', en nachul-la loli'. ¿Bízxilö nácarö lo? ¿Naru' gun zxoa láhuisö, o bucugu lá'ayi na' run lá'ayi gun na'? ²⁰ Que læ ni na', channö nu bönni' runë' le ni'a que bucugu lá'ayi, runë' le ni'a que le, enca' ni'a que yúgu'të le zxóagaca láhuisö. ²¹ Lësca' caní, channö nu bönni' runë' le ni'a que yudo', runë' le ni'a que le, enca' ni'a queë' Dios, nun cazë' xilatjë' ni'. ²² Lësca' caní, channö nu bönni' runë' le ni'a que yehua' yubá, runë' le ni'a que lataj ga rö'ë rinná bë'ë Dios, enca' ni'a que Lë cazë' Dios rö'ë ni'.

²³ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Caní naca queéli' tu' riguízxjali' que yudo' tu cö' huéaj tu' chi cö' le rizí'ili' que xöhuéaj, en que guixi' anís, en que comino la' huagu, pero rucá'anali' le nácarö lo le rinná bë' xibá queë' Dios, tu' cabí runli' le naca tsahui', en biti' ruhuéchi' ládxi'li' luzá'ali', en biti' réajlë'ëli'-në' Dios. Yugu' læ ni run bayudxi gunli', en lës biti' ucá'anali' ia'zíca'rö læ na' runli', le riguízxjali' que yudo'. ²⁴ Libí'ili', nachul-la loli', en ré'ënili' uluí'ili' nöza bönachi. Ca na' runli' naca ca rudódili' bödzádzado' le ré'jali', rubéajgacali'-ba' bö'iyudo', pero ré'jali'-ba' böa' ta'bíë'-ba' bönni'.

²⁵ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Nácali' ca zxíga'do' ré'jali', en yó'öna ráhuili'. Riguíbili' le nuá' cuita læ'e, pero lu icja ládxi'do'oli' nalí yugu' le ribanli', en yugu' le ruá' dö' runli'. ²⁶ Libí'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yó'öna, læ na' sa'yéaj gácali' tsahui' lu icja ládxi'do'oli', para gácali' ca' tsahui' cuita lé'ëli'.

²⁷ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Caní naca queéli' tu' nácali' ca yugu' yeru ba quégaca nupa chinátigaca, le nácagaca chiguíchido'os cuita læ'e, en le nácatë lachi nalá'gaca, pero nalígaca dxita quégaca

nupa chinátigaca, enca' yúgu'të le siguti. ²⁸ Lësca' caní nácali' libí'ili'. Le nácatë láhuisö ruluí'i cuinli' tsahui' lógaca bönachi, pero lu icja ládxi'do'oli' nalili' yugu' le ruluí'isö tsahui' cuini, en le ruá' dö' runli'.

²⁹ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ruí'ili' biquitaj gapa nagáchi'gaca bönachi tsahui'. ³⁰ Lësca' caní rnnali': "La'tu zóatu' dza ni'te cate' gula'cu'ë xuz xtó'otu', biti' guntu' légaquië' tsözxón cate' gulútië' yugu' bönni' gulu'ë didza' uláz queë' Dios." ³¹ Tu' rnnali' caní, la' libí'isili' runli' ba nalí nácali' zxí'ini xi'sóagaca nupa ni' bétigaca yugu' bönni' gulu'ë didza' uláz queë' Dios. ³² Caní naca, rusubaga' cuinli' xíguia' na' gula'báguië' xuz xtó'oli'.

³³ 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabila? ³⁴ Que lë ni na', neda' isól-la'a queé'li' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zíca'rë' udá'ali' lë'e yaga cruz, en ia'zíca'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö. ³⁵ Caní gaca, ibága'li' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bétigaca Zacarías, zxí'inë' Berequías, bönni' na' bétili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' böa' bédxido' lahuë' Dios. ³⁶ Le nácatë rea' libí'ili', yúgu'të lë ni ila'baga' bönachi nacuá' dza ni zóaru' na'a.

Jesús ribödxë' ni'a que yödzö Jerusalén

(Lc. 13:34-35)

³⁷ Lësca' caní gunné' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxigacali' guió'j nupa nasól-lë'ë Dios. Zían luzuí' gú'unida' utuba' libí'ili' quia', ca runba' yöjede, rutúbiba' bórado' queé'ba' zxañ xíliba', pero biti' gú'unili'. ³⁸ Buli'yútsöca', cá'asö ugá'ana yu'u lídxili'. ³⁹ Caní gaca, tu' rea' libí'ili', na'a isí lo biti' ulé'eli' neda' cate' innáröli': "Lá'ayi náquië' Bönni' na' zë'ë uláz queë' Xanru'."

Rigúíxjö'ë Jesús ca si' ulu'quínnejë' yudo'

(Mr. 13:1-2; Lc. 21:5-6)

24 ¹ Birúajë' Jesús chila yudo', en tsanni ni' rizé'ë ni', gula'bígui'ë bönni' usëda queë' ga na' zoë', ate' bulu'luí'inë' Lë' ca nácatë zö'ö nagú'ugaca lë'a yudo'. ² Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', biti' ca' ugá'ana guió'j nabaga' luzé'e ni, le cabí igúinnaj.

Le ilaca bè' chizóa idxín dza údxi que yödzölió

(Mr. 13:3-23; Lc. 21:7-24; 17:22-24)

³ Cate' ni' röl'è Jesús ga naca lu Guí'a Yaga Olivo, bila'dxinè' bönni' usèda queè' ga na' zoè' queézè', en tè' Lè':

—Gudíxjöi'i netu', ìbátaxi ilaca lè ni, en bizxi gaca bè' dza huödu', en dza údxi que yödzölió ni?

⁴ Ní'irö bubi'è didza' Jesús, ate' rë' légaquiè':

—Buli'yú para cabí nu si' ye'e libí'ili', ⁵ tu' zá'gaquiè' zían bönni' légaquiè' ca lea' neda'. Ila'nné' nácagaquiè' Cristo, en ila'zí' yé'enè' bönachi zían. ⁶ Huayónili' raca gudil-la, en le ruí'i didza' que gudil-la, pero biti' có'öli' böniga, tu' ral-la' ilaca yúgu'tè lè ni, pero cabí ridxini dza údxi cate' ilácarö lè ni. ⁷ Til-la tu yödzö len ia'tú yödzö, ate' tu ga nu rinná bè' len ia'tú ga nu rinná bè'. Ilatsaj yödzöhué' zxön, en gaca gubín, ate' zían lataj tödi budó' zxu'. ⁸ Yúgu'tè lè ni nácagaca le isí lógaca yugu' le ila'guí'i ila'zaca' bönachi.

⁹ Ní'irö ulu'dödi bönachi libí'ili' lu na' nu usaca' zi' libí'ili'. Yúgu'tè bönachi ulu'dí'i libí'ili' tu' dá'ali' neda', en ilútiè' bál-lali' libí'ili'.

¹⁰ Cate' gaca caní, gaca chopa ládxi'gaca zían bönachi, en ulu'cá'ana neda', ate' udödi tu ia'tú luzé'e, en tu ia'tú udí'i luzé'e. ¹¹ Ní'irö ulu'luí'i lógaquiè' zían bönni' ta'zí' yè'è. Ulu'luí'i cúngaquiè' ca yugu' bönni' tu'è didza' uláz queè' Dios, en ila'zí' yé'enè' bönachi zían. ¹² Iluá'ada' dö' bönachi, ate' que lè ni na' bíti'rö ila'dxí'i böchi' luzé'eguequi. ¹³ Nu guequi tsaz queè' Dios ga idxintè dza údxi, nu ni ulá. ¹⁴ Idú yödzölió gaca libán que didza' dxi'a ca rinná bè'è Dios para gaca ba nalí que lógaca yúgu'tè bönachi izá'a, ate' ní'irö idxín dza údxi.

^{15,16} 'Nu ulaba lè ni ral-la' uzéajni'i ladxi'. Gunné' Daniel, bönni' bè'è didza' uláz queè' Dios, gunné': "Tsaza le rudí'inè' Dios lataj lá'ayi queè' Dios, lè na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzxúnajli' saca' guí'ado'. ¹⁷ Nu dxía ícjo'olö biti' gal-la' huötaj tsöjzxí' bi dè que lu yu'u, pero ral-la' izxúnajtè. ¹⁸ Nu zoa la' guixi', biti' gal-la' huóaj tsöjzxí' lari' que. ¹⁹ Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxí'nu-bi' bí'ido' quégacanu cate' idxín dza ni'. ²⁰ Buli'lidzè' Dios inábili'-nè' cabí idxín dza ni' izxúnajli' cate' raca beo' ziaga o cate' naca dza lá'ayi, ²¹ tu' ila'guí'i ila'záca'tërö bönachi dza ni' ca gula'guí'i gula'zaca' bönachi dza ni'te cate' si' guta' guró'ö yödzölió, ga ridxintè na'a dza, en calëga dza zá'gaca biti' ila'guí'i ila'zaca' caní. ²² Cate' idxín dza ni', channö Dios biti' cuéqui lahuè' quégaquiè', cuntú nu ulá, pero cuéqui lahuè' quégaquiè' dza ni', en gácalenè' nupa guró' cazè' Lè'.

²³ Ní'irö biti' tséajlè'èli' channö nu idxín queé'li', en guíè libí'ili': "Buli'yútsöca', ni zoè' Cristo", o inná: "Ni' zoè'." ²⁴ Ulu'luí'i lógaquiè' zían bönni' ta'zí' yè'è, en ila'nné' nácagaquiè' Cristo, o ila'nné' tu'è

didza' uláz queë' Dios. Ilunë' le ilaca bë', en le ilún ga ulu'bani bönachi, ate' ila'zí' yé'enë' nupa guró cazë' Dios channö huala'zéqui'në'.

²⁵ Buli'yútsöca', chigudxi caza' libí'ili' yúgu'të lë ni zí'atëlö ca si' ilaca.

²⁶ Que lë ni na', biti' irúajli' channö ila'dxín queéli' nupa ilé libí'ili': "Buli'yútsöca', ni' zoë' Cristo lu lataj cá'asö." Lësca' caní, biti' tséajlë'ëli' channö ila'nná: "Buli'yútsöca', lu yu'u zoë'." ²⁷ Ca na' raca cate' rëpi yösa ga rilén gubidza, en ruzení' ga ribía gubidza, lësca' caní gaca cate' huöda' neda', Bönni' Guljë' Bönachi. ²⁸ Ilácatë caní, ca na' ta'nná bönachi: "Gáti'tës ga dë tu le nati, ni' ulu'dubi cázaba' bíchulab."

Ca gaca cate' huödë' Bönni' Guljë' Bönachi

(Mr. 13:24-37; Lc. 21:25-33; 17:26-30, 34-36)

²⁹ Gunnë' ca' Jesús:

—Tödi yugu' dza ni' cate' ila'guí'i ila'zaca' bönachi caní, ichul-la gubidza, ate' beo' biti' gunna bení' que. Ila'guínnajba' böla'j lúzxiba, ate' ila'zxízi le nalá'gaca naca tsutsu lúzxiba. ³⁰ Ní'irö ilá' lahui lúzxiba le gaca bë' huöda' neda', Bönni' Guljë' Bönachi, ate' ila'bödxí yechi' yúgu'të bönachi yödzölió ni, cate' ila'lé'e neda', Bönni' Guljë' Bönachi, suzá'a lu böaj lúzxiba, dë lu na'a yöl-la' unná bë', en yöl-la' huáca zxön. ³¹ Ní'irö isól-la'gaca'-në' gubáz lá'ayi quia'. Ulu'cödxë' zidzaj lúzuba' böa' guixi', ate' ulu'tubë' nupa nabó'a' quia', nacuá' idapa la'atë yödzölió, en yúgu'të lataj zzan lúzxiba.

³² 'Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a në'e yúludo', en chirubía xilagui' yúludo', inózili' chizóa idxín cusubá. ³³ Lësca' caní, cate' ilé'eli' taca yúgu'të lë ni, inózili' chizóa idxín dza údxí na', en chiridzaga lahui. ³⁴ Le nácatë rea' libí'ili', yúgu'të lë ni ilaca zí'atëlö ca ilátigaca bönachi nacuá' dza ni'. ³⁵ Huadödi quégaca lúzxiba, en luyú ni, pero yugu' xtídza'a biti' ila'dödi cá'asö.

³⁶ 'Cate' idxín dza ni' cuntú nu nözi. Biti' nózguequinë' gubáz lá'ayi queë' Dios nacu'ë yehua' yubá, en biti' nözda' neda', Zxí'inë' Dios, pero tuzë' Dios Xuz nózine'.

³⁷ 'Ca na' guca dza cate' ni' zoë' Noé, lësca' caní gaca cate' huöda' neda', Bönni' Guljë' Bönachi. ³⁸ Yugu' dza ni' zí'atëlö ca si' idxín nisa guiój le busuniti yödzölió, gulë'aj gulahuë', bulu'tsaga ná'agaquië', en bulu'dödë' zxí'inigaquië' lu yöl-la' rutsaga na' ga bidxintë dza guyázië' Noé lë'e barco zxön ni' benë', ³⁹ en biti' guléquibe'enë' cate' bidxintë nisa guiój le busuniti yödzölió, ate' gula'nítië' yúgu'të'. Lësca' caní gaca cate' si' huöda' neda', Bönni' Guljë' Bönachi, cuntú nu guéquibe'e.

⁴⁰ Dza huöda' ila'cu'ë chopë' bönni' la' guixi'. Tuë' uchë'a-në' quia', ate' ia'túë' ucá'ana'-në'. ⁴¹ Ila'cuá'anu chópanu nigula nacuá'anu huëtu. Tunu uchë'a-nu quia', ate' ia'tunu ucá'ana'-nu.

⁴² 'Buli'subán ládxi'li' tu' cabí nózili' bizxi dza huöda' neda', Xanli'.

⁴³ Na'a, guli'tséajni'i lë ni. La'tu' nózine' xan yu'u bizxi dza guídë'

gubán, huané'ë yëla, en biti' gu'ë lataj nu quidaj zö'ö para cuan le dzö'ö lidxë'. ⁴⁴ Que lë ni na', buli'subán ládxi'li' ca' libí'ili', tu' huöda' neda', Bönni' Guljë' Bönachi, tu dza biti' nuzóa icjali'.

Bönni' huen dxin tsahui', en bönni' huen dxin biti' náquië' tsahui'

(Lc. 12:41-48)

⁴⁵ Gunné' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu në'ë bönachi nacuá' lidxë' para gu'ë le ilágugaca cate' idxín dza? ⁴⁶ Bica' ba bönni' huen dxin na' náquië' tsahui', bönni' na', cate' udxinë' xanë', uduxáquië' lë' caní runë' le nudödë' xanë' lu në'ë. ⁴⁷ Le nácatë rea' libí'ili', yúgu'të le dë queë' xanë', udödë' lu në'ë bönni' huen dxin na' runë' caní. ⁴⁸ Channö huóáquië' bönni' huen dxin queë' huiá' dö', en sa' ládxi'ë, innë': “Huadzenë' xana', en biti' huódatië'”, ⁴⁹ en channö isí lahuë' gundë' zi' bönni' túnlenë' lë' tsözxón dxin, en isí lahuë' ca' guí'aj gágulenë' nupa ta'zudxi, ⁵⁰ ní'irö huödë' xanë' bönni' huen dxin na' tu dza cate' biti' zoë' ribözë', o tu yëla biti' réquinë'. ⁵¹ Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'luí'isö tsahui' cuínguequi. Ní'irö cödxí yechë'ë, en gagu zxea láyë'ë.

Rucúdzü'ë didza' Jesús ca naca quégacabi' chibi' bi'i nigula ra'bando'

25

¹ Gunné' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca guí' quégacabi', ate' bila'rúajbi' tsöjtságagacabi' bönni' utsaga në'ë. ² Gáyu'bi' nácagacabi' bi'i biti' ta'yéajni'ibi' ate' ia'gáyu'bi' nasína'gacabi'. ³ Yugu' bi'i nigula biti' ta'yéajni'ibi' na' gula'zí'ibi' le nuá'gaca guí' quégacabi' pero biti' guluá'abi' ia'lati' za régui. ⁴ Yugu' bi'i sina' na' guluá'abi' za régui lu bóga'do' quégacabi' len le nuá'gaca guí' quégacabi'. ⁵ Tu' gudzenë' bönni' utsaga në'ë, gudödi yëla lógacabi', en gulásitëbi'. ⁶ Cate' bidxín idú guluhuëla, biyón chi'i nu rinné zidzaj, rnna: “iChizé'ë bönni' utsaga në'ë! iGuli'rúaj tsöjtságali'-në!” ⁷ Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'. ⁸ Guluí'ibi' didza' bi'i biti' ta'yéajni'ibi' na', en gulëbi' yugu' bi'i sina' na': “Guli'gunna queétu' láti'do' za régui queéli' tu' tu'úlu le nuá'gaca guí' queétu' ni.” ⁹ Bulu'bi'ibi' didza' bi'i sina' na', gula'nnabi': “Biti' gaca, tu' cabí bi ugá'ana queétu', en queéli'. Guli'tséajtsöca' ga ridó'o za régui, tsöj'ó'uli' queéli’.” ¹⁰ Tsanni ni' sōjácabi' sōjxí'gacabi' le, bidxinë' bönni' utsaga në'ë. Yugu' bi'i na' nacuá'abi' sina', en ta'bózabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u. ¹¹ Gudödi ni' ia'zíca'röbi' bi'i nigula ra'bando' na' bila'dxinbi' ni',

ate' bulu'lídzabi'-nè', en gula'nnabi': "Xan, Xan, gusalaj queétu'." ¹² Lè' bubi'è didza', rnnè': "Le nácatè rea' libí'ili', biti' nözda' gazxi libí'ili'."

¹³ Ní'irö Jesús gudxè' légaquiè':

—Buli'subán ládxi'li', tu' cabí nózili' bizxi dza o bizxi yèla huöda' neda', Bönni' Guljè' Bönachi.

Rucúdzu'è didza' Jesús ca naca que dumí zaca'

¹⁴ Gunnè' ca' Jesús:

—Ca gun Nu na' rinná bè' yehua' yubá naca ca benè' tu bönni', chizóa tsejè' zi'tu'. Bulidzè' yugu' bönni' huen dxin queè' en gulu'è yugu' le dè queè' lu ná'agaquiè'.

¹⁵ 'Tuè' bönni' huen dxin na', gulu'è gayu' dumí nazaca' lu nè'è, ate' ia'túè' gulu'è chopa dumí nazaca' lu nè'è. Ia'túè' gulu'è tu dumí nazaca' lu nè'è. Tu tuè' gulu'è lu nè'è tsca huéaj le ila'zéqui'nè'. Ní'irö la' guzá'atè' ga naca zi'tu'. ¹⁶ Guyijè' bönni' huen dxin na' guzxi'è gayu' dumí nazaca' na', en yöjtíljalenè' le ia'gayu' dumí nazaca'. ¹⁷ Lësca' caní, bönni' na' guzxi'è chopa dumí na', yöjtíljalenè' le ia'chopa ca'. ¹⁸ Bönni' na' guzxi'è tu dumí guyijè', en yöjchó'önè' lu yu, ate' bucáchè'è dumí queè' xanè' lu yu ni'.

¹⁹ 'Cate' chigudzé, budxinè' xángaquiè' bönni' huen dxin na', ate' bucá'analénè' légaquiè' tsahui'. ²⁰ Ga gusí lo bidxintè' bönni' na' guzxi'è gayu' dumí nazaca' na', en sunu'è ia'gayu' dumí ca', ate' rè' xanè': "Xan, gayu' dumí gulú'u lu na'a. Ni dè ia'gayu' dumí ca' yöjtíljalena' le."

²¹ Xanè' na' rè' lè': "Naca dxi'a. Nacu' huen dxin tsahui'. Tsáhui'do' benu' cate' ni dè lu no'o láti'do'os. Na'a yénni'tërö cu'a lu no'o. Guyaza ga zoa', udzéjalenu' neda'." ²² Gudödi ni' bidxinè' ca' bönni' huen dxin na' guzxi'è chopa dumí nazaca', ate' rnnè': "Xan, chopa dumí gulú'u lu na'a. Ni dè ia'chopa dumí ca' yöjtíljalena' le." ²³ Ní'irö xanè' na' rè' lè': "Naca dxi'a. Nacu' huen dxin tsahui'. Tsáhui'do' benu' cate' ni dè lu no'o láti'do'os. Na'a, yénni'tërö cu'a lu no'o. Guyaza ga zoa', udzéjalenu' neda'." ²⁴ Ní'irö cate' bidxinè' bönni' huen dxin na' guzxi'è tu dumí nazaca' na', rnnè': "Xan, nözda' nacu' bönni' bizxaj, tu' rulapu' ga biti' guzu', en rutubu' ga biti' guchilju'. ²⁵ Que lè ni na' gúdxida' li', ate' guyija', yöjcácha'a dumí quiu' lu yu. Ni dè na'a le nequi quiu'."

²⁶ Ní'irö bubi'è didza' xanè', en rè' lè': "Nacu' huen dxin biti' naca tsahui', en xöhuèdi. Nöz quézinu' rulapa' ga biti' guza', en rutuba' ga biti' guchilja'. ²⁷ Que lè ni na', gácarö dxi'a quiu' la'tu' bunödzju' dumí quia' lu ná'agaquiè' bönni' ulu'gunè' le dxin, ila'guíljalenè' le ia'lati', para cate' huöda' neda', uzi'a le nequi quia' len icja ca'." ²⁸ Ní'irö xanè' na' gudxè' nupa nacuá' ni': "Guli'cúa dumí na' dè lu nè'è bönni' ni, en guli'cú'u le lu nè'è bönni' na' dè queè' chi dumí." ²⁹ Núti'tès nu rugún tsahui' dxin le dè queè', zoa nu unödzaj queè' ia'lati', ate' gáta'da' queè', pero nu na' biti' rugún tsahui' dxin le dè lu nè'e, la's dui le dè queè'

idúa. ³⁰ Na'a, bönni' huen dxin biti' naca tsahui' ni, guli'tsöjchú'una-në' ní'ilö ga naca chul-la. Ni' cödxí yéché'ë, en gagu zxea láyë'ë.

Cristo uchi'a usöröë' quégaca bönachi

³¹ Gunné' ca' Jesús:

—Cate' ni' huöda' neda', Bönni' Guljè' Bönachi, idinná bè'a, ate' dzágagaquiè' neda' yúgu'tè gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi. ³² Ulu'dubi dërö lahua' neda' bönachi yödzölió ni, ate' ucu'a léguequi tsölá'a huéaj ca runè' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'. ³³ Yugu' bö'cu' zxila' na' ucu'ë-ba' cuita lè'ë ibëla, ate' yugu' chivo na' ucu'ë-ba' cuita lè'ë yögöla. ³⁴ Ní'irö, neda', bönni' unná bè', guía' nupa nacuá' cuita lè'a ibëla, innía': "Guli'dá ga zoa', libí'ili' bubéajè' Xuza' libí'ili' quez queë'. Nequi queéli' lataj ga na' rinná bè'ë, lè na' bupé'ë queéli' dza ni'te cate' ni' benè' yödzölió. ³⁵ Caní nequi queéli' tu' guduna', ate' bännali' le gudahua'. Gubidxa' nisa, ate' bännali' le gu'a. Guca' ca tu bönni' ridá zi'tu', ate' gulú'uli' neda' lídxili'. ³⁶ Biyadzaj le gácua', ate' bugáculi' neda' le ráculi'. Güí'ida', ate' buduyúli' neda'. Guyu'a lidxi guíë, ate' buduyúli' neda'." ³⁷ Ní'irö ulu'bi'ë didza' bönni' tsahui' na', ilé' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bännatu' le gu'u? ³⁸ ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? ³⁹ ¿Bátaxi bilé'etu' Li' güí'inu', o guyú'u lidxi guíë, ate' buduyútu' Li'?" ⁴⁰ Ubi'a didza' neda', bönni' unná bè', ate' guía' légaquiè': "Le nácatè rea' libí'ili', tu' benli' caní queë' nu bönni' bócha'ado' ni, sal-la' náquiè' bönni' cá'asö, quia' neda' caz benli' ca'."

⁴¹ Ní'irö guía' nupa nacuá' cuita lè'a yögöla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' biti' ulu, lè na' bupé'ë Dios ni'a que tu' xihui', en quéguequi gubáz dá'gaca le. ⁴² Caní gaca queéli' tu' guduna', ate' biti' bännali' le gahua'. Gubidxa' nisa, ate' biti' bännali' le guí'ja'. ⁴³ Guca' ca bönni' ridé' zi'tu', ate' biti' gulú'uli' neda' lídxili'. Biyadzaj le gácua', ate' biti' bugáculi' neda' le ráculi'. Güí'ida', enca' guyu'a lidxi guíë, ate' biti' buduyúli' neda'." ⁴⁴ Ní'irö ila'nná ca' nupa na', ilé' neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridé' zi'tu', o biyadzaj le gacu', o güí'inu', o guyú'u lidxi guíë, ate' biti' gúcalentu' Li'?" ⁴⁵ Ní'irö ubi'a didza' neda', bönni' unná bè', guía' légaquiè': "Le nácatè rea' libí'ili', tu' cabí bi benli' que tu nu nutsa' ladaj nupa nacuá' ni, sal-la' naca cá'asö nu na', biti' bi benli' quia' neda'." ⁴⁶ Ní'irö bönachi tuá' dö' na' la' tsöjtsázagacatè ga ni' ila'guí'i ila'záca'tica'sö, pero bönachi tsahui' ni' gata' yöl-la' na'bán idú quéguequi.

Tun xtídza'gaquië' bönni' yudo' ila'zönë' Jesús

(Mr. 14:1-2; Lc. 22:1-2; Jn. 11 :45-53)

26 ¹ Cate' budxi bë'ë Jesús yugu' didza' ni, gudxë' yugu' bönni' usëda queë', ² rnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljè' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

³ Ní'irö bila'dxinë' yugu' bixúz unná bë' len yugu' bönni' yudo' usedi, en bönni' gula tu'zéajni'inë' bönachi judío, ate' bulu'dubë' ga naca lö'a lidxi bixúz lo, lë' Caifás. ⁴ Ni' gulún xtídza'gaquië' ila'zönë' Jesús, lu yöl-la' rizí' yë' quégaquië', para ilútië' Lë'. ⁵ Ta'nnë':

—Biti' gunru' lë ni dza laní, para cabí ila'dzatsa bönachi.

Tu nigula rigú'unu le rilá' zxixi icjë' Jesús

(Mr. 14:3-9; Jn. 12 :1-8)

⁶ Cate' ni' zoë' Jesús lu yödzo Betania lu yu'u lidxë' Simón, bönni' na' güí'inë' huë' nudzu' ruzödi, ⁷ bidxinnu cúdzu'lë' Jesús tu nigula, nuá'anu tu bóga'do' néquini guiój nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rölë' rahuë'. ⁸ Cate' bila'lé'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni? ⁹ Guca nu guti' lë ni, en si' dumí zían para gácalenru' yugu' bönachi yechi'.

¹⁰ Cate' biyönnë' Jesús lë ni, rë' légaquië':

—¿Bizx que rnnëli' queënu nigula ni? Tsahui' naca le bennu quia'.

¹¹ Yugu' bönachi yechi' ila'cuál'lentica'sö libí'ili', pero neda' bití' ugá'analentica'sa' libí'ili'. ¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. ¹³ Le nácatë rea' libí'ili', gáti'tës luyú yödzölió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

Rizí' lu në'ë Judas udödë' Jesús lu ná'agaquië' bönni' unná bë'

(Mr. 14:10-11; Lc. 22:3-6)

¹⁴ Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguië' chínnuë' na' dá'gaquië' Jesús, ¹⁵ ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'alí'?

Bulu'gá'analënë' lë' tsahui' ilu'ë lë' chi uruá' dumí plata. ¹⁶ Ní'irö gusi lahuë' Judas na' risí ribö'ë udödë' Jesús lu ná'agaquië'.

Le ráguru' le rusá' ládxi'ru' ca gútië' Xanru'

(Mr. 14:12-25; Lc. 22:7-23; Jn.13 :21-30; 1Co.11 :23-26)

¹⁷ Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que, gula'bígui'ë bönni' usëda queë' Jesús ga zoë', en të' Lë':

—¿Gazxi ré'ënu' tsöjpá'atu' queëru' para gáguru'-ba' bö'cu' zxíla'do' dzö' Laní Pascua?

¹⁸ Jesús rë' légaquië':

—Guli'tséajtsöca' yödzö ni' ga na' zoë' tu bönni', en guli'guíë':
“Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua.”

¹⁹ Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pé'ë le ilahuë' dzö' Laní Pascua.

²⁰ Cate' chigudzó' dza na', Jesús guró'lenë' idxínnutë' bönni' usëda queë' tahuë'. ²¹ Tsanni ni' tahuë', Jesús rë' légaquië':

—Le nácatë rea' libí'ili', tu nu nutsa' ladjali' ni udödi neda'.

²² Ní'irö bulu'huí'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

²³ Bubi'ë didza' Jesús, rnnë':

—Bönni' ni runé' në'ë tsözxón len na'a lu yó'öna, bönni' ni udödë' neda'. ²⁴ Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

²⁵ Ní'irö bubi'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, li' na'.

²⁶ Tsanni ni' tahuë', gudélë'ë Jesús yöta xtila, en gudxë' Dios: “Xclenu'.” Ní'irö buzxuzxjë' le, en bunödzjë' quégaquië' bönni' usëda queë', rnnë':

—Guli'sí', guli'gagu. Lë ni le naca caza'. Ca bena' que yöta xtila ni ruluí'i ca gaca que le naca caza'.

²⁷ Gudélë'ë ca' tu zxíga'do', en gudxë' Dios: “Xclenu'.” Ní'irö bunödzjë' ca' quégaquië', rnnë':

—Guli'gui'aj yúgu'tëli'. ²⁸ Lë ni ruluí'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gaquië'. ²⁹ Rea' ca' libí'ili', bíti'rö guí'ja' xisi le ribía lubá uva ni cate' idxinrö dza ni' guí'jalena' libí'ili' tu le cubi ga ni' rinná bë'ë Xuza'.

Jesús rnnë' innë' Pedro biti' núnbë'ë Lë'

(Mr. 14:26-31; Lc. 22:31-34; Jn.13 :36-38)

³⁰ Cate' budxi gulúl-lë' yöl-la' ba queë' Dios, yöjáquië' lu Guí'a Yaga Olivo. ³¹ Ní'irö Jesús rë' légaquië':

—Yúgu'tëli' gaca chopá ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: “Guna' ga gátië' Bönni' Uyú Bö'cu' Zxila', ate' ilásilasiba' bö'cu' zxila' na'.” ³² Cate' ubana' lu yöl-la' guti, ní'irö tséaja' tsöjnórúa' loli' saca' luyú Galilea.

³³ Ní'irö bubi'ë didza' Pedro, en rë' Jesús:

—Sala' ilaca chopá ládxi'gaquië', en ulu'cá'anë' yúgu'të' Li', neda' biti' gaca chopá ládxa'a, biti' ucá'ana' Li'.

³⁴ Jesús gudxë' lë':

—Le nácatë rea' li', na'a dzö' ni, cate' si' códxilöba' böra, li' innó' tsonna luzuí biti' núnbë'u neda'.

³⁵ Ní'irö Pedro gudxë' Jesús:

—Sal-la' gátilentea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemaní

(Mr. 14:32-42; Lc. 22:39-46)

³⁶ Ní'irö Jesús bidxínlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'có'tsöca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guchë'ë Pedro len iropë' xz'linë' Zebedeo, ate' gusí lahuë' ruhuí'innë', en risëbi ládxi'ë. ³⁸ Ní'irö Jesús gudxë' légaquië':

—Ruhuí'ini ládxa'a, en huáti caza' lu yöl-la' risëbi ládxi'. Guli'gá'ana ni, en guli'ná' yëla tsözxón len neda'.

³⁹ Gudödë' Jesús ia'lati'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunné':

—Xuza', channö huáca, ben ga biti' gun bayudxi qui'i saca'a lë ni, calëga ca ré'ënda' neda', pero ca ré'ënu' Li' gunu'.

⁴⁰ Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxón yëla tu chí'ido'?

⁴¹ Guli'ná' yëla, en buli'lidzë' Dios inábili'-në' gácalenë' libí'ili', para cabí güi'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacuídi'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza ládxi'u Li'.

⁴³ Cate' bóajë', leyúbölö buduxaquië' légaquië' tasië' tu' nadódirö yëla guió'j lógaquië'. ⁴⁴ Ní'irö bucá'anë' Jesús légaquië', ate' guyijë' leyúbölö,

en bulidzë' Dios le bunni luzuí, ate' tuz ca gunné' zí'alö rnnë'.

⁴⁵ Leyúbölö bóajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö ládxi'li? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'.

⁴⁶ ¡Guli'chasa, uyéajru! Buli'yútsöca', bönni' na' rudödë' neda' chibidxinë' ni.

Ta'chéë Jesús nadzunë'

(Mr. 14:43-50; Lc. 22:47-53; Jn.18 :2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guíë tuchi', en yugu' yágado'. Yugu' bixúz unná bë', en bönni' gula tu'zéajni'inë' bönachi judío nasól-la'gaquië' légaquië'. ⁴⁸ Judas, bönni' na' rudödë' Jesús, chibuluí'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. ⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús. ⁵¹ Tuë' bönni' dzáguie' Jesús gulecjë' guíë tuchi' queë', en benë' huë', guchúguie' guídi náguie' bönni' huen dxin queë' bixúz lo. ⁵² Jesús gudxë' lë':

—Bugú' guíë tuchi' quiu' lidxi. Yúgu'të nupa tu'dí'ini guíë tuchi', lu guíë tuchi' ilátigaca. ⁵³ ¿Naru' cabí nózinu' huáca ulidza' Xuza', ate' Lë' la' isól-la'të' zíántërö ca chinnu cö' gubáz lá'ayi le naca zían gáyu'ë tu cö' huéaj? ⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guíë tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero biti' guzxönli' neda'. ⁵⁶ Raca caní yúgu'të lë' ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnnajë' ni'.

Ridxinë' Jesús lógaquië' bönni' yudo'

(Mr. 14:53-65; Lc. 22:54-55, 63-71; Jn.18 :12-14, 19-24)

⁵⁷ Ní'irö yugu' bönni' na' zóngaqüie' Jesús gula'chéë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'. ⁵⁸ Pedro söjnhuë' Jesús zi'tu'

zí'tu'sö, en bidxinë' ga naca lö'a lidxi bixúz lo na', para ilé'enë' nacxi utságuie' Jesús.

⁵⁹ Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljé' nu uzegui Jesús didza' sal-la' si' yë'ë bönni' na', para gaca ila'chúguie' queë' gátië'. ⁶⁰ Cuntu nu bila'dzölinë' sal-la' bila'dxinë' bönni' zían, en gula'nné' queë' le cabí nácatë. Ga búdxité bila'dxinë' chopë' bönni', ate' lu yöl-la' rizi' yë' quégaquie' gula'nné' queë', ⁶¹ ta'nné':

—Bönni' ni gunné': "Huaca uquínna' yudo' queë' Dios, ate' uchisa' le ia'tsonna dzasö."

⁶² Ní'irö guzuinë' bixúz lo na', en rë' Jesús:

—¿Naru' cabí rubí'itso' didza'? ¿Bizxi caz lë ni ta'nné' bönni' ni quiu'?

⁶³ Jesús biti' bi gunné'. Ní'irö bixúz lo gudxë' Lë':

—Ni'a queë' Xanru' Dios ban rinná bé'eda' Li' quíxjö'u le nácatë. Gudíxjöi'i netu' channö nacu' Li' Cristo, Zxí'inë' Dios.

⁶⁴ Jesús rë' lë':

—Ca na' rnno' naca'. Le nácatë rea' libí'ili', ilé'eli' neda', Bönni' Guljé' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúxiba, en idxina' ga zóali'.

⁶⁵ Ní'irö lu yöl-la' rilé queë' guchözë' bixúz lo lari' nácuë', rnnë':

—iGunné' zi'ë bönni' ni queë' Dios! ¿Núzxirö naquíniru' nu inné queë' bönni' ni? Chibiyón quézili' didza' zi' bë'ë queë' Dios. ⁶⁶ ¿Nacxi rusáca'li' queë'li'?

Bulu'bi'ë didza', gula'nné':

—Nabáguë'ë xíguia' gátië'.

⁶⁷ Ní'irö bulu'chejë' zxöna' lahuë' Jesús, en gulu'ë dö' queë'.

Gula'gápë'ë ru'ë Jesús ia'zica'rë', ⁶⁸ en tē' Lë':

—¿Nácatso' Li' Cristo? Gunnéya'atsöca' na'a, ¿nuzxi na' gudapa' Li'?

Pedro rnnë': "Biti' núnbë'a-në' Jesús"

(Mr. 14:66-72; Lc. 22:56-62; Jn. 18 :15-18, 25-27)

⁶⁹ Tsanni ni' gulaca lë na', rö'ë Pedro ló'alö, ate' bidxinu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

⁷⁰ Gudá'baguë'ë Pedro lógaca bönachi nacuá' ni', rnnë':

—Biti' nözda' nuzxi que na' ru'u didza'.

⁷¹ Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni gudálenë' ca' Jesús, bönni' Nazaret na'.

⁷² Leyúbölö gudá'baguë'ë Pedro, en buzötjé' Dios, rnnë':

—Biti' ca' núnbë'a-në' bönni' ni.

⁷³ Iá'láti'do'os gudzé, gula'biga' nupa nacuá' ni' ga na' zoë' Pedro, en tē' lē':

—Le nácatē li' nunu' ca' tsözxón légaquiē' tu' naca bē'u yöl-la' ruí'isō quiu' didza'.

⁷⁴ Ní'irō gusí lahuē' Pedro rudxía dö' cuinë', en ruzötjē' Dios, rnnē':

—Biti' ca' núnbē'a-nē' bönni' ni.

La' ná'asō guródxitēba' böra. ⁷⁵ Ní'irō yöjnenē' Pedro didza' gudxē' Jesús lē', gunné': Cate' si' códxilöba' böra, tsonna luzuí chigunnó' bití' núnbē'u neda', ate' burúajē' Pedro ni', en gurödxí yéchi'dē'ē.

Tu'dödē' Jesús lu nē'ē Pilato

(Mr. 15:1; Lc. 23:1-2; Jn. 18 :28-32)

27 ¹ Cate' za' rení' dza na', gulún xtídza'gaquiē' yúgu'tē bixúz unná bē' len bönni' gula tu'zéajni'inē' bönni' judío para ilútiē' Jesús. ² Gula'ché'ē Jesús náguē'ē, ate' bulu'dödē' Lē' lu nē'ē Poncio Pilato, bönni' rinná bē'ē uláz que yödzö Roma.

Ratiē' Judas

³ Cate' chinózinē' Judas, bönni' na' budödē' Jesús lu ná'agaquiē' bönni' yudo', narugu queē' Jesús gátiē', buí'innē', ate' yöju'ē chi uruá' dumí plata na' lu ná'agaquiē' bixúz unná bē', en yugu' bönni' gula na'.

⁴ Rē' légaquiē':

—Bena' dul-la' tu' budöda'-nē' bönni' tsahui' gátiē'.

Ní'irō tē' lē':

—Biti' gun lē' ni ga có'ötu' böniga. Le ben cazu' li' na'.

⁵ Ní'irō gurú'unē' Judas yugu' dumí plata na' ga naca chila yudo', ate' buzé'ē ni', en yöjsí yenē'.

⁶ Bulu'zi'ē bixúz unná bē' yugu' dumí plata na', ta'nné':

—Biti' sa'yéaj cú'uru' dumí ni ga rigú'uru' dumí que yudo', tu' naca lazxjē' tu bönni' ratiē' bönachi.

⁷ Ní'irō gulún xtídza'gaquiē', ate' gulá'uinē' dumí na' tu la' yēla queē' tu bönni' huen rö'ö para gaca ga ila'gáchē'ē bönni' zi'tu'. ⁸ Que lē' ni na', ga ridxintē na'a dza nazí'i le lataj na', La' Yēla Rön. ⁹ Caní guca ca na' gunné' Jeremías, bönni' bē'ē didza' uláz queē' Dios, gunné':

“Gula'guélē'ē chi uruá' dumí plata na', tsca le gula'zéqui'nē' bönni' Israel Lē', ¹⁰ ate' dumí na' gulá'uinē' la' yēla queē' tu bönni' huen rö'ö. Lē' ni bulu'ínē' Xana' neda'.”

Ridxinē' Jesús lahuē' Pilato

(Mr. 15:2-5; Lc. 23:3-5; Jn. 18 :33-38)

¹¹ Cate' bulu'sudxinē' Jesús lahuē' Pilato, bönni' na' rinná bē'ē uláz que yödz Roma, bönni' ni gunábinē' Jesús, rē' Lē':

—¿Nacu' Li' Bönni' inná bé'enē' bönachi judío?

Jesús rē' lē':

—Ca nácasō rnno'.

¹² Cate' yugu' bixúz unná bē' len bōnni' gula tu'zéajni'inē' bulu'zégui'ē Jesús didza', biti' bi didza' bubi'ē Jesús. ¹³ Ní'irō Pilato rē' Jesús:

—¿Naru' cabí riyóntsenu' cate' xō le ta'nné' quiu'?

¹⁴ Jesús biti' bi didza' bubi'ē. Caní guca, bubáninē' bōnni' unná bē' na'.

Rirugu queē' Jesús gátiē'

(Mr. 15:6-20; Lc. 23:13-25; Jn. 18 :38–19:16)

¹⁵ Cate' naca dza Laní Pascua na', dē caz tu le runē' Pilato, bōnni' unná bē' na', ca ta'naba bōnachi rusanē' tuē' bōnni' yu'ē lidxi guíē, núti'tēs nu té'ēni usanē'. ¹⁶ Dza na' tu bōnni' nabáguē'ē xíguia', lē' Barrabás, yu'ē lidxi guíē ni'. ¹⁷ Cate' bulu'dubi bōnachi zían ni', Pilato gunábinē' légaquiē', rnnē': —¿Nuzxi ré'ēnili' usana' queéli'? ¿Naru' Barrabás o Jesús, Bōnni' na' lē' Cristo?

¹⁸ Caní gunné' Pilato tu' réquibe'enē' bulu'dödē' bōnni' yudo' Jesús lu nē'ē tu' tu'zxé'enē' Lē'.

¹⁹ Tsanni ni' rō'ē Pilato ga na' ruchia rusörōē', nigula queē' gusól-la'nu nu tsöjödxi lē', rnna:

—Biti' bi gunu' queē' bōnni' tsahui' ni, tu' gúdxide'eda' guduyēla lu yēla béchigal tu' nōzinē' Lē'.

²⁰ Yugu' bixúz unná bē' len bōnni' gula tu'zéajni'inē' gula'gú'u yól-lē'ē bōnachi zían na' para ila'nabi Pilato usanē' Barrabás na', ate' gútiē' Jesús. ²¹ Leyúbölō bē'ē didza' bōnni' unná bē' na', rē' légaquiē':

—¿Núzxilē' chopē' ni ré'ēnili' usana'-nē' queéli'?

Gula'nné':

—Barrabás.

²² Ní'irō Pilato gunábinē' légaquiē', rnnē':

—¿Nacxi guna' queē' Jesús, bōnni' na' lē' Cristo?

Yúgu'tē' ta'nné':

—iBudé'ē lē'e yaga cruz!

²³ Ní'irō bōnni' unná bē' na' rē' légaquiē':

—¿Bizxi dö' benē'?

Zídzajrō gulu'ē didza', ta'nné':

—iBudé'ē lē'e yaga cruz!

²⁴ Cate' réquibe'enē' Pilato biti' birúaj xtídzē'ē, pero gula'dzátsarō bōnachi, ní'irō gudélē'ē nisa, en gudibi nē'ē lógaquiē', rnnē':

—Biti' bi xíguia' nabága'a neda' tu' nōzi yól-la' guti queē' bōnni' tsahui' ni. Le gun cázali' libí'ili' lē' ni.

²⁵ Bulu'bí'i didza' yúgu'tē' bōnachi ni', ta'nná:

—iYöl-la' guti queë' bönni' ni ibága'tu' netu', en ila'baga' ca' zxi'initu'!

²⁶ Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' rōjáquië' gudil-la ila'guinë' Jesús, ate' gudödi ni' budödë' Lë' lu ná'agaquië' para ulu'dé'ë Lë' lë'e yaga cruz.

²⁷ Yugu' bönni' rōjáquië' gudil-la nacu'ë lu në'ë bönni' unná bë' na' gula'ché'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' rōjáquië' gudil-la nacu'ë ni' ga na' zoë' Jesús. ²⁸ Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácugaca nupa ta'nná bë'. ²⁹ Bulu'dxië' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zöë' tu guído' lu në'ë ibëla le rulu'i ca tu yaga que bönni' yúlahui'. Ní'irö bulu'zóa zxi'bë' lahuë', en bulu'titjë' Lë', ta'nnë':

—iBica' ba Li', rinná bé'enu' bönachi judío!

³⁰ Ní'irö bulu'chejë' Lë' zxöna', ate' bulu'guélë'ë gui na', en gula'guinë' icjë'. ³¹ Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'ché'ë Lë' para tsöjdá'agaquië' Lë' lë'e yaga cruz.

Tu'dé'ë Jesús lë'e yaga cruz

(Mr. 15:21-32; Lc. 23:26-43; Jn.19 :17-27)

³² Cate' ni' bila'ruajë' bönni' na', yōjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

³³ Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru', ³⁴ bulu'gui'jë' Jesús nupi zi nutsí'i zxi'gala'aba' böa' guixi'. Cate' buxi'i ru'ë Jesús, biti' gú'unnë' guí'jë'.

³⁵ Cate' chinudá'agaquië' Lë' lë'e yaga cruz, gula'guísië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lë na' gunné' bönni' bë'ë didza' uláz queë' Dios, gunné': "Gula'guísië' lari' nácuë', en bulu'quitjë' lahui le gaca bë'." ³⁶ Ní'irö gula'bö'ë ni', tu'yúë' Jesús. ³⁷ Lësca' bulu'zöë' lë'e yaga cruz ícjalë' Jesús tu didza' le riguixjō' le nabáguë'ë le rnna caní: "Bönni' ni Jesús, Bönni' rinná bé'enë' bönachi judío."

³⁸ Ga ni' dë'ë Jesús, bulu'dé'ë ca' lë'egaca yaga cruz chopë' bönni' gubán. Tuë' bulu'dé'ë cuita lë'ë ibëla, en ia'túë' na' cuita lë'ë yōgōla.

³⁹ Gula'dödë' ni' yugu' bönni' bulu'lidza zi'ë Jesús, en bulu'tá ícjagaquië', tu'titjë' Lë', ⁴⁰ ta'nnë':

—iÖn, Li' na' uquínnaju' yudo', ate' tsonna dzasö ca' uchísatso' le! iBusölá cuinu' na'a channö nacu' Li' Zxi'inë' Dios! iBótjatsöca' lë'e yaga cruz na'!

⁴¹ Lësca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nnë':

⁴² —Yugu' nu yúbölö busölé' bönni' ni, pero biti' gaca usölá cuinë'. Channö náquië' Bönni' inná bé'enë' bönachi Israel, huótjatsöquië' na'a lë'e yaga cruz, ate' tséajlë'ëru' Lë'. ⁴³ Lë' buzxöni ládxë'ë Dios. Dios usölá cazë' Lë' na'a channö raza ládxë'ë Lë', tu' gunné': “Zxí'inë' Dios naca'.”

⁴⁴ Lësca' caní yugu' bönni' gubán na' dá'gaquië' lé'egaca yaga cruz ga ni' dë'ë Jesús bulu'lidza zi'ë Lë'.

Ratië' Jesús

(Mr. 15:33-41; Lc. 23:44-49; Jn.19 :28-30)

⁴⁵ Cate' bidxín huagubidza, guchul-la idútë yödzölió ga bidxintë idú ridödi xihuó. ⁴⁶ Idú ridödi xihuó na', bë'ë zidzaj didza' Jesús, rnnë': —Elí, Elí, ¿lama sabactani?

Didza' ni rnna lu didza' xidza': “Dios quia', Dios quia', ¿bizx que nubéaj ládxu'u neda'?”

⁴⁷ Cate' nupa nacuá' ni' bila'yöni didza' ni, ta'nná:

—Bönni' ni rulidzë' Elías, bönni' ni' bë'ë didza' uláz queë' Dios.

⁴⁸ La' guxíti'të' tuë' bönni' nútsë'ë ládjagaquië', en gudélë'ë tu le bululu rizxupi nisa, ate' buxúpinë' le nupi zi, en buzóë' le tu lu gui, ate' butságuië' le ru'ë Jesús para xupë'. ⁴⁹ Ní'irö ia'zica'rë' bönni' ni' ta'nné':

—iGulózagarö! iUyútsöca'ru' channö huidë' Elías usölé' Lë'!

⁵⁰ Leyúbölö guródxi'ë zidzaj Jesús, ate' burúajtë bö' naca cazë', gútitë'. ⁵¹ La' ná'asö biróza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' zxu', en gula'lá'a guiój. ⁵² Gula'yalaj yeru ba quégaca nupa chinátigaca, nupa ni' gula'yéajlë' Dios, ate' bulu'bán bönachi na'. ⁵³ Gudödi bubanë' Jesús, bulu'rúajë' bönni' na' yeru ba quégaquië', en gula'yázië' yödzö lá'ayi Jerusalén, ga ni' bila'lé'e bönachi zían légaquië'.

⁵⁴ Ní'irö gúdxinë' bönni' na' rinná bé'enë' bönni' röjáquië' gudil-la, enca' yugu' bönni' röjáquië' gudil-la nacuá'lenë' lë' tu'yúë' Jesús, ate' gunné':

—Le nácatë bönni' ni gúquië' Zxí'inë' Dios.

⁵⁵ Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzé'ë luyú Galilea, ate' gulunnu xichinë', gula'gú'unu le gulahuë'. ⁵⁶ Lësca' María Magdalena, en María, xiná'agaquië' Jacobo, en José, nútsa'gacanu ládjagacanu, ate' zóanu ca' ni' xiná'agaquië' yugu' zxí'inë' Zebedeo.

Ta'gu'ë Jesús yeru ba le nadaj lë'e guí'a guiój

(Mr. 15:42-47; Lc. 23:50-56; Jn.19 :38-42)

⁵⁷ Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús. ⁵⁸ Bönni' ni yöjyúë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzjë'

queë' Jesús. ⁵⁹ Guzxi'ë José Lë', en buchólinë' Lë' tu lari' nazaca'.

⁶⁰ Ní'irö gulu'ë Lë' lu yeru ba cubi queë' le naguidjë' lë'e guí'a guió'j. Budé'ë tu guió'j blaga zxön ga nu riyaza yeru ba na', ate' söhuó'jë'.

⁶¹ Gula'cuá'anu María Magdalena, en ia'tunu María ni', ró'gacanu ra' yeru ba na'.

Yugu' bönni' röjáquië' gudil-la tapa chi'ë ba queë' Jesús

⁶² Cate' za' rení' ia'tú dza, gudödi bulu'pé'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. ⁶³ Të' Pilato:

—Bönni', röjnetu' bi gunné' bönni' rizí' yë'ë na', cate' ni' zoë' nabanë', gunné': “Cate' gaca tsonna dza ubana' lu yöl-la' guti.” ⁶⁴ Que lë ni na' gunná be'e nupa ilún chi'i ba ni' ga idxintë dza bunni, para cabí ídigaquië' bönni' usëda queë' chi'i dzó'ölö, en ulu'béajë' Lë'. Ní'irö ilé' bönachi: “Bubanë' Jesús lu yöl-la' guti.” Channö caní gaca, didza' cabí nácatë ni ilu'ë gúntërö huiá' dö' ca ben didza' cabí nácatë na' gulu'ë zí'alö.

⁶⁵ Pilato gudxë' légaquië':

—Ni nacu'ë bönni' röjáquië' gudil-la. Guli'ché'ë queéli'. Guli'tséaj, guli'gún chi'i yeru ba na' tsca séqui'li' gunli'.

⁶⁶ Ní'irö yöjáquië' ni', en bulu'sayjë' dxi'a yeru ba na', en bulu'dé'ë lë'e guió'j na' tu le gaca bë' channö isalaj, ate' bulu'cá'anë' ni' bönni' röjáquië' gudil-la ilún chi'ë le.

Rubanë' Jesús lu yöl-la' guti

(Mr. 16:1-8; Lc. 24:1-12; Jn.20 :1-10)

28 ¹ Cate' chigudödi dza lá'ayi quégaquië' bönni' judío, en chizá' rení' dza domingo, yöjyúgacanu María Magdalena en ia'tunu María na' yeru ba queë' Jesús. ² Tsárido'os gudödi budó' zxu'. Caní guca, tu' bö'tjë' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudúë' guió'j blaga zxön na', en gurö'ë lu guió'j na'. ³ Nalá' lahui gubáz lá'ayi na' ca yösa bení', ate' zxíla'do'os naca lari' nácuë'. ⁴ Cate' yugu' bönni' na' röjáquië' gudil-la tapa chi'ë yeru ba na' bila'lé'enë' lë', guládxinë', en gula'zxízië'. Gula'dzö'ë lu yu, en guláquië' ca bönni' nati caz. ⁵ Ní'irö gubáz lá'ayi na' gudxë' yugu' nigula na', rnnë':

—Biti' gádxili'. Nözda' ruguúljalí-në' Jesús, bönni' na' bulu'dé'ë lë'e yaga cruz. ⁶ Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'. ⁷ Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë' cazë' inóruë' loli' saca' luyú Galilea. Ni' ulé'eli-në'. Chigudxa' libí'ili' le gulu'ë Dios lu na'a.

⁸ Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö sōjācanu sōjtíxjōi'iguequinu yugu' bönni' usēda queë'. ⁹ Tsanni ni' sōjācanu, Jesús yōjtsāguië' légacanu, ate' rē' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj lādxi'gacanu Lë'. ¹⁰ Ní'irö Jesús rē' légacanu:

—Biti' gádxili'. Guli'tséaj, guli'tsōjtíxjōi' yugu' bócha'a tsōjāquië' saca' luyú Galilea, ate' ni' ulu'lé'enë' neda'.

Le gula'guíxjō'ë yugu' bönni' rōjāquië' gudil-la

¹¹ Tsanni ni' sōjācanu nigula na', yugu' bönni' na' rōjāquië' gudil-la gulún chi'ë yeru ba na' bulu'dxinë' lu yōdzö ni', ate' gula'guíxjōi'inë' yugu' bixúz unná bë' yúgu'të lë na' gulaca. ¹² Cate' chibulu'tubë' yugu' bönni' gula tu'zéajni'inë', gulún xtídza'gaquië'. Ní'irö bulu'nōdzjë' dumí zían quégaquië' bönni' na' rōjāquië' gudil-la. ¹³ Të' légaquië':

—Caní innali': "Bila'dxinë' bönni' usēda queë' chi'i dzó'ölö, en bulu'béajë' Lë' tsanni ni' rásitu'." ¹⁴ Channö huayönnë' bönni' rinná bë'ë lë ni, netu' uzéajni'itu' lë', en guntu' ga biti' bi gunë' queé'li'.

¹⁵ Ní'irö yugu' bönni' rōjāquië' gudil-la na' gula'zi'ë dumí na' ate' yōjéngaquië' ca na' chinazédagaquië'. Caní guca, tu'zë' bönni' judío didza' ni ga ridxintë na'a dza.

Jesús risól-lë'ë yugu' bönni' gubáz queë'

(Mr. 16:14-18; Lc. 24:36-49; Jn.20 :19-23)

¹⁶ Ní'irö idxinéajtë' bönni' usēda queë' Jesús yōjāquië' luyú Galilea, ate' bila'dxinë' lu guí'ado' na' chibulu'í'inë' Jesús légaquië'. ¹⁷ Cate' bulu'lé'enë' Jesús, gula'yéaj lādxi'gaquië' Lë', pero bal-lë' gulaca chopá lādxi'gaquië'. ¹⁸ Ní'irö gubígui'ë Jesús ga na' nacu'ë, en rē' légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni. ¹⁹ Que lë ni na', guli'tséaj, guli'tsōjsëdi yúgu'të bōnachi idútë yōdzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi. ²⁰ Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yōdzölió. Ca' gaca.